

AFOSITOLO yadi Gugai

Hida buki ana egana Afositolo yadi Gugai ma bana Luke yana buki anavelu, ada afositolo tulina tulina yadi faisewa gilukahihiyena. Badi kahihidi tufona mali kaliva hihawavelelena tu tufona Luke tauna gihalamanena, fa'ina bana Folo buye hinudadana buye himiyami. Hidema fa'ina daba 16 againe yana gahe givebutu gigayo, Ime ayage, o ka'i, Ime ayemu. Kaliva hivaitana Folo Loma deliya himiyami ana toveya, Luke hida buki gi'etoladina.

Tu Luke yana inuba hidede amine. Alu'aluwa Mahalina afositolo kadu tovetumagana moy'a'aidi gifaiwalaveledi-yo Kaiwabu Yesu fa'ine hilumamala kadu Bana ana eganeya aituha fifiwaladi hifaisewadi be Yesu ana vetumaganafafali tulina tulina agaidiya give'aliyahega. Yesu yana yo'o tuwelo Yelusalema againe hivebutu, ada hinafane mali tonagona Filifi amine Sameliya ana fafaliya hinauwena, tu muliya Folo ahenao fafali yuwa lauveya Yesu bonana hiwahidadanena.

Kadu nuwanuwa sa'eyana ma nagona miYuda adi loigaga hivetumagana tu muliya yo'o tulidiyao kalivai-dina Yesu hivetumaganena. Boi miYuda yo'o tulidiyao himiyavehailedi, tu Alu'aluwa Mahalina yana kivetuvetunu againe hivebutu hivetobohiyana.

Kadu'e Luke nuwanuwana kabemani higa miLoma hinahalamanena badi Yesu ana tomuliya keke tovekwageya au miLoma yadi vehimeya ana todibumuhi. Tova moy'a'aina miYuda adi tonagona afositolo hivelotudi, tu Loma tovedewayauga yadi koyona hilele-wayoge.

Hida buki againe Yesu yana kaliva tulina tulina kahihidi giddaouda tu Bana Alu'aluwa Mahalina gifaiwalaveledi kadu ginuwanuwavedi fa'ina, buki ana egana ana lauboda au Alu'aluwa Mahalina yana gugai.

Alu'aluwa Mahalina inubana fa'ina.

- 1** ^aTobohiyaku Tiyofilo, boi yaku buki nagona againe gaitoma moy'a'aina Yesu gifaisewana kadu givehawalayena-ma ga'etoladina.
^bYana faisewa ana abave'inuba againe gavebutu ga'etoladina, ada yana laka lobameya ana toveya Bana kahihina ganunauwena. Tu aimo keke gidalaka lobameya tu Alu'aluwa Mahalina yana kivetuvetunu againe badi kaliva yana kabu hivaini-yo hive'afositolo-ma vehimeya giveledi. ^cE, Bana gi'alika ada

^a 1:1 Lu 1:1-4 ^b 1:2 Lu 24:49-51 ^c 1:3 Lu 24:36-45

gimididi-havagi yo badi kalivai-dina agaidiya Tauna gi'l'ivemogatalina, ada Bana wayawaina velemo'ena ma giseyemaune-mo'ena be keke adifaiweya yana mididi-havagi fa'ina hinavenuwanauna. Au tova keke sa'eyadi Tauna gi'l'ivemogatalina be badi hi'ita'itana, ada Yaubada yana itave'avina fa'ina higa ide yana yo'ogaga givehivehimeyeda ma gilukahihiyedi. Ada hidede amine ginunauwena aiyeta foti (40) agaidiya. ^{4^d}Ada tova sa'eyana badi Bana buye aimo himiyami hi'au'a tu hida vehimeya giveledi gigayo, "Keke Yelusalema wananyabuyabuni, au wanamiyami be abahawahega Kamaku giwonadabedabena-ma wanabodana, abahawahegai-nadi fa'ina Iya boi gavenuwa'atami be wanogalina, higa Alu'aluwa Mahalina. ^{5^e}Boi tuwaina bana Yoni gufa againe gikivebaftaisoyemi tu aiyeta keke moy'a'ina kanahegedi-yo Yaubada Alu'aluwa Mahalina againe ginakivebaftaisoyemi higa alu'aluwami gina'utuvina." Hidedemi Yesu gigahedi.

Yaubada Yesu lobameya gisilakahina.

⁶Tu badi afositolo Yesu buye hivaga'auta ana toveya, badi hitoliluveluvena higayo, "Kaiwabu, ka'i adamoya hida tovai-nadi miLoma yadi abavehimeya unyawwelina be ide miIsileli kanafaiwala-havagi be yo'o moy'a'idi kanavehimeyedi?"

^{7^f}Bana Yesu gigahedi gigayo, "Kamaku anakaibe kaliva yadi tova o ka'i yadi aituhua givehimeyena, tu tovai-nadi omi keke amifaiweya wanahalamaneni. ^{8^g}Tu gaitoma sa'eyana amifaiweya wanahalamanena, higa Alu'aluwa Mahalina ginaluvaiyemi-yo yana faiwala againe ginavemagami be Iya fa'ikuya wana'awatalatalaina fa'ina. E, Yelusalema againe Iya fa'ikuya wana'awatalatalaina, kadu Yudiya ada Sameliya anafafali agaidiya ada hida babi ana fafali moy'a'ina lauveya wana'awatalatalaineku." ⁹Ada hidedemi gigahe-yo Yaubada lobameya gisilakahina. Bana gilakalaka tu badi afositolo hilulauboda, ada au buhibuhi gisevauyena be keke adifaiweya hina'itani.

¹⁰Bana gilakalaka ada badi lobameya aimo hi'ita'itadona tu auhe'ama kaliva adi'iselu adi vaigau ve'akinamanamalina gilu'afuneunedi be lilidiya himidi. ^{11^h}Ada higayo, "Omi miGalili, gavana fa'ina mededei wamidimidi tu lobameya wavedavedadaga? Bana hidevama Yesu Yaubada lobameya gisilakahina be ginuyabuyabumi amanadi, aimo tova mulina ginahobu'ela-havagi. E, Bana lobameya gilaka amine, kadu lobameya ginahobu'ela."

Afositolo Yudasi ana hilafa fa'ina hinuwanuwa.

¹²Tu kaliva adi'iselu hidedemi higahe-yo badi afositolo oya Olive againe hitauya be Yelusalema againe hiywadi, melalai-nadi ana lauva

^d 1:4 Lu 24:49; Yo 14:16-17 ^e 1:5 Md 3:11 ^f 1:7 Mk 13:32 ^g 1:8 Md 28:19; Af 2:32, 5:32; Ef 3:16 ^h 1:11 Lu 21:27; Ha 1:7

eda'ufo vaita kilomita sa'eyana amine. ¹³ Ada au Yelusalema againe hiyemu tu manuwa hinagene himiyami-ma hiluku ada yadi abamiyami manuwa getana againe hilaka. Ada badi himiyami-ma adi egana Fita Yoni Yemesa Anidulu, kadu Filifi ada Tomasi, kadu Batolomiu ada Madiu, kadu Yemesa bana Alifiyo natuna, Saimoni bana yo'o miLoma hivenibainedi-ma kalivana, ada Yudasi bana Yemesa natuna. Au afositolo adi yo'o hidede amine. ¹⁴ Ada tova moya'aina buye hivagavaga'auta, badi'iya'ao kadu vevine, ada Meli Yesu hinana kadu Yesu taineyao. Au moya'aidi se'eyaine hivagavaga'auta be hive'ove'o'ola.

¹⁵⁻¹⁶ *Himiyami tu tova sa'eyana tovetumagana hivaga'auta be himitini, adi kilagalaga hanaledi-tuweniti (120). Ada au Fita gitowamidi be gilukahihi gigayo, “Tobohiyakweyao, keke gavana tu Yaubada Veyao Tuwaina ana bukiya boi tuwai-mo'ena givehimeyena amine ahe gilakayemu, higa Alu'aluwa Mahalina Devida awane Yudasi fa'ine gigaheye-vagahina, bana kalivai-nadi boi kaliva gi'aliyedi be Yesu hikive'avina amanadi.* ¹⁷Bana Yudasi ma boi ime afositolo yama yo'o kalivana, fa'ina Yesu bana ime buye hida fai'sewa fa'ina givegidema.” Hidedemi Fita givebutu gilukahihi.

¹⁸*Tu higa bana Yudasi yana gugai koyona fa'ina fata givaina, ada mani-nadi againe babi sa'eyana gikimonena. Au hida yana babi againe gibe'u, hifugana gibifolena be kamokamona giyemu ada au gi'aliika.* ¹⁹Ada miYelusalema moya'aidi hida Yudasi valeyana hinogalina, ada hidema fa'ina yana babi taudiyao bonadiya hivewagana Akelidama. Egana ana kaivila ma babi dayadayagina.

²⁰*Kadu Fita gigayo, “Au Yaubada bonana Same againe kaliva sa'eyana gi'etoladina Yudasi fa'ine gigayo,*

*Gilubodadi be kaliva moya'aidi yana manuwa hidanuyabuyabuna,
e keke tamo hakwadi medede againe gidavemanuwa.*

Kadu Yaubada bonana sa'eyana gigayo,

Kadu tamo hakwadi velugana yana fai'sewa gidavaina.

²¹⁻²²*Yaubada bonana hidedemi gigahe fa'ina, kaliva sa'eyana bana ana hilafa fa'ina adafaiweya kadavenuwadadanena, be Yesu Keliso yana mididi-havagi fa'ina bana ime afositolo buye kaliva agaidiya ana'awatalatalaina. Ada bana kalivai-nadi yada yo'o agaideya kanavaina. E, tamo hakwadi ide boi kavebutu Kaiwabu Yesu buye kamiyami kanunudadana tuwaina Yoni gilumamala be kaliva gikivebaftaisoyedi ana toveya ada kanunauwena Yaubada Yesu lobameya gisilakahina be ginuyabuyabuda, au medema Yudasi ana hilafa kanasena.”*

²³*Tu Fita hidedemi gigahe fa'ina, kaliva luhei adi egana hiyakahina. Sa'eyana ma Yosefa kadu hivewagana Basabasi, ada ana egana anaveto*

ⁱ 1:15-16 Sam 41:9 ^j 1:18 Md 27:3-10; Lu 22:22 ^k 1:20 Sam 69:25, 109:8

Yasito. Kadu kaliva anavelu ma Mataiyasi. ²⁴⁻²⁵ Adi egana hiyakahini tu hive'o'ola higayo, "Kaiwabu-yo, kaliva moy'a'ima ase'asema uhalamanena fa'ina O unavehawalema. Hida kaliva adi'iselu amanadi hadema O uvenuwadadanedi be afositolo yadi faisewa gina'abina, higa faisewai-nadi Yudasi gidibutoyogena be koyona ana laufata ana abageya gina." ²⁶ Hive'o'ola gihavaina, kaliva adi'iselu adi egana kabala kabi'ona againe hi'etoladina be gowa againe hidodona, ada au hibihiwana againe Mataiyasi ana egana gimidibe'u, fa'ina afositolo adive'ileveni agaidiya giluku.

Alu'aluwa Mahalina tovetumagana givemagadi.

2 ¹Tu tafalolo ana egana Fenidikosi giyemu againe, tovetumagana se'eyaine ahe hivaga'auta. ²Ahe hivaga'auta tu auhe'ama butuna lobameya hinogalina, ana nogala vaita bolimanakouko gidamadumadu, ada manuwai-nadi againe hivetogadi-ma butuna gilelevilana. ³"Butuna hinogalini-yo iya'iyaya hi'itana, ana ita ma vaita ai noya'aina amine, ada gi'alavedavedama be kaliva sa'eyana sa'eyana getadiya gina gihiyoto. ⁴"Au Alu'aluwa Mahalina moy'a'idi nuwahinagediya giluku be givemagadi, ada hivebutu meya tulina tulina agaidiya hilulukahihi Alu'aluwa Mahalina gi'alaveleveledi amine.

⁵Tu mededei Yelusalema againe miYuda tufoidiyo himiyami, boifafali moy'a'ina agaidiya hitauya be hina Yelusalema himiyami, ada badi Yaubada hihawadavadavana velemo'ena. ⁶Ada au badi kalivai-dina kaliva yadi lukahihi meya tulina tulina ma butuna hinogalini-yo, au moy'a'aidi hiyo'o ada ase'asedi gi'alilihiwana, fa'ina taudiyo bonadi tulina tulina badi tovetumagana hilulukahihiyena amanadi hinogalina. ⁷Au nuwadi givegafo'uya'uya kadu hiyaulowoga, ada buye hive'agahegahe higayo, "Badi hidevama kalivai-dina meya tulina tulina agaidiya hilulukahihi-ma au badi moy'a'idi miGalili, kekefafali tulina tulina kalivadi. ⁸Bona Galiliga hihalamanena nonogana gavadi-yo moy'a'ida kanogalina taudeyao bonada tulina tulina agaidiya hilulukahihi? ⁹Ide yadafafali ma Fadiya Midiya Elamu kadu Mesofotemiya, Yudiya Kafadosiya ada Fonitasi be Esiya. ¹⁰Kadu tufoida miFilidiya miFamifiliya miIdifita ada tufoida Libiya ana fafali melala ana egana Sailini liline katauya. Kadu tufoida miLoma tu Yelusalema againe kawakawaka. ¹¹^oAda higa tufoida miYuda-mo'a, kadu tufoida yo'o tulidiyo kalivai-dana tu miYuda yadi tafalolo againe kahawahegeda be kavemiyuda. E, kadu tufoida miKelita ada miAlebiya. Au yadafafali moy'a'ina tu Yaubada yana gugai fifiwalanataudeyao bonada tulina tulina agaidiya badi hilulukahihiyena-ma ide

¹2:1 2Veh 16:9-11 ^m 2:3 Md 3:11; Yo 3:8 ⁿ 2:4 Yo 14:17; Af 4:31, 10:44-46

^o 2:11 Ha 7:9

kanogalina.” ¹² Ada hidedemi moya'aidi hiyaulowoga kadu nuwadi givegafo'uya'uya fa'ina buye hive'atoliluvaluva higayo, “Taumadi! Hida gavana ana inuba?” ¹³ Tu tufoidi tovetumagana hihawavelaigedi higayo, “Hida kaliva gufa koyona hiyuni-yo u'udi gikoyo.”

**Fita yo'o agaidiya givebutu gilumamala. Nagona
Alu'aluwa Mahalina fa'ina gikivetuvetunu.**

¹⁴ Tu bana Fita badi afositolo ileveni buye himiyami amanadi gitowamidi givebutu yo'o agaidiya gilumamala agona lakahina gigayo, “Omi miYelusalema kadu ide miYuda moya'aimiyao ganakivetuvetunumi be wanano-gali-hagihagiyena. ¹⁵ Ime kaliva keke gufa koyona againe u'uma gidakoyo omi wanuwanuwa amine. Ide yada dewa ma kaliva gufa koyona keke malalaugeya hidayyu, au lavilaviya hiyuyu be u'udi gikoyokoyo. Ada adamoya kauwana ana ita bai naeni amine fa'ina u'uma keke gufa koyona againe gidakoyo, keke. ¹⁶ Au hidevama wanogalina-ma Yaubada bonana ana to'awatalatalaina ana egana Yoweli boi tuwai-mo'ena gilukahihiyena gigayo,

¹⁷ *P*Tova ana abalauyabu ana aituba fa'ina
Yaubada hidede amine gigahe gigayo,
Tomiyababi moya'aidi Alu'aluwakuya ganavemaga-mo'edi.
Natumiyo kaliva vevine yaku venuwa'ata
ganahawavelevedi-yo hina'awatalatalainena.
Yami tubulakata yaku nuwanuwa hina'eno'itayena
kadu kaliva lakahidiyo yaku vehimeya hina'avayaunena.

¹⁸ E, mena aituheya kadu aku agetoga
kaliva be vevine Alu'aluwakuya ganavemaga-mo'edi.

¹⁹⁻²⁰ Abaveyaulowoga wese lobameya ganafaisewana,
kauwana ginakweu vaikohi ginavedayaga.
Iya'iyaya gava babiya ganaseyemaunena,
dayaga ai'ala'alata siyo luvilovilona.
tu muliya Kaiwabu yana tova ginalakayemu,
higa vedewayauga ana tova matamatauhina.

²¹ Tu gaveyao moya'aidi Kaiwabu againe hinakova,
medema adi kibababala hinanuhagana.”
Au hida Yaubada yana gahe bana Yoweli gi'etoladina-ma bana Fita
giyakahina.

Yesu yana alika yana mididi-havagi fa'ina.

²² *q*Kadu Fita gigayo, “Omi miIsileli yaku gahe wanano-galina. Yesu kwanaNasaledi fa'ina ganagahe. Bana'e Yaubada velemona givegidena

ma Yaubada Tauna givehawale-hagihagiyemi, fa'ina gifaiwalavelena be
 atiuha fifiwalana ada abaveyaulowoga iya'iyaya lakahina omi hinafamiya
 gifaisewadi, ada hida gaitoma omi taumiyo wa'itadi be wahalamanedi.
²³^rAu hida kalivai-nadi waluve'alikana, fa'ina kaliva koyodiyao nimadiya
 wahegenauwena be kelose againe hitutuvefosena. Au hidedemi omi
 wahuluva tu boi tuwai-mo'ena Yaubada Tauna givehimeya be Yesu omi
 nimamiya gihawahegena ada wanaluve'alikana fa'ina. E, hidedemi
 Yaubada givehimeye-vagahina, kadu tuwai-mo'ena vehimeyai-nadi aimo
 keke wadafaisewani-ma au gihalamane-vagahina. ²⁴^sOmi waluve'alikana
 tu Yaubada alikeya gisivemididina. E, alika ana bulava aulo'aulolona
 giyogona tu Yaubada giyaua, fa'ina alika yana faiwala giyawelina be
 keke anafaiweya ginakive'avi-vagahini. ²⁵^tAlika Yesu keke anafaiweya
 ginakive'avi-vagahini fa'ina tuwai-mo'ena Devida Yesu yana gahe
 gigaheye-vagahina vaita Yaubada fa'ine gidalukahihi gidagayo,

Iya gahalamanena tova moy'a'aina

Kaiwabu agaikuya ginamiyami.

Bana'e lilikuya gimimiyami fa'ina,
 ase'aseku keke gina'akolokoluni.

²⁶⁻²⁷Hidema fa'ina nuwaku giyamumu,
 kadu yaku wavemwamwala galulukahihi.
 Aimo wowoku lahiya ginadauda
 tu yaku walulauboda ganamiyami,
 fa'ina a gahalamanena alu'aluwaku
 keke to'alika yadi abageya unahege-vagahini.

E, Iya ya Kaliva Mahamahaliku
 keke-mo'a wowoku unahawahegeni-yo
 babiya gina'alilini.

²⁸Yawai-vagata ana eda ahe uvehawaleku.

Iya o buye kanamiyami fa'ina,
 ganavemwamwala, ganavemwamwala-mo'a.

Au hidedemi Devida Yesu fa'ine gigaheye-vagahina.

Devida yana gahe Yesu yana mididi-havagi be yana kaiwabu fa'ina.

²⁹^rTobohiyakweyao, nuwanuwaku ganagahe-mo'emi higa
 bwaneneda kikaiwabuna Devida boi tuwai-mo'ena gi'alika
 ada wowona hihuyana, au ana tomohuyahuya adamoya ide
 hinafadeya aimo gidadauda. ³⁰^tTu yana gahe gayakahina-ma
 keke tauna fa'ina, au aimo gavadi ginalakayemu fa'ina gigaheye-
 vagahina, ada Yaubada gavaimi bana againe giwonadabadaba-ma

^r 2:23 Af 4:27-28 ^s 2:25 Sam 16:8-11 ^t 2:29 1Kin 2:10; Af 13:36 ^u 2:30 Sam 132:11

ahe gihalamanena, higa bwanenena sa'eyana tokaiwabu lakahina bana Devida amine ginasesa. ³¹ ^wAda gavadi Yaubada ginagani-ma Devida gi'ita-vagahina, ada au Yaubada yana Tovegida Keliso yana mididi-havagi fa'ina gigaheye-vagahina, gahe-nadi iya gayakahina amanadi higa Yaubada to'alika yadi abageya keke gidahege-vagahini, kadu wowona keke gida'alilini. ³² ^wHidedemi Devida gigahe ada Yaubada hida kaliva Yesu makewa alikeya gisivemididina, ada ime moya'aimeyao to'ita, au yana mididi-havagi fa'ina a'awatalatalaina. ³³ E, Yaubada gisivemididina be i'atagine gisena. Kadu Tamana Alu'aluwa Mahalina givelena boi giwonadabadaba amine. Ada adamoya Yesu Alu'aluwa Mahalina ime agaimeya gi'iveninisena be givemagama, fa'ina meya tulina tulina agaidiya alulukahihi be omi wa'itana kadu wanogalina.

³⁴⁻³⁵ ^xKadu'e, Devida yana gahe gayakahina-ma keke tauna fa'ine gidagahen, fa'ina bana keke lobameya gidalaka Yesu amine. Tu gigahe gigayo,

Bana Yaubada Kaiwabu iya yaku Kaiwabu gigahen
gigayo, I'atagikuya unahiyoto. Unamiyami tu
nibaimomo ageyafayafaniya ganasedi.

Au hidedemi Devida gigahe vaita Yaubada Kaiwabu Yesu againe gidalukahihi.

³⁶ Au ide miIsileli moya'aimiyao wanahalamane-hagihagiyena. Bana hidevama Yesu omi kelose againe watutuvefosena tu Yaubada gisena Kaiwabu kadu yana Tovegida Keliso." Au hidedemi Fita gilumamala.

Kaliva moya'aidi Fita yana laumamala hinogalini-yo hinuwavilana.

³⁷ ^yTu yo'o yana gahe hinogalini-yo ase'asedi gi'akolukoluna, bonana ase'asedi gi'onana fa'ina, ada Fita kadu afositolo velugadiyao agaidiya higahe higayo, "Tobohiyameyao, gavadi anagani?"

³⁸ Fita gigahedi gigayo, "Kaliva moya'aimi sa'eya sa'eya yami dewa koyona wanahegena be wanahagavilami, ada Yesu Keliso ana eganeya wanabafitaiso be Yaubada yami koyona ginayawelina fa'ina. Ada au Yaubada Alu'aluwa Mahalina omi agaimiya ginahawahegena be ginavemagami. ³⁹ ^zFa'ina Yaubada boi giwonadabadaba be Alu'aluwa Mahalina ginahawahegena omi agaimiya, kadu ami unumamomo agaidiya, kadu moya'aidi lauveya himimiyami-ma agaidiya. E, Yaubada yada Kaiwabu gaveyao moya'aidi ginakovadi be Bana againe hina'ela, medema agaidiya ginahawahegena."

⁴⁰ Au hidedemi Fita gikivetuetunudi kadu hifufu keke sa'eyadi againe gigaheya'aya'alidi be higa taudiyao hinalugolegoledi. Gigahedi gigayo,

^v 2:31 Sam 16:10 ^w 2:32 Af 1:4,8, 7:55-56; 1Fi 3:22 ^x 2:34-35 Sam 110:1

^y 2:37 Af 16:30-33 ^z 2:39 Ef 2:12-13,17

“Taumiyao wanalogolegolemi be hida yo'o koyodiyao Yesu hiluve'alikana-ma yadi koyona ana laufata omi keke buye wanunuhanagani.”

Hidedemi Fita gigahe-fa'ilidi. ⁴¹ “Ada au tufoidi moy'a'idi yana gahe hivetumaganena ada hibafitaiso. Ada medema aiyetai-nadi kaliva moy'a'ai-mo'edi adi kilagalaga tohiye tausani (3,000) tovetumagana yadi yo'o agaidiya hiluku.

Tovetumagana yadi miyami kadu yadi dewa fa'ina.

⁴² Tu badi tovetumagana hihawahegedi be tova moy'a'ina badi afositolo yadi vehawala hinoganogalina, kadu yadi nuwanuwa sa'eyana buye himiyami hilulukahihi. Kadu hivagavaga'auta be buye hi'au'a, a'a oine higa Yesu ana anuwa'udu'udu hivaivaina, kadu buye hive'ove'o'ola. Tova moy'a'ina yadi miyami kadu yadi dewa au hidede amine. ⁴³ ^bKadu'e, tova moy'a'ina afositolo aituhafifiwalana ada abaveyaulowoga hififaisewana fa'ina moy'a'idi hiwowomumuyedi.

⁴⁴ ^cKadu tovetumagana moy'a'idi buye himiyami yadi nuwanuwa sa'eyana, ada yadi lokoloko taudiyao agaidiya hifolafolakena. ⁴⁵ Higa yadi babi ada yadi lokoloko tova tova hikimokimonevedamanena be gaveyao adiga o ka'i yadi lokoloko keke amanadi, badi agaidiya mani hivaivaina-ma hivetavetalaiyena. ⁴⁶ ^dKadu aiyeta moy'a'ina manuwa tafalolo lakahina againe se'eyaine hivavaga'auta, kadu taudiyao yadi manuweya buye hi'au'a be a'a hikikihinena Yesu ana anuwa'udu'udu fa'ina. E, yadi wavemwamwala kadu yadi nuwanuwa sa'eyana buye hi'au'a. ⁴⁷ ^eAda au tova moy'a'ina Yaubada hihawahawadavavana, kadu kaliva moy'a'idi hive'amohimohinedi. Ada tova sa'eyana sa'eyana Kaiwabu kaliva gikikibababaledi be tovetumagana yadi yo'o give'atutamo'aidi.

Fita tovefela gisiveyawana.

3 ¹Tova sa'eyana Fita be Yoni manuwa-tafalolo lakahina againe hina, ada kauwana giwahivekenana ana ita bai tohiye amine higa vel'o'ola ana tova. ²^fAda badi hiyemuyemu tu kaliva sa'eyana yana tubuga againe givefela-ma manuwa-tafalolo ana abaluku againe hiwahiwahina, abaluku-nadi ana egana Abaluku Vewaga. Ada aiyeta sa'eyana sa'eyana tovefela hiwahiwahina, ada hidede againe hisehobuyena be badi manuwa-tafalolo ana toluku agaidiya mani fa'ina give'ove'o'ola. ³Ada Fita be Yoni hidaluku ma gi'itadi, ada badi agaidiya mani fa'ina give'o'ola. ⁴Tu Fita kadu Yoni buye'i hi'itakwanekwanena. Au Fita gigahena gigayo, “U'itama-yo.” ⁵Fita gigahe-yo kaliva badi agaidiya gi'italele tu ginuwanuwa vaita tamo gavadi hidaveleni.

^a 2:41 Af 4:4, 5:14 ^b 2:43 Af 5:11-12 ^c 2:44 Af 4:32-35 ^d 2:46 Lu 24:53

^e 2:47 Af 6:7, 11:21,24 ^f 3:2 Af 14:8

⁶^gAu Fita gigahena gigayo, “We'a keke tamo mani tu we'a lemegaga sa'eyana akufaiweya ganavele. Yesu Keliso kwanaNasaledi ana eganeya o gavehimeye be unanudadana.” ⁷Au nimana i'atagine gi'abina be gisilakahina, ada auhe'ama kaliva agena kadu agemata'ihina gifaiwala. ⁸Au gimadutowamidi ada givebutu ginunudadana. Au badi buye manuwa-tafalolo againe hiluku tu bana ginunudadana gihegehegelakalahina, Yaubada gihawahawadavavana. ⁹Ada kaliva moya'aidi bana ginunudadana tu Yaubada againe givesivesiule-ma hi'itana. ¹⁰Au hiyakovina higa bana tova moya'aina manuwa-tafalolo ana Abaluku Vewaga againe gihiyoto be mani fa'ina give'ove'o'ola, ada au moya'aidi ase'asedi gi'alilihiwana ada yana yamumu fa'ina hiyaulowoga.

Fita yo'o manuwa tafalolo lakahina againe gilumamaledi.

Yadi koyona higa Yesu hiluve'alikana fa'ina.

¹¹Tu manuwa-tafalolo againe abamiyami sa'eyana eda'awaneya gidauda, ana egana Solomoni yana Abamiyami, ada medede againe Fita Yoni himiyami kaliva giyamumu-ma buye'i. Bana nimadi gi'abi'abina tu kaliva moya'aidi yadi wayaulowoga badi agaadiya himadu. ¹²Bana Fita gi'itadi-yo gigahedi gigayo, “Omi ide miIsileli, gavana fa'ina hidevama giveyaulowogimi? Gavadi-yo wa'itakwanekwanema vaita taumeyao yama faiwala o ka'l yama tafalolo toyogina fa'ina hida kaliva adasiveyawani be gidanunaudadana? Keke hidedemi wanunuwanuwa. ¹³^hAu bwanenedeyao yadi Yaubada, badi Abelahamo Aisake Yakobu yadi Yaubada yana kikaiwabu lakahina yana Tofaisewa Yesu givelena. Tuwaina Bana'e Failato againe wahegenauwena be alikeya ginahegena. Bana Failato nuwanuwana ginayauna tu omi bana matane wakilowena. ¹⁴Au omi Kaliva Mahamahalina kadu Yegayegana wakilowena tu wave'o'olena toyogina be tolue'alika ginayauna. ¹⁵ⁱAda hidedemi yawaida inubana waluve'alikana tu Yaubada alikeya gisivemididina, au yana mididi-havagi ime ana to'ita. ¹⁶Ada au Yesu ana egana fa'ina, higa Bana ana eganeya avetumagana fa'ina, hida kaliva gifaiwala ada omi wa'itana kadu wahalamanena. E, yana yamumu moya'aimi matamiya inubana ma vetumagana Yesu ana eganeya.

Hagavila be koyona ana aiyawela fa'ina.

¹⁷^jTu tobohiyakweyao, iya gahalamanena gavaimi Yesu againe wafaisewani-ma omi keke wadahalamane-hagihagiyeni, kadu yami tonagona keke hidahalamane-hagihagiyeni fa'ina hidedemi wahuluva. ¹⁸^kBoi tuwai-mo'ena Yaubada badi bonana ana to'awatalatalaina

^g 3:6 Af 3:16, 16:18 ^h 3:13 Yem 3:15; Lu 23:13-25 ⁱ 3:15 Af 2:32, 5:30 ^j 3:17 Lu 23:34

^k 3:18 Lu 24:27

moya'aidi awadiya gigaheye-vagahina vaita yana Tovegida Keliso aulolo tagiya gidanuhagana. Ada Bana givehimeyena amine, a gilakayemu. ¹⁹Au yami dewa koyona wanahegena be Yaubada againe wanahagavilami be yami koyona ginayawelina fa'ina. ²⁰E, wanauwawilana be kaliva gufaleda againe meyana glivebikana amine, Yaubada Tauna ase'asemi gina'ivebikana be faiwala wanauhagana, kadu Yesu Keliso gina'iveninisena be ginahobu'ela-havagi, Bana ahe givegidena be omi ginanagoyemi fa'ina. ²¹Ada Yaubada boi tuwai-mo'ena bonana ana to'awatalatalaina mahamahalidiyao awadiya gigaheye-vagahina amine, aimo tova mulina gaitoma moya'aidi babiya ginaluve'ivagudi, ada hida tovai-nadi fa'ina Bana Yesu lobameya gibodaboda. Tovai-nadi ginalakayemu, au ginahobu'ela-havagi. ²²⁻²³¹E, to'awatalatalaina sa'eyana Mosese boi tuwai-mo'ena gigahe gigayo,

Yaubada yami Kaiwabu aimo tova mulina bonana ana to'awatalatalaina sa'eyana omi yami yo'o hinafamiya ginakivemididina. Iya gakivetuvetunumi amine, kadu bana ginakivetuvetunumi. Ada au gaitoma moya'aina ginavehimeyemima wanadibumuuhigena. Hai kaliva bana yana vehimaya keke ginadibumuuhigeni, medema Yaubada yana yo'o agaidiya ginalu'atugena be ginaluyaweyawelina.

Hidedemi Mosese gigahe.

²⁴Kadu anafaiweya Yaubada bonana ana to'awatalatalaina moya'aidi gavadi tova adamoya ginalakayemu-ma tuwai-mo'ena higaheye-vagahina. E, gaveyao Yaubada yana venuwa'ata giveledi, medema tova adamoya fa'ina higaheye-vagahina. Bana to'awatalatalaina Samuwela hidedemi gigaheye-vagahina, kadu anafaiweya to'awatalatalaina moya'aidi wai himulina amanadi tova adamoya fa'ina higaheye-vagahina. ²⁵^mAu Yaubada yana to'awatalatalaina awadiya omi fa'imiya giwonadabadaba, ada Yaubada boi tuwaina bwanenemiyao agaidiya yanaveyao gisena-ma kadu omi fa'imiya gisena. E, Abelahamo againe gigahe gigayo, ‘A unumamomo agaidiya tonuwakabubu ginatubuyemu befafali tulina tulina adi yo'o moya'aidi ginanuwakabubuyedi.’ Hidedemi Yaubada gigahe. ²⁶Ada au Yaubada yana Tofaisewa Yesu gisivemididini-yo omi agaimiya gimidi'iveninisena be ginanuwakabubuyemi. Bana'e omi moya'aimiyao ase'asemi ginakiviviyena be eda koyona wanahegena fa'ina. Au hidedemi ginanuwakabubuyemi.”

Fita Yoni miYuda yadi Koniselo agaidiya hivekotudi.

4 ¹Tu Fita Yoni yo'o agaidiya aimo hilulukahihi tu abaveyao ana tofaisewa kadu tuilala adi tonagona, kadu tonagona

¹ 3:22-23 2Veh 18:15,18-19 ^m 3:25 Aba 22:18; Ga 3:8

tafatafalolodiyao adi egana Sadusi, badi agaidiya hiyemu. ²Badi afositolo adi'iselu yo'o hivehavehawaledi be higa hinahalamanena Yesu alikeya gimiididi-havagi. Kadu higahegahedi vaita Yesu gimiididi-havagi fa'ina kadu kaliva velugadeyao kanamididi-havagi. Hidedemi hivehawala fa'ina, badi abaveyao ana tofaisewa ahena buye hi'il'a'. ³ⁿAu Fita Yoni hikive'avidi tu mala a gibogibogi fa'ina, deliya hisedi be mala ginalauni-yo hinavekotudi. ⁴^oTu moya'aidi yo'o agaidiya yadi laumamala hivetumaganena, ada tovetumagana yadi yo'o himoya'ai, adi kilagalaga faifi tausani (5,000) amine.

⁵Bogi hida mala gilauna miYuda yadi tovehimeya ada kaliva lakahidiyao kadu Mosese yana vehimeya ana tovehawala Yelusalema againe hivaga'auta. ⁶Bana abaveyao ana tofaisewa adi tokaiwabu ana egana Anasi buye hivelvai, kadu Kaiyafasi, Yoni, Alekisanida, kadu tokaiwabu-nadi ana yo'o kalivai-dina velugadiyao buye'i. ⁷^pAu hivehimeya be afositolo adi'iselu badi matadiya hinamidi. Hi'ela-yo hitoliluveluvedi higayo, "Omi ami'iselu ma hakwadi yana faiwala againe hidevama wafaisewani? Hakwadi ana egana wayakahini-yo kaliva wasiveyawani?"

⁸Hidedemi higahedi tu Alu'aluwa Mahalina Fita givemagana ada au givebutu gilumamaledi gigayo, "Omi yada yo'o adi tovehimeya kadu kaliva lakahimiyo. ⁹Adamoya ime tovefela avelugana nonogana wavedewayaugima. Gavaiya'amine giyamumu-ma watoliluveluvema. ¹⁰^qAu moya'aimiyao kadu miIsileli moya'aidi ganakivetuvetunumi be wanahalamanena. Bana Yesu Keliso kwanaNasaledi ana egana fifiwalamo'ena fa'ina hida kaliva ahe giyamumu be omi matamiya gimiidimid. Bana Yesu omi wakivekelosena tu Yaubada alikeya gisivemididina. ¹¹^rBana fa'ine gahtetalahobuhobu sa'eyana Veyao Tuwaina ana bukiya gidadauda gigayo,

Ogola omi manuwa ana to'aiyogona wakilowena
medema giveholili'abi.

¹²^sBana Yesu anakaibe againe kibababala kananuhagana. E, Yaubada Bana ana egana ide tomiyababi giveleda, ada keke tamo hakwadi velugana babiya gimiyyami-ma gidavegideni be bana ana eganeya kibababala adafaiweya kananuhagani." Hidedemi Fita gigahedi.

Koniselo Fita Yoni yadi laumamala hihawata-wayoga.

¹³Tu badi miYuda yadi Koniselo Fita Yoni yadi asevatu hi'itana againe, nuwadi givegafo'uya'uya, kadu badi afositolo kaliva-kawowo keke hidaskulu-ma hi'ayaunedi againe, nuwadi givegafo'uya'uya.

ⁿ 4:3 Af 5:18 ^o 4:4 Af 2:41, 5:14 ^p 4:7 Md 10:19-20 ^q 4:10 Af 3:6 ^r 4:11 1Fi 2:7

^s 4:12 Yo 14:6

Ada au badi boi Yesu hiveve'alunena ma nuwadi gi'afolena. ¹⁴Tu kaliva a giyamumu-ma medede againe Fita Yoni buye himidimidi. Koniselo kaliva a giyamumu-ma hi'ita'itana fa'ina keke adifaiweya tamo gavadi hinagaheyeni. ¹⁵⁻¹⁶^tAu hivehimeyedi be abavedewayauga againe hinahobu. Badi kaliva hihobu-yo badi Koniselo hivebutu hive'anuwanuwa kadu hive'agehegahe higayo, "Hida kaliva fa'idiya gavaimi kanaga? Kaliva moya'aidi Yelusalema againe hida aituha fifiwala-mo'ena hifaisewana-ma hihalamanena, ada ide keke adafaiweya kanagahe kanagayo, Badi keke hidasiveyawani. ¹⁷^uTu hida kalivai-dina kadahawatadi kadagayo, Keke tamo hakwadi velugana againe Yesu ana egana fa'ina wanagaheni. E, keke tamo tova hidede amine wanahuluvaluhavagi. Hidedemi kadahawatadi be kadu keke Yesu valeyana ginanauna kaliva agaidiya fa'ina."

¹⁸Tu hivel'agahegahe gihavaina, kaliva hikovadi be hinaluku-havagi. Hiluku-yo hivehimeyedi higayo, "Keke-mo'a Yesu ana eganeya wanalulaumamala. Keke tamo tova Bana ana egana fa'ina wanavehawala." ¹⁹Hidedemi hivehimeyedi tu badi Fita Yoni higahedi higayo, "Omi taumiya wananauanuwa. Hadema haghagina Yaubada matane, ka'i omi bonami ana'abina o ka'i Yaubada bonana ana'abina? ²⁰Tu ime keke amafaiweya ana'ilova. Au tova moya'aina gaitoma fifiwalanataumeyao a'itana kadu anogalina-ma analulukahiiyena."

²¹Hidedemi Fita Yoni higahe tu badi Koniselo kadu hihawatadonedi ada hihawahegedi be hina. Gavaiya'amine matahiwadi hinaveledi ma hinuwenewe-wayoge. Keke adifaiweya, yo'o himatausedi fa'ina. Au tovefela giyamumu fa'ina, kaliva moya'aidi Yaubada hihawahawadavavada. ²²Tovefela aituha fifiwalanaga againe yana yamumu givaina-ma bana kaliva lakahina, ana malamala foti (40) kadu gavaiyehi.

**Tovetumagana Yaubada againe hivesiule,
ada yadi asevatu fa'ina hivel'ola.**

²³Tu Fita Yoni Koniselo hihegedi tu yadi yo'o agaidiya hiywadi, ada abaveyao ana tofaisewa kikaiwabudiyao kadu kaliva lakahidiyao gavaimi higahe ma hilukahiiyena. ²⁴Ada badi tovetumagana hinogali-yo au moya'aidi Yaubada againe tamotamo'aine hivel'ola higayo, "Kaiwabu lakahi, O'eni To'aibubuna, lobama babi lehaga O ububuna, kadu gaitoma moya'aidi lobameya babiya lehageya himimiyami-ma O ububudi. ²⁵⁻²⁶^vBoi tuwai-mo'ena Alu'aluwa Mahalina O bona bwanenema lakahina Devida awane gise-vagahina, ada au ya tofaisewa Devida gigahe gigayo, Gavadi-yo yo'o tulidiyao himidi-yo hi'il'a?

^t 4:15-16 Yo 11:47 ^u 4:17 Af 5:28-29 ^v 4:25-26 Sam 2:1-2

Gavai'ona-yo manuwafo koyona hivevaiye-wayoge?
 Babi ana kini moya'adi hikidewadewa
 ada tovehimeya buye hivaga'auta be
 Kaiwabu kadu yana Tovegida hinalugaviyadi.

Hidedemi tuwai-mo'ena Alu'aluwa Mahalina Devida awane gigaheye-vagahina.²⁷^wAu tovehimeya yadi nuwakoyo fa'ina tuwaina gigahe amine tova adamoya velemo'ena gilakayemu, fa'ina badi kini Helodi kadu Fonitiyo-Failato badi yo'o tulidiyao kalivai-dina kadu miIsileli buye hivaga'auta, ada hivevai be Yesu hinaluve'alikana, Bana'e ya Tofaisewa Mahamahalina O uvegidena be ime miIsileli ginanagoyema amanadi.²⁸^xO Tofaiwala kadu O Tovehimeya fa'ina gavaimi tuwai-mo'ena ya Tofaisewa Yesu fa'ine O uvehimeyena be ginalakayemu, au hidedemi badi higugaiyena be ahe velemo'ena gilakayemu.

²⁹^yHo Kaiwabu, au badi Koniselo yadi hawata unanuwenuwena ada ime ya tofaisewa unafaiwalavelema be yama wa'asevatu O bona analumamalena.³⁰^zIme analulumamala tu O nima utune be to'aulolo hinayamumu, ada abaveyaulowoga kadu aituba fifiwalana ya Tofaisewa Mahamahalina Yesu ana eganeya anafaisewana." Hidedemi hive'o'ola.

³¹^aAda hive'o'ola gihavaina, manuwa againe hivaga'auta-ma gili'uli'u, kadu Alu'aluwa Mahalina badi moya'adi givemagadi, ada hivebutu Yaubada bonana yadi wa'asevatu hilulumamalena.

Tovetumagana yadi lokoloko taudiyao agaidiya hifolakena.

³²^bTu tovetumagana moya'adi yadi nuwanuwa au sa'eyana, kadu adi ayauna au sa'eyana. Keke tamo hakwadi gidagahe gidagayo, "Yaku gaitoma au tauku akukaibe fa'ikuya." Au adiga yadi lokoloko yadi gava'adi taudiyao agaidiya hifolafolakena.³³^cBadi afositolo hifaiwala be Kaiwabu Yesu yana mididi-havagi fa'ina hi'awatalatalaina toyogina, ada Yaubada moya'adi ginuwakabubuyedi lakahina.³⁴⁻³⁵^dKeke tamо hakwadi koyokoyo badi agaidiya gidamiyami. Tova be tova badi tonibabi o ka'i tonimanuwa medema yadi babi o ka'i yadi manuwa hikimokimedamanena, ada mani hivaivaina-ma afositolo agaidiya hi'ali'aliyena. Ada badi afositolo mani-nadi hifolafolakena. Gaveyao adiga o ka'i yadi lokoloko keke, medema agaidiya hifolafolakena.

³⁶^eAda tova sa'eyana Yosefa, Livai ana yo'o kalivana, hidede amine gihuluwa. Bana yana melala ma himula ana egana Saifilasi. Badi afositolo kalivai-nadi hivewagana Banabasi, ada egana ana kaivila ma kaliva ase'asedi ana Tokivevatu.³⁷^fBana Banabasi yana babi sa'eyana gikimonevedamanena, ada babi fatana gi'aliyena be afositolo giveledi.

^w 4:27 Md 27:1-2 ^x 4:28 Af 2:23 ^y 4:29 Ef 6:19 ^z 4:31 Af 2:4 ^a 4:32 Af 2:44

^b 4:34-35 Af 2:25 ^c 4:36 Af 11:22-26, 13:2-3

Ananaiyasi vavinena Safaila buye kahihidi.

5 ¹Tu kaliva sa'eyana gimiyami ana egana Ananaiyasi ada vavinena adi egana Safaila. Bana'e yadi babi sa'eyana gikimonevedamanena.

²^dAda babi fatana tufona tauna fa'ine gisena kadu tufona afositolo agaidiya gi'aliyeni tu gigahedi vaita mani matatabuna gida'aliyeni. Tu tufona ginuwalononena ma badi vavinena hihalamanena.

³^eAu Fita gigahena gigayo, “Ananaiyasi, gavana fa'ina Setani againe uhawahege-yo nuwaniya giluku, ada au Alu'aluwa Mahalina againe ufwaya vaita babi fatana matatabuna uda'aliyeni tu keke. Tufona tauni fa'iniya usena. ⁴Aimo babi keke udakimonevedamaneni againe, medema tauni ya babi, tu ahe ukimonevedamanena againe, babi fatana uvaina-ma kadu o uvehimeyena. Gavana fa'ina nuwahinageniya fwaya ufaisewaniyo ugahe vaita mani matatabuna udavele-'owoma? Keke kalivagaga agaimeya udafwaya, au kadu Yaubada againe ufwaya.”

⁵⁻⁶Tu Ananaiyasi Fita yana gahe ginogalini-yo babiya auhe'ama gibe'u be gi'alika. Au tubulakata hitowamidi, wowona hilifina digo hinauwena be hitauna. Ada gaveyao valeyana hinogalina medema himatauta-ve'ine.

⁷Himiyami bai tohiye kadu vavinena hi'ela tu gavadi moganedi againegilakayemu-ma keke hidahalamaneni. ⁸Bana Fita gigahedi gigayo, “Wanavenuwa'ataku. Yami babi fatana ana tubuga ka'i hidede amine?” Ada badi higayo, “Ika, babi fatana medede amine.”

⁹Au Fita gigahedi gigayo, “Gavana fa'ina omi'e kadu moganemi buye wanuwanuwa vaita Kaiwabu Alu'aluwana againe wanafwaya be wana'itana ka'i fwaya fatana wananhagana o ka'i keke? Wa'ita, badi kaliva moganemi hitauna-ma eda'awaneya hiyemu, ada omi kadu hinanauwemi.”

¹⁰Ada auhe'ama Fita agene hibe'u be hi'alika. Ada tubulakata hiluku be kwamayoku ahe hi'alika-ma hi'itadi, au hiwahidi be hinauwedi moganedi liline hitaudi. ¹¹Ada au tovetumagana moya'aidi himatautave'ine, ada gaveyao moya'aidi valeyadi hinogalina-ma kadu himatautave'ine.

Afositolo aituha fifiwaladi hifaisewadi.

¹²^fTu afositolo aituha fifiwalana kadu abaveyaulowoga moya'aina manuwafo hinafadiya hififaisewadi. Ada badi tovetumagana moya'aidi Solomoni yana abamiyami againe se'eyaine hivagavaga'auta. ¹³Badi manuwafo hihawaveyamumuyedi ada badi keke hidavetumagana-ma himatauta be keke badi tovetumagana buye hidavaga'auta. ¹⁴Himatauta tu tova tova kaliva vevine keke sa'eyadi Kaiwabu againe hivebutu hivetuvetumagana amanadi tovetumagana yadi yo'o agaidiya hiluku.

^d 5:2 Af 4:34-35 ^e 5:3 Yo 13:2 ^f 5:12 Af 14:3

¹⁵ Ada afositolo yadi aituhu fifiwalana fa'ina, kaliva yadi to'aulolo melaleya hisehobuyedi be vaya o sita againe hisedi. Hisehobuyedi be Fita ginabala againe, higa anununa to'aulolo tufoidi ginakibwa'edi be hinayamumu. ¹⁶ ^gKadu yo'o moya'aidi melala Yelusalema awa'awanina agaidiya hitauya, yadi to'aulolo kadu badi wayafunediyo hi'aliyedi. Ada moya'aidi hiyamumu-'owoga.

MiYuda adi tonagona afositolo hikivekoyodi.

¹⁷ ^hTu bana abaveyao ana tofaisewa adi tokaiwabu kadu tobohiyaneyao moya'aidi, higa yo'o tafatafalolodiyao adi egana Sadusi kalivai-dina, badi afositolo agaidiya higa'uma'uma-mo'a. ¹⁸ Ada au hitowamidi hina afositolo hikive'avidi be deli lakahina againe hisedi. ¹⁹⁻²⁰ ⁱDeliya hisedi tu bogi nafone Kaiwabu yana tovenuwa'ata deli ana wanafali giyauna be afositolo gisehobuyedi, ada gigahedi gigayo, "Wanana manuwa-tafalolo lakahina againe wanamidi be hida eda ivaguna, higa yawai-vagata ana eda fa'ina kaliva agaidiya wanagaheye-'owona." ²¹ Au tovenuwa'ata givehimeyedi amine hina, ada mala gilaulauni manuwa-tafalolo againe hiluku hivebutu hivewala.

Tu bana abaveyao ana tofaisewa adi tokaiwabu ahena badi miYuda yadi Koniselo hikovavaga'auhidi, be higa miYuda adi tonagona moya'aidi hivaga'auta-'owoga. Ahe hivaga'auta-yo yadi tuilala deliya hi'iveninisedi be afositolo hina'aliyedi. ²²⁻²³ Tu yadi tuilala hiyemu againe, afositolo deliya hi'l'avadi, ada au Koniselo agaidiya hiywadi ada hivenuwa'atadi higayo, "Deliya ayemu againe, wana hi'aifalidona-ma a'itana, kadu to'itave'avina abaluku againe hi'ita'ita. Tu wana ayauna againe, keke tamo hakwadi deli hinagene gidamiyami." ²⁴ Ada tuilala adi tonagona kadu abaveyao ana tofaisewa kikaiwabudiyao tuilala yadi gahe hinogalini-jo nuwadi gifani, be hinuwanuwa vaita gavaimi gidalakayemu.

²⁵ Hinuwanuwa tu kaliva sa'eyana gi'ela gigahedi gigayo, "Wanogali! Badi kaliva deliya wasedi-ma manuwa-tafalolo lakahina againe himidimidi yo'o hivewala." ²⁶ Au tuilala adi tonagona yana kalivamomo buye hina afositolo hivega'aledi tu keke hidamunudi, fa'ina himatauta ka'i yo'o kuga againe hinafihafihadi.

²⁷ Hiyemu-yo afositolo hilukuwed, Koniselo agaidiya hikivemidididi be abaveyao ana tofaisewa adi tokaiwabu ginavedewayaugidi. ²⁸ ^jBana gigahedi gigayo, "Ime hawata lakahina agaimiya asena, higa hida kaliva ana eganeya keke-mo'a wanavehawala tu hida gavaimi waga? Au yami vehawala wanunauwena be gina Yelusalema giluyabuna. Ada nuwanuwami hida kaliva yana alika ana vita ime agaimeya wanasena."

^g 5:16 Mk 6:56; Af 19:11-12 ^h 5:17 Af 4:1-3 ⁱ 5:19-20 Af 12:7-10 ^j 5:28 Af 4:18-19;
Md 27:25

²⁹Tu Fita kadu afositolo velugadiyao higahedi higayo, “Ime keke kaliva bonana ana'abini, au nagona Yaubada bonana ana'abina. Hidedemi ama vehimeya. ³⁰Bana Yaubada, bwanenedeyao yadi Yaubada, Yesu alikeya gisivemididina, Bana omi ai againe watutuvefosena be hidedemi waluve'alikana. ³¹E, Yaubada gisivemididina be i'atagine gikilakahina, ada Bana'e yada Tovehimeya Lakahina kadu ada Tokibababala gisena. Tokibababala gisena be Bana'e omi miIsileli ginavelugami be amifaiweya wanunuwvilana, ada yami koyona ana aiyawela wanunuhogana. ³²^lAda ime hida gaitoma fa'ina a'awatalatalaina, ime'eyao kadu Alu'aluwa Mahalina buye a'awatalatalaina, Bana'e ma badi gaveyao Yaubada bonana hi'abi'abina, medema agaidiya gihawahegen.” Hidedemi afositolo higahe.

Gameliyela afositolo gilugolegoledi.

³³Tu badi Koniselo hida gahe hinogalini-yo hi'il'a-mo'a be nuwanuwadi afositolo hinaluve'alikadi. ³⁴Tu kaliva sa'eyana Koniselo agaidiya ana egana Gameliyela, badi Falisi yadi yo'o kalivana, Koniselo hinafadiya gitowamidi. Bana Gameliyela higa Moses yana vehimeya ana tovehawala, ada kaliva moy'a-aidi hive'amohimohinena. E, bana gitowamidi givehimeya be afositolo kabu'avane hinasehobuyedi. ³⁵Badi hihobu tu bana Koniselo agaidiya givebutu gilukahihi gigayo, “Omi ide miIsileli, hida kaliva fa'idiya wanunuwanuwa-hagihagi. Ka'i wanaluve'alika-kawowodi digo, medema keke ginalubodani. ³⁶Malamala gavaiyehi kahegedi againe, kaliva sa'eyana gilakayemu, ana egana Tiudasi, ada gigahe vaita bana tonagona lakahina, ada kaliva adi yo'o fowa hanaledi (400) amine himuliyyena. Tu muliya badi gaveyao hiluve'alikana, ada ana tomuliyamomo hi'abinauna be yana vehimeya gihavaina. ³⁷Kadu muliya kabemani adi eganayaudi ana toveya kaliva sa'eyana gilakayemu, ana egana Yudasi kwanaGalili, ada kadu kaliva moy'a-aidi ginuwa'abiyedi. Kadu meda anafaiweya badi gaveyao hiluve'alikana, ada ana tomuliyamomo hi'abinauna be gihavaina. ³⁸Ada adamoya kadu hida kalivai-dina fa'idiya ganagahe. Au wanaki'ilovedi be hinana. Bana Yesu medema yadi tonagona gi'alika-ma fa'ine hivehavehawala. Ka'i yadi vehawala yadi faisewa inubana kaliva agaidiya, au ginahavaina. ³⁹Tu ka'i inubana Yaubada againe, au keke amifaiweya wanahawatadi. Aimo wanahalamanena Yaubada againe walulugaviya.” Hidedemi Gameliyela gigahe be badi Koniselo bonana hivenogalena. ⁴⁰^mAu afositolo hikovadi be hiluku'ela, ada tuilala hivehimeyedi be hilaudi. Hilaudi gihavaina kadu hihawatadi higayo, “Au wanana tu keke-mo'a Yesu ana eganeya wanalaumamala-havagi.”

^k 5:31 Ef 1:20; Hi 12:2 ^l 5:32 Af 1:8 ^m 5:40 Af 4:18

⁴¹ "Tu afositolo Koniselo hihegedi, tu yadi wavemwamwala hina. Hinuwanuwa higa vaita badi yamumudiyo Yaubada matane fa'ina gihawahegedi be Yesu ana egana fa'ina kaliva matadiya wowomumu hinuhagana. ⁴² °Ada au aiyeta sa'eyana sa'eyana Venuwa'ata Yamumuna Yesu Keliso fa'ine hilulumamala kadu hivehavehawala. Manuwa-tafalolo lakahina againe kadu kaliva yadi manuweya hidedemi hinunauwena, keke hida'ilova.

Kaliva adiveseveni hivegidedi be afositolo hinavelugadi.

6 ¹Himiyami tu tova moya'aina Yesu ana tomuliya higa tovetumagana himoyamoya'ai. Himoya'ai tu vekwageya gilakayemu. Sikwasikwa adiga fa'ina hivewageya. Badi miYuda tovetumagana bona Gilika againe hilulukahihi amanadi badi kadu tovetumagana bona Hibeliu againe hilulukahihi-ma hi'alawoluwluyedi, higahegahe vaita malalauga sa'eyana sa'eyana a'a ana folaka againe badi bonadi Gilika ma yadi sikwasikwa kabi'ona amine hivaivaina, tu badi bonadi Hibeliu ma yadi sikwasikwa lakahina amine hivaivaina. ²Hidedemi hi'alawoluwlufa'ina afositolo adivetuwelo tovetumagana moya'aidi hikovavaga'auhidi ada higahedi higayo, "Ka'i ime a'a ana folaka analitave'avina be Yaubada bonana ana laumamala anahegena digo, medema keke gidalubodani. ³Au tobohiyameyao kaliva adiveseveni wanavegidedi, valeyadi ma au haghagina higa Alu'aluwa Mahalina givemagadi kadu tonuwahuya velemon'ena. E, wanavegidedi be hida abavehimeya a'a ana folaka anaveledi. ⁴Tu ime'eyao ma ve'ola kadu laumamala ana faisewa tova moya'aina analita'itave'avina."

⁵ Au tovetumagana yadi yo'o matatabudi afositolo yadi gahe fa'ina nuwadi giyamumu, ada kaliva hivegidedi. Kaliva sa'eyana hivegidenama ana egana Sitiveni, bana yana vetumagana toyogina kadu Alu'aluwa Mahalina againe gimaga-mo'a. Kadu kaliva velugadiyoa hivegidedi-ma adi egana Filifi, Felokolo, Naikena, Timoni, Famenasi, kadu Nikolesi bana kwanaAnidiyoka yo'o tulidiyao kalivana tu miYuda yadi tafalolo againe gidamana be givekwanamiYuda. ⁶°Au hida kalivai-dina afositolo matadiya hisedi be hiv'e'o'oledi, ada nimadi badi agaidiya hisena be faisewai-nadi fa'ina hisevehailedi.

⁷°Ada Yaubada bonana ginauna ada kaliva moya'aidi hinogalina be hivetumaganena. Ada tovetumagana yadi yo'o Yelusalema againe himadumoya'ai, kadu abaveyao ana tofaisewa tufoidi moya'aidi Yesu bonana againe hihawahegedi.

MiYuda adi tonagona Sitiveni hikive'avina.

⁸Tu bana Sitiveni ase'asena Yaubada yana nuwanuwa againe gimaga, kadu tova moya'aina Yaubada yana faiwala againe gimiyami fa'ina

ⁿ 5:41 Md 5:10-12; 1Fi 4:13 ^o 5:42 Af 17:3 ^p 6:6 Af 13:3 ^q 6:7 Af 16:5

aituha fifiwalana kadu abaveyaulowoga lakahina kaliva hinafadiya gififaisewadi. ⁹Tu kaliva tufoidi hivekwageyena, miYuda adi yo'o sa'eyana kalivai-dina. Manuwa-abavehwala ana egana sinagogi againe badi hivavaga'auta, ada manuwai-nadi hivewagana Libetini yadi sinagogi. Ada badi miYudai-dina melala adi egana Sailini kadu Alekisanidiya kaliva. Badi'iyao kadu miYuda Silisiya ada Esiya anafafali kalivai-dina hivebutu Sitiveni buye hivekwavekwageya. ¹⁰Tu Alu'aluwa Mahalina nuwahuya lakahi-mo'ena Sitiveni givelena fa'ina yana laumamala againe hive'amata, keke adifaiweya hinabonalaufata.

¹¹ ^sAu badi miYuda kaliva tufoidi higahekauyedi be hinagahe hinagayo, "Bana wadewama kalivai-nadi anogalina Mosese gihawatagona kadu Yaubada gihawatagona."

¹² Au hidede amine badi miYudai-dina badi yo'o hi'ive'ago'ugadi, ada kaliva lakahidiyao kadu Mosese yana vehimeya ana tovehawala buye hi'ive'ago'ugadi, ada au hina Sitiveni hikive'avina be miYuda yadi Koniselo agaidiya hinauwena. ¹³Sitiveni Koniselo agaidiya hilukuwena, kadu togahe-kawowo buye hilukuwedie be bana fa'ine hifwaya higayo, "Bana hida kaliva tova moya'aina yada manuwa-tafalolo lakahina kadu Mosese yana vehimeya gihawahawavekoyoyena. ¹⁴Ime bonana anogalina, gigahe vaita hida Yesu kwanaNasaledi manuwa-tafalolo lakahina gidayawelina, ada vehimeya moya'aina Mosese yada yo'o tuwaina giveleda-ma gidahawatani be vehimeya velugana againe kanamiyami." Hidedemi togahe-kawowo higahe. ¹⁵Ada kaliva moya'aidi samuba hinagene bana Sitiveni hi'itakwanekwanena, ada magigina mahamahali-mo'ena hi'itana vaita lobama ana tovenuwa'ata ana bela amine.

**Sitiveni miYuda yadi Koniselo givebutu gilumamaledi.
Nagona Abelahamo kahihina gilukahihiyena.**

7 ¹Tu abaveyao ana tofaisewa adi tokaiwabu Sitiveni againe gitoliluvaluva gigayo, "Ka'i badi tohawavemogatala higahe amine uhuluva?"

²Bana Sitiveni givebutu gilumamaledi gigayo, "Tobohiyakweyao kamakweyao, yaku gahe wanalogalina. Tuwai-mo'ena Yaubada Tokaiwabu-mo'a bwaneneda Abelahamo gilakayemaunina, bana babi ana egana lakahina Mesofotemiya againe gimiyami tu aimo keke gidana melala ana egana Helani againe gidamiyavehaila ana toveya. ³E, Yaubada bana againe gilakayemu gigahena gigayo, A yo'o kadu ya babi unanuyabuyabudi, ada babi sa'eyana aimo ganahawavemogatalena amanadi againe unana. ⁴Ada Yaubada hidemedi gigahe-yo Abelahamo

^r 6:10 Lu 21:15 ^s 6:11 Md 26:60-61 ^t 7:2 Aba 12:1-5

gilowogafafali ana egana Kalidiya gihegena, ada bana tamana buye hina Helani againe himiyami. Himiyami tu tamana gi'aliaka, ada muliya Yaubada hida babi kamimiyami againe gi'iveninisena be gi'ela. ⁵ "Hida babi againe gi'ela tu keke babi ma'ita gidaveleni be vaita gidagahe gidagayo, Hidevama yaku babi, keke-mo'a. Keke gidaveleni tu giwonadabedabena gigayo, Hida babi Iya ganavele, o'eni kadu tova mulina a unumamomo hinatubuyemu amanadi ganaveledi. Ada hidedemi Yaubada giwonadabadaba ana toveya Abelahamo natuna keke. ⁶ "Kadu Yaubada gigahena gigayo, Aimo tova mulina a unumamomo babi tulina yuwa lauveya hinamiyami, ada medede againe yadi tovehimeya agaidiya hinave'agetoga be hinaluluya'aya'alidi, ada hidedemi hinanunauwena malamala fowa hanaledi (400). ⁷ Tu badi yo'o hinave'agetogedi be hinakivekoyodi-ma matahiwadi Iya nimakuya hinavaina, ada tova mulina a yo'o meda babi-nadi hinanuyabuyabuna, ada hida babi againe hina'ela be hinahawadavadavaku. Hidedemi Yaubada Abelahamo againe gigahe. ⁸ "Ada muliya Yaubada yanaveyao Abelahamo againe gisena, ada givehimeyena be bana'e kadu ana unumamomo iya'iyaya wowodiya hinatomogolohina, higa yanaveyao ana iya'iyaya. Ada Abelahamo Aisake gi'ivetubugina, ada ana aiyeta eita givaidi-yo iya'iyayai-nadi wowone gitomogolohina. Meda anafaiweya Aisake natuna Yakobu wowone gitomogolohina, kadu Yakobu natuneyao kaliva tuwelo wowodiya gitomogolohina, badi bwanenedeyao kikaiwabudiyao.

Kadu Yosefa kahihina.

⁹⁻¹⁰ ^xTu badi bwanenedeyao kikaiwabudiyao tobohiyadi Yosefa againe higa'uma'uma fa'ina, kaliva agaidiya hikimonevedamanena be hinawena Idifita againe ginave'agetoga. Tu Yaubada bana againe gimiyami, ada ana vita moya'aina agaidiya gilugolegolena. E, nuwahuya kadu gakalikalivalakata Felo miIdifita yadi tokaiwabu matane givelena, ada au Felo miIdifita moya'aidi yadi tovehimeya Yosefa gisena, kadu yana manuwa hinagena moya'aidi agaidiya abavehimeya givelena.

¹¹ ^yAbavehimeya givaini-yo loka gilakayemu, Idifita Kenani giluyabudi ada moya'aidi vita lakahina hinuhagana. Badi bwanenedeyao adiga keke. ¹² ^zHimihami tu Yakobu a'Idifita againe gidauda-ma valeyana ginogalini-yo, natuneyao higa bwanenedeyao medede againe gi'iveninisedi, ada hidevama yadina nagona againe taidi hifaniyena. ¹³ ^aAda muliya yadina anavelu againe bana Yosefa tobohiyaneyao agaidiya gi'ivemogatalina higa bana tobohiyadi, ada bana Felo Yosefa ana unuma valeyadi ginogalina. ¹⁴ Au Yosefa tamana Yakobu againe

^u 7:5 Aba 17:8 ^v 7:6 Aba 15:13-14; Yem 3:12 ^w 7:8 Aba 17:9-11^x ^{7:9-10} Aba 37:11,28, 39:23, 41:37-44 ^y 7:11 Aba 41:54 ^z 7:12 Aba 42:1-5 ^a 7:13 Aba 45:1-11

venuwa'ata gi'iveninisena be higa bana'e kadu ana unuma matatabudi Idifita againe hina'ela hinamiyavehaila. Ada ana unuma adi kilagalaga seveniti-faifi (75). ¹⁵^bAda au Yakobu Idifita againe gina gimiyavehaila ana unuma buye'i, ada medede againe bana'e kadu natuneyao higa bwanenedeyao hi'alika. ¹⁶^cMa wowodi yadi melala ana egana Sekemu againe hiywedi ada tomohuyehuyeya hihuyadi, tomohuyahuyai-nadi ma tuwai-mo'ena Abelahamo yo'o adi egana Hemo agaidiya mani againe gikimonena.

Kadu Mosesekahihina.

¹⁷^dMalamala a gavaiyehi hihegedi tu Yaubada yana wonadabadaba ana tova gilurveda'ufu, higa tuwaina Abelahamo againe giwonadabadaba be hida babi ana unumamomo ginaveledi. Ada wonadabadaba ana tovai-nadi gilurveda'ufu againe, yada yo'o Idifita againe himoya'ai. ¹⁸Himoyamoya'ai himoyamoya'ai hinunauwena tu kini velugana Idifita againe givebutu givehimeya, tu Yosefa tuwaina gi'alika-ma keke gidahalamenaneni. ¹⁹^eBana yada yo'o gilololodi lakahina, ada bwanenedeyao giluya'aya'alidi. Givehimeyedi be yadi fwefweya ivagudiyao kabu'avane hinahegedi ada hina'alika fa'ina.

²⁰^fAda hida vehimeya ana toveya Mosesekahihina gitubuga fwefweya tomo'aiwaka Yaubada matane. Ada vaikohi tohiye agaidiya hinana manuwuya himiyamiatagona. ²¹Vaikohi tohiye gihavaidi-yo hisebobuyenabe kabu'avane hiseni tu Felo natuna kwamayoku ginuhagana be gisilakahina, ada gifayayena be vaita tauna natuna amine. ²²Ada mildifita yadi nuwahuya moya'aina gisikuluye-'owona, ada yana gahe againe kadu yana gugai againe givekalivalakata.

²³^gTu Mosesekahihina malamala foti (40) givaidi againe, nuwanuwana yana yo'o miIsileli gina'itadi. ²⁴Au badi agaidiya gihobu ada kwanaIdifita sa'eyana gi'itana kwanaIsileli gimunumununa. Au gimadu gilugolegolena, ada kwanaIdifita nimana gifatana, ada gimunumunukoyokoyona tu gi'alika. ²⁵Bana Mosesekahihina vaita tauna yana yo'o hidahalamenaneni Yaubada bana Mosesekahihina nimane gidalugolegoledi, tu badi keke hidahalamenaneni. ²⁶Au tova anavelu miIsileli adi'iselu buye hive'afwaiki-ma gi'itadi, ada nuwanuwana hina'ilova be hinaveyao fa'ina gigahedi gigayo, Omi kaliva wanogali! Omi watobohiyamiyao. Gavadi-yo taumiyo wave'akivekoyo?

²⁷Tu bana kaliva sa'eyana tobohiyana gikikivekoyona-ma Mosesekahihina gi'atuhegena gigahena gigayo, O hakwadi giseni-yo higa vaita unavehimeyema unavedewayaugima? ²⁸Ka'i o nuwanuwana iya

^b 7:15 Aba 46:1-7, 49:33 ^c 7:16 Aba 33:19 ^d 7:17 Yem 1:7-8 ^e 7:19 Yem 1:10-22

^f 7:20 Yem 2:1-10 ^g 7:23 Yem 2:11-15,21-22

unaluve'alikaku, boiyesedi kwanaIdifita uluve'alikana amine? ²⁹ Ada Mosese kwanaIsileli yana gahe ginogalini-yo Idifita gi'otayabuyabuna, ada gina babi ana egana Midiyani againe givekwanahawahawala. Ada medede againe ginagi be kaliva luhei gi'ivetubugidi.

MiIsiledi adi lugolagola Mosese nimane kahihina.

³⁰^h Malamala foti (40) gihegedi tu tova sa'eyana babigaga againe oya Sainai liline gimiyami tu lobama ana tovenuwa'ata bana againe gilakayemu. Ai kabi'ona sa'eyana giyabela-vagata ada noya'aina againe tovenuwa'ata gilakayemu. ³¹⁻³² Ada Mosese hida aituha gi'itana againe nuwana givegafo'uya'uya, au gina ai kabi'ona giyabela-vagata gida'ita-hagihagiyena ma Kaiwabu agona ginogalina gigayo, Iya'eku bwanenemomo Abelahamo Aisake Yakobu yadi Yaubada. Au gigahe-yo Mosese givebutu givetavetatava gimatautave'ine fa'ina keke anafaiweya gida'ita-mo'eni.

³³ Bana Kaiwabu gigahena gigayo, Iya hidedei gamimiyami fa'ina abageya umidimidi-ma babi hawahawatana. Au a ageyafayafa uyau be useni. Hida babi hawahawatana, keke unakivebwaneneni. ³⁴ MiIdifita yaku yo'o kalivai-dina himunumunukoyokoyodi-ma Iya makewa ga'itana. MiIsileli yadi tagiya a ganogalina ada gahobu'ela be ganalugolegoledi fa'ina. Au umidi, Idifita againe gana'iveninise be unana." Hidedemi Kaiwabu gigahe ada bana Sitiveni giyakahina.

³⁵ Kadu Sitiveni yana laumamala ginauwena gigayo, "Tu bana hidevama Mosese ma badi miIsileli hikilowena fa'ina higahena higayo, O hakwadi giseni-yo higa vaita unavehimeyema unavedewayaugima? E, bana'e ma Yaubada Tauna gi'iveninisena be ginavehimeyedi ada ginalugolegoledi. Au lobama ana tovenuwa'ata awane givegidena, bana ai giyabela-vagata hinagene Mosese againe gilakayemu amanadi. ³⁶ⁱ Ada au bana'e miIsileli Idifita againe givega'auledi. Aituha fifiwalana kadu abaveyaulowoga Idifita againe ada Lehaga Yabeyabelina againe gifaisewadi be givega'auledi, ada babigaga againe hinunudadana-ma yana aituha fifiwalana ginunauwena malamala foti (40) agaidya.

³⁷^j Kadu'e bana hidevama Mosese-nadi miIsileli gigahe-vagahidi gigayo, Aimo tova mulina Yaubada bonana ana to'awatalatalaina sa'eyana omi yami yo'o hinafamiya ginakivemididina. Iya gakivetuvetunumi amine, meda bana ginakivetuvetunumi. Hidemi Mosese yana gahe. ³⁸^k Kadu bana Mosese ma babigaga againe miIsileli buye hivaga'auta. E, bana'e bwanenedeyao buye himiyami, ada oya Sainai againe gilaka lobama ana tovenuwa'ata buye hilukahihi, ada Yaubada bonana miyamiya-vagahina ginogalina be ide agaideya ginasedamanena fa'ina.

^h 7:30 Yem 3:1-10 ⁱ 7:36 Yem 7:3, 14:21; Ail 14:33 ^j 7:37 2Veh 18:15 ^k 7:38 Yem 19:3; 2Veh 9:10

MiIsileli yadi kilumina ana hawadavadava kahihina.

³⁹ ^lTu bwanenedeyao hidibutoyoga keke bonana hida'abini, au bana hikilowena be nuwahinagediya hinuwanuwa vaita Idifita againe hinayewadi. ⁴⁰ ^mHidedemi hinuwanuwa fa'ina Mosese tobohiyana Eloni againe higahe higayo, Kilumina yada viviluwa unabubudi be hinanagoyeda. Bana hidevama kaliva Mosese ma Idifita againe givega'aleda amanadi bana hami gina? Keke kadahalamaneni.

⁴¹ Hidedemi bwanenedeyao higahe tu kilumina ana ita vaita bulumakau natudi amine hibubuna, ada kevakeva yadi abaveyao fa'ina hikabudi be kilumina hihawadavadavana. Kadu avemwamwala lakahina hisena be nimadi yana aibubuna hinahawaveyamuyena fa'ina. ⁴² ⁿTu Yaubada givekwaulaugedi ada gihegedi be ibadibadi lobameya hinahawadavadavadi. Ada au hihuluva Yaubada bonana ana to'awatalatalaina yadi buki againe to'awatalatalaina sa'eyana gigahe amine gigayo,

Omi miIsileli, malamala foti (40) babigaga againe wamiyami ana toveya, keke Iya fa'ikuya kevakeva wadamunudi, keke abaveyao wadakabuni be wanahawadavadavaku fa'ina, keke-mo'a. ⁴³ Au omi mene kilumina wabubudi be higa wanahawadavadavadi. Viviluwa sa'eyana ana egana Moloki, keke Iya fa'ikuya tu bana fa'ine falai wa'ava'avaladadanena. Kadu ikilukiluma vaita badibadi amine wakilakahina, medema yami viviluwa ana egana Lefani yana gaitoma. Au yami ikilukiluma wahawadavadavadi fa'ina, ganawavimi be yuwa wanana lauveya, melala Babiloni yuwafafaline wanavehawahawala."

Au hidedemi Yaubada yana to'awatalatalaina awane miIsileli agaidiya gigahe ma Sitiveni guyakahina.

Yaubada yana abamiyami kahihina.

⁴⁴ ^oKadu Sitiveni yana laumamala ginunauwena gigayo, "Falai lakahina, Yaubada yana abamiyami, bwanenedeyao agaidiya babigaga againe gidauda, ada medema falai-nadi Yaubada yana miyami ana aituha yana yo'o hinafadiya. Ada Yaubada Mosese givehimyena be gihawavetuvetununa amine falai-nadi hibubuna. ⁴⁵ ^pHimiyami tu muliya bwanenedeyao falai-nadi Yaubada yana abamiyami natudiyao agaidiya hisedamanena. Ada Mosese ana hilafa bana Yosuwa bwanenedeyao ginagoyedi be hida babi yo'o tulidiyao nimadiya hilemedi. E, Yaubada yo'o tulidiyao givenegadi be miIsileli yadi babi hilemedi, ada hina hiluku ana toveya falai-nadi kadu hinauwena be hida babi againe

^l 7:39 Ail 14:3 ^m 7:40 Yem 32:1-6 ⁿ 7:42 Emo 5:25-27 ^o 7:44 Yem 25:9
^p 7:45 Yos 4:11, 18:1, 23:9

hikivemididina, ada au gidauda gidauda ginunauwena tokaiwabu Devida yana toveya.⁴⁶^qBana Devida ase'asena yamumuna Yaubada matane fa'ina Yaubada gihawaveyamumuyena, ada bana Devida give'o'ola gigayo, O'eni Yakobu bwanenema lakahina yana Yaubada. Iya nuwanuwaku ya abamiyami ganayogona fa'ina udahawahegeku be gadayogona.⁴⁷^rHidedemi Devida gigahe tu bana keke gidayogoni, au natuna Solomoni Yaubada yana manuwa giyogona.

⁴⁸^sTu Yaubada Getane-mo'ane keke velemo'ena kaliva manuwa hiyogona-ma agaidiya gidamiyami, keke. Hidema fa'ina Yaubada bonana ana to'awatalatalaina sa'eyana awane tuwai-mo'ena gigahe gigayo,

⁴⁹ Iya'eku Yaubada Kaiwabu.

Lobama yaku didiga'u'u, babi ageku ana abasewadi,
au lobameya kadu babiya gavehivehimeya.

Gavaiya'amine manuwa Iya fa'ikuya wanayogoni?

Gava abamiyami wanabubuni-ma akufata?

⁵⁰ Au keke amifaiweya, fa'ina hida lobama be babi ana gaitoma
moya'aina Iya Tauku nimakuya gabubuna."

Hidedemi Yaubada yana to'awatalatalaina awane gigahe, ada bana Sitiveni giyakahina.

Sitiveni miYuda yadi Koniselo yadi dibutoyoga fa'ina gidakeyedi.

⁵¹Kadu Sitiveni miYuda yadi Koniselo agaidiya gigahe gigayo, "Omi tagami kuluna. Badi kaliva-kawowo Yaubada keke hidavetumaganeni, meda anafaiweya omi'lyao. Keke nuwanuwami Yaubada bonana wananolalini, kadu keke nuwanuwami Bana'e nuwami gina'aiyauga. Bwanenemiyao hihuluva amine, meda anafaiweya omi wahuluhuluva. Tova moya'aina Alu'aluwa Mahalina wadibudibutoyogena.⁵²^uBwanenemiyao Yaubada bonana ana to'awatalatalaina moya'aidi hikivekoyo'-owodi, keke tamo hakwadi againe hidahuluva hagihagina. Au badi to'awatalatalaina Yaubada yana Kaliva Mahamahalina yana hobu'ela fa'ina higaheye-vagahina amanadi hiluve'alikadi, ada tova adamoya ahe gihobu'ela-yo nibaineyao agaidiya wahawavemogatalena be au waluve'alikana.⁵³^vTuwai-mo'ena omi yami yo'lo agaimiya Yaubada yana tovenuwa'ata gi'iveninisedi be hihobu'ela, yana vehimeya bwanenemiyao giveledi ada omi agaimiya hisedamanena. Omi vehimeyai-nadi wavaina tu keke wada'itave'avini." Au hidedei Sitiveni yana laumamala giluyabuna.

Sitiveni hitutuve'alikana.

⁵⁴Tu badi Koniselo Sitiveni hida yana gahe hinogalini-yo hi'il'a-a-manimanini gadodi hi'alamuhumuhuna.⁵⁵ Tu Alu'aluwa Mahalina bana

^q 7:46 2Sam 7:1-2 ^r 7:47 1Kin 6:1,14 ^s 7:48 Ais 66:1-2 ^t 7:51 Yem 32:9

^u 7:52 2Kah 36:16 ^v 7:53 Af 7:38; Hi 2:2

Sitiveni giluvaiyena ada lobameya gi'italele, au Yaubada yana mahalina ve'akinamanamalina gi'itana, kadu Yesu Yaubada i'atagine gimidimidi-ma gi'itana. ⁵⁶^wAu gigahe gigayo, "Wa'ita! Lobama gi'ayavalina-ma ga'itana, kadu Bana Tohobu'ela Yaubada i'atagine gimidimidi-ma ga'itana."

⁵⁷⁻⁵⁸^xHidedemi gigahe-yo hivebutu hikova'awafatafata, ada tagadi nimadiya hikibodani tu moya'aidi bana againe se'eyaine himadu, hituwamadumadugena digo hihobuyena melala kabu'avane be hivebutu hitutuve'alikana. Ada to'aifihaga higa togahe adi aikeva hivehalilina be kwanatubulakahina sa'eyana ana egana Saulo againe hisena be gina'itave'avina. Saulo ana egana velugana Folo.

⁵⁹^yAda badi kabala againe hi'i'ifihaga tu bana Sitiveni Kaiwabu againe gitagivedadaga gigayo, "Kaiwabu Yesu, alu'aluwaku unavaina."

⁶⁰^zHidedemi gigahe-yo tugana give'etodonena ada gikova agona lakahina gigayo, "Kaiwabu, hida yadi koyona fa'ina keke badi agaidiya unalaufata." Hidedemi gigahe-yo yawaina gihavaina. Ada au bana Saulo badi Sitiveni hitutuve'alikana-ma gihawaveyamumuyedi.

Saulo tovetumagana gikivekoyodi.

8 ¹^aTu medema tovai-nadi kaliva hivebutu tovetumagana adi yo'o Yelusalema againe hikivekoyodi be tagiya lakahina hinuhagana. Hikivekoyodi fa'ina tovetumagana moya'aidi hi'ota tu afositolo gagana himiya. Hi'ota ada Yudiya Sameliya adifafali moya'aina agaidiya hi'abinauna. ²Tu kaliva tufoidi tafatatalolodiyao Sitiveni hitauna, ada bana fa'ine hive'alulaukuhi lakahina. ³^bTu bana Saulo givebutu tovetumagana adi yo'o giluyaweyawelidi. Au manuwa sa'eyana sa'eyana agaidiya ginunuwaliliuga, tovetumagana kaliva vevine gitaitaidi be ginunauwedi deliya giseusedi.

Filifi Yesu bonana Sameliya againe gilumamalena.

⁴Tu badi tovetumagana hi'abinauna-ma gavafafali moya'aina agaidiya hina, medede againe Yesu Keliso bonana hilumamalena. ⁵Bana Filifi melala ana egana Sameliya againe gina, ada miSameliya agaidiya Keliso fa'ine gilumamala. ⁶Ada yo'o lakahina yana laumamala hinogalina kadu yana aituha fifiwaladi gifaisewadi-ma hi'itana, ada au moya'aidi bonana hinogali-hagihagiyena. ⁷^cMoya'aidi wayafunedyao hiyamumu. Yafune hikova'awafatafata tu hiyemu. Kadu tovefela moya'aidi kadu badi walogidi gi'a'uwa-vagahina amanadi hiyamumu. ⁸Hidedemi moya'aidi hiyamumu fa'ina, miSameliya hivemwamwala lakahina.

^w 7:56 Kl 3:1 ^x 7:57-58 Af 22:20 ^y 7:59 Lu 23:46 ^z 7:60 Lu 23:34 ^a 8:1 Af 11:19

^b 8:3 Af 9:1-2, 26:9-11 ^c 8:7 Md 10:1; Mk 16:17

Tokwelikweli ana egana Saimoni kahihina.

9-10 Tu medema melalai-nadi againe kaliva sa'eyana gimiyami, ana egana Saimoni, ada boi tuwaina givebutu tokwelikweli yadi faisewa gi'abi'abina, ada au hida yana faisewa againe miSameliya moya'aidi gi'iveyaulowogidi. Gigahe vaita bana kaliva kikaiwabuna, ada kaliva moya'aidi, lakahidiyao kadu kabi'odiyao, yana gahe hinogali-hagihagiyena. E, higahe higayo, “Bana hida kalivai-nadi vaita Yaubada amine, higa ana egana Tofaiwala-mo'a.” 11 Ada aituha fifiwalana yana kwelikweli againe gififaisewana be gi'iveyaulowogidi, ada hidedemi ahe ginunauwena lauva tunugina fa'ina moya'aidi ginuwa'abiyedi.

12 Tu Filifi Venuwa'ata Yamumuna Yaubada yana yo'o ana luku fa'ina gilukahihiyena, kadu Yesu Keliso ana egana fa'ina badi agaidiya gilumamalena, ada yana laumamala hivetumaganena. Hivetumaganenyo hibafitaiso, kaliva kadu vevine. 13 Kadu bana Saimoni tauna Yesu againe givetumagana ada gibafitaiso. Gibafitaiso-yo Filifi buye buye tu ginunauwena tova moya'aina, ada yana aituha fifiwalana kadu yana abaveyaulowoga lakahina gi'itadi againe, bana kadu nuwana givegafo'uya'uya.

14 Tu afositolo Yelusalema againe miSameliya valeyadi hinogalina, higa Yaubada bonana hi'idibumuhibigena. Hinogalini-yo Fita Yoni badi agaidiya hi'iveninisedi. 15 Ada ahe hiyemu againe tovetumagana fa'idiya hive'o'ola be higa Alu'aluwa Mahalina badi hinavaina. 16 Bana Alu'aluwa Mahalina higa aimo keke tamo hakwadi badi agaidiya gidaluvaiyeni. Au Yesu ana eganeya ahe hibafitaiso tu Alu'aluwa Mahalina aimo keke badi agaidiya gidahobu. 17^d Ada Fita Yoni hiyemu againe, nimadi badi tovetumagana agaidiya hisena, au Alu'aluwa Mahalina giluvaiyedi.

18-19 Tu bana Saimoni gilulauboda. Afositolo nimadi badi tovetumagana agaidiya hiseni-yo Yaubada Alu'aluwa Mahalina badi agaidiya gihawahegena. Hidedemi Saimoni gi'itana againe, mani gitunena Fita Yoni agaidiya ada gigahedi gigayo, “Hida faiwala iya kadu unaveleku be badi gaveyao agaidiya nimaku ganasena, medema Alu'aluwa Mahalina hinavaina.”

20 Tu Fita gigahena gigayo, “Taumadi! Makewa ounuwanuwa vaita Yaubada yana abahawahega mani againe afaiweya unakimonena fa'ina Yaubada o ginaluyaweli, kadu ya mani buye ginaluyawelina. 21 Ya nuwanuwa keke tunutunugina Yaubada matane fa'ina, keke afaiweya hida Yaubada yana faisewa ime buye kanafaisewa. 22^e Au unanuwavilana be hida ya nuwanuwa higa koyona lakahina unavenikohiyena, ada Kaiwabu againe unave'o'ola be ka'i ya nuwanuwa koyo-mo'ena ginayawelina.

^d 8:17 Af 9:17, 19:6; 2Ti 1:6 ^e 8:22 Af 2:38

²³ Au ya nuwahinage ahe gahalamanena. Ase'ase italauvadiga againe gimaga ada nuwanuwai-nadi ase'ase gikivekoyona. Ya nuwanuwa koyona gikive'avi be yogoyogoni umimiyami." Hidedemi Fita gigahe.

²⁴ Ada bana Saimoni badi Fita Yoni agaidiya gigahe gigayo, "Omi Kaiwabu againe iya fa'ikuya wadave'o'ola be hida gaitoma koyona wagaheyena-ma keke agaikuya ginalakayemu."

²⁵ Tu Fita Yoni Kaiwabu bonana ahe hilumamalena kadu gavadi gavadi taudiyao agaidiya hi'ayaunena-ma ahe hi'awatalatalaineni-^{yo} au Yelusalema againe hiywadi. Ada yadina againe melala moy'a'ina Sameliya anafafaliy Venuwa'ata Yamumuna hilumamalenauwena.

Filifi kwanaIdiyofiya edeya gimaduhagana.

²⁶ Badi hina tu Kaiwabu yana tovenuwa'ata sa'eyana Filifi againe gi'ela gigahena gigayo, "Unakidewadewa be unallowoga. Gava unahobu eda Yelusalema Gasa hinafane ginauna-ma amine unana. Higa hida eda tuwaina babigaga hinafane ginauna." ^{27f}Au Filifi gikidewadewa be gilowoga. Ginauna tu kaliva lakahina sa'eyana edeya gimaduhagana, kwanaIdiyofiya, ada bana tovehimeya lakahina, badi Kanidesi mildiyofiya yadi kwini yadi mani matatabuna gi'ita'itave'avina. Ada hida kalivai-nadi Yelusalema againe a gina be Yaubada ginahawadavavana fa'ina. ²⁸Gina be giyewayewana tu yana waka abalautaina againe gihiyoto tu Yaubada bonana ana to'awatalatalaina ana egana Aiseya yana buki againe gihawahawa. ^{29g}Bana ginauna tu Alu'aluwa Mahalina Filifi againe gigahe gigayo, "Unana yuwa waka abalautaina liline unanudadana."

Filifi kwana Idiyofiya Yesu fa'ine gikivetuvetununa.

³⁰ Au Filifi waka againe gimaduna ada kaliva agona ginogalina, to'awatalatalaina Aiseya yana buki againe gihawahawa. Au gitolilueluvena gigayo, "Medema uhawahawana-ma ka'i ana nuwanuwa uhalamanena?"

³¹ Bana kwanaIdiyofiya gigayo, "Gavaiya'amine akufaiweya ganahalamaneni, fa'ina aku tokivetuvetunu keke." Ada au Filifi againe gigahe gigayo, "Ulaka'ela be wakeya buye kanana." Ada au giyage.

^{32h}Ada Yaubada bonana Veyao Tuwaina ana bukiya gihawahawana-ma ana maita hidedemi gigahe gigayo,

Sifi hinauwena be hinayogona amine, bana'e hinauwena.

Sifi kabi'ona ana to'aikeya matane keke ginakwage amine, meda bana keke tamo bonalaufata gidagaheye.

³³ Hikivewowomumuna ada keke tamо gavadi koyona

^f 8:27 Ais 56:3-7 ^g 8:29 Af 10:19 ^h 8:32 Ais 53:7-8

gidafaisewani tu, au ai'adi hiluve'alikana.

Yana miyami babiya himadudabana fa'ina,

keke tamo hakwadi ana unumamomo fa'lidiya ginalukahihi,
fa'ina ana unumamomo keke.

Au hidedemi Aiseya gigahe-ma kwanaIdiyofiya gihawahawa.

³⁴Tu kwanaIdiyofiya Filifi againe gigahe gigayo, “Au unakivetuvetunuku. Hakwadi fa'ine to'awatalatalaina hidedemi gilukahihi, ka'i tauna fa'ine o ka'i mali kaliva fa'ine?” ³⁵Ada bana Filifi givebutu medema Yaubada bonanai-nadi gihawana-ma fa'ina gikivetuvetununa, ada higa Venuwa'ata Yamumuna Yesu fa'ine bana againe gilukahihiyena.

³⁶Ada edeya hinauna tu ni'u sa'eyana againe hiyemu, ada bana kwanaIdiyofiya gigahe gigayo, “Mene u'ita ni'u gidadauda. Nuwanuwaku ganabafitaiso. Ka'i tamo gavadi fa'ina unahawataku be keke akufaiweya ganabafitaiso?” ^[37]Filifi gigahena gigayo, “Ka'i velemo'ena uhawahege be Yesu Keliso againe uvetumagana, au afaiweya unabafitaiso.” Ada bana gigayo, “Yesu Keliso velemo'ena Yaubada Natuna ma gavetumaganena.”]

³⁸Ada au yana waka ana tovemadu givehimeyena be ginave'ilovenia. Give'iloveni-yo badi adi'iselu Filifi kadu kwanaIdiyofiya ni'u againe hihobu be Filifi gikivebaftaisoyena. ³⁹Gikivebaftaisoyena gihavaina hilaka avaleya, ada auhe'ama Kaiwabu Alu'aluwana Filifi mali fafaliya gimaduvedamanena. Tu bana kwanaIdiyofiya Filifi keke gida'ita-havagileni tu yana wavemwamwala a ginanauna. ⁴⁰ⁱAda au Kaiwabu Alu'aluwana Filifi ginuvedamanena ada auhe'ama melala ana egana Asodo againe gilakayemu. Medede againe givebutu melala moy'a'aina agaidiya ginauna, Venuwa'ata Yamumuna gilulumamalena ginunauwena tu Sisaliya againe giyemu.

Saulo, muliya ana egana Folo ma givebutu Yesu againe givetumagana.

Afositolo 22:6-16, 26:12-18

9 ^{1-2^j}Tu Saulo badi kaliva vevine Kaiwabu Yesu againe hivetuvetumagana amanadi aimo gikikivekoyodi, nuwanuwana ginaluve'alikadi. Au abaveyao ana tofaisewa adi tokaiwabu againe gina give'o'ola be leta gina'etoladina, ada manuwa-abavehawala sinagogi moy'a'aina Damasiko melala againe ginanauwena. Badi sinagogi adi tonagona leta hina'itani-yo Saulo ana vehimeya hinahalamanena, higa badi gaveyao Kaiwabu yana edeya hinunudadana, ka'i kaliva o ka'i vevine, medema ginakive'avidi be Yelusalema againe ginanauwedi. ³Au gilowoga Damasiko againe ginauna tu melala-mo'ena liline gidayemu ma auhe'ama mahalina lobameya give'akinamanamalena, Saulo

ⁱ 8:40 Af 21:8 ^j 9:1-2 Af 8:3

ginauna againe gituvemahali-'owona. ⁴ Ada bana babiya gibe'u tu tamo hakwadi agona ginogalina gigahena gigayo, "Saulo, Saulo! Gavana fa'ina ukikivekoyoku?"

⁵ Bana Saulo gigayo, "Kaiwabu, O hakwa'adi?"

Kadu agona ginogalina gigayo, "Iya'eku Yesu, ada Iya ukikivekoyoku. ⁶ Au umidi melala againe unaluku, ada mededei tamo hakwadi gavadi unagani ma ginavenuwa'ata."

⁷ Tu badi kaliva Saulo hibwa'ulina-ma himididi-vagata, meyadi gibou. Agona hinogalina tu keke tamo hakwadi hida'itani. ⁸ Ada au Saulo gimidi matana gi'aleleyena tu keke tamo gavadi anafaiweya gida'itani, au matana gikoyo-mo'a. Au nimane hi'abina be Damasiko againe hinauwena. ⁹ Ada aiyeta tohiye agaidiya givematakoyo, ada keke tamo gavadi gida'u'ani o ka'i gidayuyuni.

Kaiwabu Ananaiyasi Saulo againe gi'iveninisena.

¹⁰ Tu tovetumagana sa'eyana Damasiko againe gimiyami, ana egana Ananaiyasi. Bana gi'eno'ita ada yana ita againe Kaiwabu bana ana egana gikovana gigayo, "Ananaiyasi."

Ada bana gigayo, "Kaiwabu, we'a."

¹¹ Au Kaiwabu gigahena gigayo, "Umidi be eda ana egana Eda Tunutunugina againe unana kaliva sa'eyana unalelena, ana egana Saulo kwanaTasasi. Au bana Yudasi yana manuweya gimimiyami, ada tova adamoya give'ove'o'ola. ¹² Ada yana eno'ita againe kaliva sa'eyana gi'itana, ana egana Ananaiyasi, higa vaita bana againe uda'ela nima udasena be matana ginayamumu fa'ina."

¹³ Bana Ananaiyasi gigayo, "Kaiwabu, hida kaliva fa'ine moy'a'aidi hivenua'ataku higa ya kalivamomo Yelusalema againe gikivekoyodi keke kabi'ona. ¹⁴ Ada bana hide'i Damasiko againe gi'ela fa'ina abaveyao ana tofaisewa kikaiwabudiyao ana vehimeya hivelena be moy'a'aima a egana ayakayakahina-ma ginakive'avima be ginanauwema."

¹⁵ ¹Tu Kaiwabu gigahena gigayo, "Au unana. Hida kalivai-nadi gavegidena be Iya fa'ikuya ginafaisewa. E, gavegidena be yo'o tulidiyao yadi kini buye agaidiya kadu miIsileli agaidiya aku egana ginakilakahina ada hinahalamaneku fa'ina. ¹⁶ ^mKadu aku egana ginakilakahina fa'ina, vita lakahina ginanuhagana ma Iya Tauku ganavehawalena."

¹⁷ Au Kaiwabu hidedemi gigahe fa'ina, Ananaiyasi gina Saulo gimiyami manuwai-nadi againe giluku ada nimana Saulo againe gisena gigayo, "Tobohiyaku Saulo, Kaiwabu Yesu boi edeya unauna tu Tauna o againiya gi'livemogatalina-ma Kalivai-nadi gi'iveniniseku be mata gina'italele ada Alu'aluwa Mahalina o ginaluvaiye fa'ina." ¹⁸ Gigahe-yo auhe'ama

^k 9:5 Af 5:39 ^l 9:15 Af 25:23; Lo 1:5 ^m 9:16 2Ko 11:23-28

gaitoma sa'eyana vaita igana kwanavina amine Saulo matane gibe'u, ada anafaiweya gi'ita'italele. Au gitowamidi ada gibafitaiso. ¹⁹ Ada a'a gi'aniyo yana faiwala kadu giyemu.

Saulo Damasiko againe gilumamala.

²⁰ Tu tovetumagana Damasiko againe badi agaidiya Saulo gimiyyami aiyeta tufona. Ada sinagogi agaidiya gimaduluku givebutu Yesu fa'ine gilulumamala, au gigahedi gigayo, "Bana Yesu ma Yaubada Natuna." ²¹ ⁿAda gaveyao moy'aidi yana laumamala hinogalina-ma hiyaulowoga, au hivebutu buye hive'agahegahe higayo, "Taumadi! Bana hidema kalivai-nadi badi gaveyao Yesu ana egana hiyakayakahina-ma Yelusalema againe gikikivekoyodi keke kabi'ona. Kadu meda anafaiweya yana inubai-nadi fa'ina hidedei gi'ela, higa Yesu yana kaliva ide agaideya ginakive'avidi be abaveyao ana tofaisewa kikaiwabudiyao agaidiya ginanauwedi. Au makewa hidedemi yana inuba." ²² ^oBadi higahegahe tu Saulo yana laumamala againe gifaiwala, gifaiwala-mo'a. Ada miYuda Damasiko againe himiyami-ma gihawavetuvetunudi, higa Yesu velemo'ena Yaubada yana Tovegida Keliso, ada au yana hawavetuvetunu againe gifaiwalahegedi be keke adifaiweya bonana hinafatani, au hive'awavitavita.

²³ ^pTu aiyeta a gavaiyehi hihegedi tu miYuda yadi tonagona hivaga'auta be hivevai, higa vaita Saulo hinaluve'alikana. ²⁴ Uyadayada be bogi melala ana abaluku hibodabodafifina be hinaluve'alikana fa'ina. Tu tamo hakwadi yadi nuwanuwa bana againe gi'awatalatalainena. ²⁵ Au bogi sa'eyana ana tomuliya hivega'aulena, ada feyawa againe hidodona digo hisehobuyena melala ana sifa kugakugana tabone hitunelelowona.

Saulo Yelusalema againe giywana.

²⁶ Tu Saulo Yelusalema againe giywana ada giyemu againe, gina higa tovetumagana adi yo'o agaidiya gidaluku tu badi moy'aidi himatausena, fa'ina hinuwanuwa vaita keke velemo'ena Yesu againe gidavetumagana. ²⁷ ^qGiga-wayoga fa'ina tovetumagana sa'eyana ana egana Banabasi givelugana, ada afositolo agaidiya ginauwena be gina'itadi fa'ina. Au Banabasi Saulo fa'ine gikivetuvetunudi, Kaiwabu edeya gi'itana kadu agona ginogalina ma gilukahihiyena. Kadu gigahedi gigayo, "Bana Saulo ase'asena bouna Yesu ana eganeya Damasiko againe gilumamala." ²⁸ Au hidedemi Banabasi ahe gigahe-yo Saulo badi afositolo agaidiya giluku buye himiyami, Yelusalema againe hinunudadana, ase'asena bouna Yesu ana eganeya gilulumamala. ²⁹ Kadu miYuda bona Gilika againe hilulukahihi-ma agaidiya gina giluluhifufu be buye hivewavekwageya,

ⁿ 9:21 Af 9:1-2 ^o 9:22 Af 17:3, 18:28 ^p 9:23 Af 23:12 ^q 9:27 Af 9:4

tu au hivelai be hinaluve'alikana fa'ina. ³⁰Tu tobohiyaneyao badi tovetumagana amanadi miYuda yadi nuwanuwa hihalamanena againe, Saulo Sisaliya againe hinauwena ada wakeya hivelagena be Tasasi againe ginana.

³¹Ada au tovetumagana adi yo'o tulina tulina Yudiya Galili kadu Sameliya adi fafali agaidiya himiyami haghagina, fa'ina kaliva boi hikikivekoyodi-ma hi'ilova. Ada Alu'aluwa Mahalina yana veluga againe yadi vetumagana gitubuga kadu himoya'ai, ada yadi dewa againe tova moy'aia Kaiwabu ana egana hikikilakahina.

Fita tovefela Lida melala againe gisiveyawana.

³²Himihami tu bana Fita melala tulina tulina agaidiya ginunudadana, ada tova sa'eyana Yaubada yana kaliva melala ana egana Lida againe himiyami-ma agaidiya gina giwakawaka. ³³Medede againe kaliva sa'eyana ginuhagana, ana egana Iniya, ada bana givefela be ana ivi againe gidauda ada ginunauwena malamala eita. ³⁴^rAu Fita bana againe gigahe gigayo, “Iniya, adamoya Yesu Keliso ginasiveyawana. Au umidi be a ivi una'uwanu.” Ada auhe'ama Iniya gimidi. ³⁵Ada miLida moy'aidi hi'itana, kadu kaliva moy'aidi laube'u ana egana Seloni againe himiyami-ma hi'itana, ada yadi nuwanuwa uyu'uyuyuna hihegena be Kaiwabu Yesu againe hivetumagana.

Fita kwamayoku Yofa againe alikeya gisivemididina.

³⁶Tu kwamayoku sa'eyana himiyami, ana egana Tabita vineYofa, ada bana tovetumagana. Bona Gilika againe ana egana Dokasa, ada egana ana kaivila kevakeva ana egana diya. Ada bana kwamayoku-nadi tova moy'aia ginuwanuwakabubu, koyokoyo giveluelugadi. ³⁷Ada Fita Lida againe gi'ela ana toveya, kwamayoku gi'aulolo lakahina be gi'alka. Au wowona hikolana ada manuwa ana vetawana wese getane hisena. ³⁸Tu Yofa ma Lida liline, ada Fita Lida againe gi'ela ma tovetumagana Yofa againe hinogalini-yo au kaliva adi'iselu hi'iveninisedi be Fita hinayowanina hinagayo, “Ime agaimeya udamadu'ela.”

³⁹^sYadi gahe Fita ginogalini-yo au gikidewadewa be badi buye hina. Giyemu ada manuwa ana vetawana getane hinauwena, ada au sikwasikwa moy'aidi himidififina ada hitagitagi tu dobodi ana kaleko kadu adi aikeva Dokasa aimo yawayawane gi'onana-ma hivelahawalena. ⁴⁰Au Fita moy'aidi giwavidi be melaleya hihobu, ada bana tugana give'etodonena be give'o'ola. Give'o'ola gihavaina kwamayoku wowona againe gihagavilana gigayo, “Tabita, umidi!” Au matana gi'aleleyena ada Fita gi'ita-yo gimidi. ⁴¹Au Fita nimane gi'abina

^r 9:34 Yo 5:8-9 ^s 9:39 Mk 5:38-41

be gisivemididina, ada au sikwasikwa kadu tovetumagana velugadiyao gikovadi-yo kwamayoku yawayawana giseyemaunena.⁴² Ada au kwamayoku valeyana give'aliyahega be miYofa moya'aidi hinogalina, ada tufoidi moya'aidi Kaiwabu againe hivetumagana.⁴³ Tu Fita ma aiyeta a gavaiyehi Yofa againe gimiyami. Kaliva sa'eyana ana egana Saimoni againe gimiyami, bana yana faisewa ma bulumakau kwafiledi againe lokoloko gibubuna.

Koniliyo Fita giyowanina.

10 ¹Tu kaliva sa'eyana Sisaliya againe gimiyami, ana egana Koniliyo, ada bana togiyomatana miLoma yadi ame adi yo'o sa'eyana agaidiya, yo'o-nadi fafali ana egana Itali againe hiyemu. ²Ada bana totafalolo, bana'e kadu yana manuwa hinagena moya'aidi buye tova moya'aina Yaubada againe hihawadavadava. Kadu tova moya'aina miYuda yadi koyokoyo agaidiya nuwakabubu gifolafolakena, ada aiyeta sa'eyana sa'eyana Yaubada againe give'ove'o'ola. ³^tTova sa'eyana kauwana giwahivekenana againe give'ove'o'ola tu gi'eno'ita, ada Yaubada yana tovenuwa'ata sa'eyana gi'itana bana againe gi'ela ana egana gyakahina gigayo, “Koniliyo.”

⁴^uAu bana Koniliyo gimatautave'ine ada tovenuwa'ata againe gi'itadona gigayo, “Kauveya, gavadi-yo u'ela?”

Bana tovenuwa'ata gigayo, “Yaubada ya ve'o'ola moya'aina a ginogalina, kadu ya nuwakabubu koyokoyo agaidiya ufolafolakena-ma a gi'itana, ada medema againe nuwana ginauna. ⁵Au kaliva tufoidi Yofa againe una'iveninisedi be kaliva sa'eyana hinayowanina, ana egana Saimoni, kadu ana egana velugana Fita. ⁶^vAda adamoya wagakoyona Saimoni againe giwakawaka bana wagakoyona yana faisewa ma bulumakau kwafilediya lokoloko gibubuna. Ada yana manuwa taliya liline gidadauda.”

⁷Hidedemi tovenuwa'ata gigahe be gina, tu Koniliyo ana agetoga adi'iselu kadu yana tolugaviya sa'eyana giyowanidi be hi'ela. Bana tolugaviya higa Koniliyo ana toveluga, ada bana kadu Yaubada gimamatatausena. ⁸Au badi hi'ela be tovenuwa'ata yana gahe fa'ina gilukahihiyena, ada Yofa againe gi'atuhegedi.

Fita gi'eno'ita.

⁹Tova anavelu badi aimo hinauna ada Yofa eda'ufu hiyemuyemu tu bana Fita manuwa getane gilaka be ginave'o'ola fa'ina, ada kauwana getadiya gilaka. ¹⁰Ada Fita mafu gilauna ada nuwanuwana a'a gina'ana. Au anaga aimo gitagotagova tu gimiyami ada gi'eno'ita. ¹¹Ada yana

^t 10:3 Af 9:10 ^u 10:4 Ha 8:4 ^v 10:6 Af 9:43

ita againe lobama gi'ayavalina be gaitoma sa'eyana vaita lifi lakahina amine gihobuhobu, vaita gaveyao hukuna fowa hida'abi'abini-yo babiya hidatunelelowoni. ¹² Ada lifi hinagene kevakeva moy'a'idi himiyami madumadugidiyao gayagayagidiyao yaveyavegidiyao, waumidi tulidi tulidi. ¹³ Ada ago'ago sa'eyana ginogalina gigayo, "Fita, umidi. Au tamo kevakeva umunu be u'a."

¹⁴ ^wBana Fita gigayo, "Kaiwabu, keke-mo'a! Mema kevakeva koyodiyao ime miYuda matameya ada boi keke tamo hidevama gada'u'ani."

¹⁵ Tu agona ginogali-havagilena gigayo, "Gavadi moy'a'ina Yaubada gikiveyamumuna-ma o keke unahawavekoyoyeni." ¹⁶ Ada au hidede amine gigahena tohiye, au lifi lobameya tamo hakwadi gisilakahina.

¹⁷⁻¹⁸ Tu Fita yana ita ana nuwanuwa aimo ginuwanuwadadaneni tu kaliva Koniliyo gi'iveninisedi-ma hitolitoliluvaluva be higa ha'againe Saimoni yana manuwa gidauda-ma hinahalamanena. Au hinuhagani-yo yana eda'awaneya himidi ada hilautoli higayo, "Ka'i mene Saimoni-Fita gimimiyami?"

¹⁹ ^xTu bana Fita ma yana ita gavaimi ana kaivila ma aimo ginuwenewena tu Alu'aluwa Mahalina gigahena gigayo, "Unogali! Mene kaliva adi'itoto yo'o tulidiyao kalivadi o hilelele. ²⁰ Au umidi be unamaduhobu ada omi miYuda ami hawata fa'ina keke unanuwanuwa, au badi buye wanana fa'ina Iya gal'iveninisedi be hi'ela."

²¹ Au Fita kaliva agaidiya gihobu be gigahedi gigayo, "Kaliva walelena-ma iya'eku. Gavadi-yo wa'ela?"

²² Badi higayo, "Yama togiyomatana, ana egana Koniliyo, gi'iveninisema be a'ela. Bana kaliva haghagina, tova moy'a'ina Yaubada gihawadavadavana ada miYuda moy'a'idi hiwowomumuyena lakahina. Ada Yaubada yana tovenuwa'ata sa'eyana bana againe gi'ela givehimeyena ada o ginayowani be yana manuweya una'ela, higa gavaimi o unagahe-ma ginanogalina."

²³ Au Fita yadi gahe ginogalini-yo gigahedi gigayo, "Au walaka'ela hidei kanada tu bogiyadi-yo kanana."

Fita Koniliyo againe gina.

Bogi hida mala gilauna Fita gikidewadewa be kaliva buye hilowoga, kadu tovetumagana tufoidi, badi miYofa, bana hivebwa'uliyena.

²⁴ Hinauna tu tova anavelu Sisaliya againe hiyemu, ada au Koniliyo gibodebodedi. Tobohiyaneyao kadu yana yo'o buye gikovavaga'auhidi ada hibodaboda. ²⁵ ^yAu bana Fita gidaluku ma Koniliyo bana againe gi'ela gi'ibo'ula-mo'a be ginahawadavadavana. ²⁶ Tu Fita gisivemididina gigahena gigayo, "Au umidi! Iya keke Yaubada, iya tomiyababi."

^w 10:14 1Veh 11:3,13,20,26 ^x 10:19 Af 11:12 ^y 10:25 Ha 19:10; Md 4:10

²⁷Au Fita Koniliyo againe gilulukahihi tu manuwuya gilukuluku, yo'o lakahina ahe hivaga'auta-ma ginuhagadi. ²⁸Au gigahedi gigayo, "Ime miYuda ama hawata sa'eyana omi wahalamane-hagihagiyena, higa kwanamiYuda yo'o tulidi kalivana againe keke anafaiweya ginawakawaka o ka'i buye hinanunaudadana. Tu Yaubada halamana giveleku be higa keke tamo kaliva fa'ina ganagahe ganagayo, Wadema kaliva bwanebwananenena o ka'i keke yegayegana. Hidema fa'ina keke akufaiweya yo'o tulimi kalivana ganakiloweni. ²⁹Ada hidema fa'ina o uyowaniku againe, keke gadadibutoyoga au gamadu'ela, tu iya nuwanuwaku ganahalamanena gavadi-yo uyowaniku."

³⁰Tu bana Koniliyo gigahena gigayo, "Aiyeta tohiye kahegedi againe yaku manuwuya gamiyami gave'ove'o'ola, ada kauwana tova adamoya amine meda giwahivekenana. Gave'ove'o'ola tu auhe'ama kaliva sa'eyana wamagigikuya gi'ela gimidi ana vaigau ve'akinamanamalina. ³¹Ada gigayo, Koniliyo, Yaubada ya ve'o'ola ahe ginogalina, ada ya nuwakabubu koyokoyo agaidiya ginuwa-nunauyena. ³²Au tamo hakwadi Yofa againe una'iveninisena be kaliva sa'eyana ginayowanina ana egana Saimoni Fita. Ada adamoya wagakoyona Saimoni againe giwakawaka, bana wagakoyona yana faisewa ma bulumakau kwafilidiya lokoloko gibubuna. Ada yana manuwa taliya liline gidadauda. ³³Hidedemi gigahe fa'ina gamaduyowani ada o unuwakabubuyeku be u'ela. Ada au moya'aima hidei Yaubada matane avaga'auta be gavaimi Kaiwabu givehimeya ime agaimeya ma unagaheyena be ananogalina."

Fita Koniliyo yana yo'o buye agaidiya gilumamala.

³⁴^zTu bana Koniliyo gigahe-yo Fita givebutu gilumamala gigayo, "Adamoya halamana gavaina. Wona velemona Yaubada keke kaliva tufoeidiga gida'ita'itadi, au moya'aida gi'ita'itada leleleya. ³⁵Au gaveyao himatamatatusena kadu hihuluhuluva tunutunugina, medema gi'itanuwakabubuyedi, ka'i kwanaYuda o ka'i yo'o tulimiyao kalivai-mina. ³⁶^aVenuwa'ata miIsileli agaimeya gi'iveninisena-ma au wahalamanena. E, Venuwa'ata Yamumuna gihawavemogatalena higa Yesu Keliso yana alika fa'ina ime Yaubada buye aveyao, ada Bana Yesu kaliva moya'aidi adi Tovehimeya. ³⁷⁻³⁸^bKadu gaitoma lakahina Yudiya anafafaliya gilakayemu-ma wahalamanena, higa Yesu kwanaNasaledi fa'ine. Yaubada Bana givegidena be Alu'aluwa Mahalina againe givemagana kadu gifaiwalavelena. Yoni gimidilumamala be kaliva gikivebataisoyedi tu muliya Bana Yesu yana faisewa Galili ana fafaliya givebutuna. Ada Yaubada Bana buye himiyami fa'ina, fafali moya'aina agaidiya ginunudadana kaliva giveluvelugadi, ada gaveyao moya'aidi

^z 10:34 Lo 2:11 ^a 10:36 Ef 2:13-14 ^b 10:37-38 Md 3:16

Setani yana vehimeya againe himiyami-ma gisiveyawadi. Au hidedemi wahalamanena.

³⁹⁻⁴⁰ ^cTu ime'eyao ma to'ita. Yana gugai moya'aina Yelusalema againe kadu miYuda yamafafali matatabuna agaidiya gifaisewadi-ma a'itadi. Kelose againe hitutuvefosena be hiluve'alikana, tu aiyeta anaveto againe Yaubada alikeya gisivemididina be gikiveyemaunina. ⁴¹ ^dKeke kaliva moya'aidi agaidiya gidakiveyemaunini be hida'itani, au ime'eyaogaga a'itana, ime Yaubada boi ahe givegidema be yana mididi-havagi fa'ina anahawavemogatala. Ada ahe alikeya gimididi-havagi againe, Bana buye a'au'a ayuyu. ⁴² ^eAda givehimeyema be kaliva agaidiya Bana fa'ine analumamala ada anahawavemogatala higa Yaubada givegidena be kaliva moya'aidi, yawayawadiyao kadu ali'alikadiyao, ginavedewayaugidi be laufata hinavaina. ⁴³ ^fAda tuwai-mo'ena Yaubada bonana ana to'awatalatalaina moya'aidi Bana fa'ine hihawavemogatala, yadi buki againe higahe vaita gaveyao moya'aidi Bana againe hinavetumagana, medema yadi koyona ana aiyawela Yesu againe hinanuhagana."

Alu'aluwa Mahalina Koniliyo yana yo'o buye hinuhagana.

⁴⁴ Bana Fita aimo hidedemi gilulukahihi tu Alu'aluwa Mahalina tovanenega moya'aidi giluvaiyedi. ⁴⁵ Ada badi miYuda tovetumagana Fita buye Yofa againe hitauya-ma nuwadi givegafo'uya'uya, fa'ina Yaubada Alu'aluwa Mahalina yo'o tulidiyao agaidiya kadu gihawahegena. ⁴⁶ ^gAu agodi hinogalina, meya tulina tulina againe hilulukahihi Yaubada ana egana hikikilakahina.

⁴⁷ Hidedemi hilulukahihi tu bana Fita gigahe gigayo, "Keke tamo hakwadi hida kaliva anafaiweya ginahawatadi be gufa againe hinabafitaiso, fa'ina ime Alu'aluwa Mahalina anuhagana amine, kadu badi hinuhagana." ⁴⁸ ^hAu givehimeyedi be Yesu Keliso ana eganeya hinabafitaiso. Hibafitaiso gihavaina hive'o'olenabe aiyeta tufona badi agaidiya ginamiyami.

**Fita yo'o tulidiyao yadi vetumagana fa'ina tovetumagana Yelusalema
againe givenuwa'atadi.**

Afositolo 10:9-44

11 ¹Tu afositolo ada tovetumagana Yudiya againe himiyami-ma yo'o tulidiyao kalivai-dina valeyadi hinogalina, higa Yaubada bonana badi kadu hi'idibumuuhigena. ²⁻³ Tu miYuda tovetumagana tufoidi hinuwanuwa vaita yo'o tulidiyao kalivai-dina hinamidivetumagana againe gilubodadi be Yaubada yana iya'iyaya

^c 10:39-40 1Ko 15:4-7 ^d 10:41 Lu 24:42-43 ^e 10:42 Af 17:31 ^f 10:43 Ais 53:5-6;
Yel 31:34 ^g 10:46 Af 2:4 ^h 10:48 Af 2:38; Md 28:19

wowodiya hidatomogolohina Yaubada miYuda fa'idiya givehimeya amine. Hidema fa'ina Fita Yelusalema againe gilaka'ela ana toveya badi miYuda tovetumaganai-dina Fita hi'awalavena higayo, "O'eni yo'o tulidiyo kalivai-dina agaidiya una uwakawaka, badi wowodiya iya'iyaya keke hidatomogolohini, kadu taumadi badi buye wa'a." Hidedemi higahe.

⁴Au Fita gaitoma moy'a'ina gilukayemu-ma badi agaidiya gilukahihiy'e-owona. ⁵Inubane givebutu gilukahihii gigayo, "Melala ana egana Yofa againe gamiyami ada gave'ove'o'ola tu ga'eno'ita. Gaitoma sa'eyana vaita lifi lakahina amine ga'itana, ada vaita gaveyao hukuna fowa hida'abi'abini be lobameya hidatunevelowoni-yo iya lilikuya gihobu. ⁶Au galukenala be gana'ita-hagihagiyena ada kevakeva tulidi tulidi gal'itadi, madumadugidiyao gayagayagidiyao yaveyavegidiyao. ⁷Ga'ita'ita tu ago'ago sa'eyana ganogalina gigayo, Fita, umidi. Au tamo kevakeva umunu be u'a. ⁸Tu iya gagayo, Kaiwabu, keke-mo'a! Mema kevakeva koyodiyao, boi keke tamo iya awakuya gadaseni.

⁹Kadu agona lobameya ganogali-havagilena gigayo, Gavadi moy'a'ina Yaubada gikiveyamumuyedi-ma o keke unahawavekoyoyeni. ¹⁰Ada au hidede amine gigahe tohiye au lifi matatabuna lobameya tamo hakwadi gisilakahina.

¹¹Lobameya lifi gilakalaka tu medema tovai-nadi kaliva adi'itoto iya gamiyami manuwai-nadi againe hiyemu. KwanaSisaliya gi'iveninisedi be iya hinaleleku. ¹²Tu Alu'aluwa Mahalina gigaheku gigayo, Omi miYuda ami hawata fa'ina keke unanuwanuwa, au badi buye wanana. Hidemi gigahe. Kadu hida tovetumagana adivesikisi buye kamimiyami-ma iya buye ana Sisaliya againe, ada moy'a'ima Koniliyo yana manuweya aluku. ¹³Ada bana kahihina ime agaimeya gilukahihiyena, gigahe vaita Yaubada yana tovenuwa'ata sa'eyana gida'ela yana manuweya gidamidiyo gidagaheni gidagayo, Tamo hakwadi Yofa againe una'iveniniseni be kaliva sa'eyana ginayowanina, ana egana Saimoni-Fita. ¹⁴ⁱAda bana venuwa'ata ginalukahihiyena be o'eni ya yo'o buye'i Yaubada yana kibababala wananhagana fa'ina. Hidedemi givenuwa'ataku.

¹⁵^jAda iya givebutu galumamala againe, Alu'aluwa Mahalina boi nagona ide giluvaiyeda amine, kadu badi giluvaiyedi. ¹⁶^kAu Kaiwabu bonana nuwaku gi'afolena gigayo, Yoni gufa againe gikivebafitaisoyemi tu Yaubada Alu'aluwa Mahalina againe ginakivebafitaisoyemi higa alu'aluwami gina'utuvina. ¹⁷Au ide miYuda Kaiwabu Yesu Keliso againe kavetumagana ana toveya, Yaubada Alu'aluwana ide agaideya gihawahegena amine, meda anafaiweya yo'o tulidiyo kalivai-dina agaidiya Alu'aluwa Mahalina gihawahegena. Ada au iya vaita hakwa'adi amine-yo Yaubada gadahawatani be keke badi agaidiya ginahawahegeni?" Au hidedemi Fita gilukahihii.

ⁱ 11:14 Af 16:31 ^j 11:15 Af 2:4 ^k 11:16 Af 1:5

¹⁸ ^lTu badi miYuda tovetumagana Fita yana gahe hinogalini-yo yadi awalava au hi'ilovena, ada Yaubada hihawadavadavana higayo, "Au adamoya ahalamanena Yaubada nuwanuwana kadu yo'o tulidiyao hinanuwavilana be yawaidi ivaguna hinavaina."

Tovetumagana Anidiyoka melala againe kahihidi.

¹⁹ Tu Sitiveni miYuda hitutuve'alinkana ana toveya, kadu hivebutu tovetumagana moy'a'idi hiveve'umagigiyedi ada aufafali tulidi tulidi agaidiya hi'ota. Tufoidi hina ma'i lauveyafafali ana egana Finisiya againe, kadu himula ana egana Saifilasi againe, kadu melala ana egana Anidiyoka againe. Ada Yesu bonana hilumamalena tu miYuda gagana agaidiya hilumamala. ²⁰ Tu tovetumagana tufoidi, miSaifilasi kadu miSailini Anidiyoka againe hina be kadu yo'o tulidiyao kalivai-dina agaidiya hilumamala, Venuwa'ata Yamumuna Kaiwabu Yesu fa'ine hilukahihiyena. ²¹ ^mAda Kaiwabu yadi laumamala againe gifaiwalavelediyo yo'o lakahina Kaiwabu Yesu againe hihagaviladi be hivetumagana.

²² ⁿTu tovetumagana adi yo'o Yelusalema againe tovetumagana Anidiyoka againe valeyadi hinogalina, ada adi tonagona sa'eyana Banabasi hi'iveninisena be gavadi Anidiyoka againe gilakayemu-ma ginana gina'itana. ²³ ^oAda bana ahe giyemu be Yaubada yana nuwadoga miAnidiyoka agaidiya givetalaiyena-ma gi'itana againe, au givemwamwala, ada gilu'ageyedi be keke hinanuwayewa, au Kaiwabu againe hinamiyamiyave'avina tova moy'a'aina. ²⁴ Bana Banabasi ma kaliva haghagina, Alu'aluwa Mahalina ahe giluvaiyena kadu yana vetumagana toyogina. Ada au kaliva keke sa'eyadi hivebutu Kaiwabu againe hivetumagana.

Banabasi Saulo, higa Folo, givega'aulena be buye hivehavehawala.

²⁵ Banabasi gimiyami tu tova sa'eyana gina Tasasi melala againe be Saulo ginavega'aulena fa'ina. ²⁶ Ginuhagana againe Anidiyoka melala againe gi'aliiyena. Ada badi adi'iselu tovetumagana adi yo'o buye hivagavaga'auta ada kaliva moy'a'idi hivehavehawaledi. Hidedemi hinunauwena malamala sa'eyana, ada Anidiyoka againe kaliva-kawowo tovetumagana himidivewagadi Kelisitiyani, badi higa Keliso yana kaliva.

²⁷ Tu medema tovai-nadi kaliva gavadi aimo ginayemu-ma ana to'awatalatalaina tufoidi Yelusalema againe hitauya be Anidiyoka againe hiyemu. ²⁸ ^pKaliva sa'eyana agaidiya, ana egana Agabasi, gitowamidi be Alu'aluwa Mahalina yana hawavemogatala againe loka lakahina fa'ina givenuwa'atadi gigayo, "Aimo loka lakahinafafali moy'a'aina agaidiya ginalakayemu." Ada lokai-nadi gilakayemu Loma Tokaiwabu lakahina

ana egana Kelodiyo yana toveya. ²⁹^qAu tovetumagana Anidiyoka againe loka valeyana hinogalina fa'ina, hievai be yadi velekawowo hinasesa, ada tobohiyadiyo tovetumagana Yudiya againe himiyami-ma hinavelugadi fa'ina. Kaliva sa'eyana sa'eyana gavadi adifaiweya, medema hinasesa. ³⁰Ada au moy'a'idi yadi velekawowo hisena, ada Banabasi Saulo mani-nadi Yelusalema againe hinauwena be tovetumagana adi tonagona hivedeli.

Yemesa hiluve'alikana tu Fita deliya hisena.

12 ¹Himiyami tu kini Helodi givebutu tovetumagana adi yo'^o kalivadi tufoidi gikikivekoyodi. ²'Au givehimeya be Yemesa Yoni tobohiyana ilama againe u'una hinikehegena. ³^sYemesa giluve'alikana fa'ina, badi miYuda yadi tonagona nuwadi gikiveyamumuna. Yadi nuwayamumu gi'ita-yo au givehimeya be Fita hikive'avina. Ada tafalolo ana egana Beledi keke Wa'isina againe hida gaitoma gilakayemu. ⁴Ada au Fita hikive'avini-yo deliya hiselukuwena, ada Helodi givehimeya be tolugaviya adi bo'u fowa amine hina'ita'itave'avina, kadu kaliva-mo'edi fowa fowa amine. Kadu givevai be tafalolo lakahina Abamaduviviya ana tova ginahavaini-yo kaliva moy'a'idi matadiya ginavedewayaugina. ⁵^tAda au tolugaviya Fita deliya hi'ita'itave'avina tu badi tovetumagana Yaubada againe bana fa'ine hive'o'ola'ima'ima-mo'a.

Lobama ana tovenuwa'ata Fita deliya giyauna be gihobu.

⁶Tu bogi gihobu ana uyadeyadeya Helodi kaliva matadiya ginavedewayaugina, bogi-nadi againe Fita ana to'itave'avina adi'iselu hinafadiya gidauda, ada bulava kainumula againe nimanafafalinafafalina tolugaviya adi'iselu agaidiya hiyogovefosena. Kadu tolugaviya deli ana eda'awana hi'ita'itave'avina. ⁷"Fita gidauda tu auhe'ama Kaiwabu yana tovenuwa'ata gilu'afuneunena be mahaline abamiyami gituvemahalina. Au tovenuwa'ata Fita yalona gitafina higa giluvaguna gigayo, "Umadumidi." Auhe'ama bulava kainumula Fita nimane gi'agologolota tu gimidi.

⁸Gi'agolohini tu tovenuwa'ata gigahena gigayo, "Beleta usidoneni, ageyafayafa uhifo." Au Fita gisidoneni gihifo-yo tovenuwa'ata gigayo, "A aikeva u'ose be u'ela kana." ⁹Au Fita tovenuwa'ata gimuliyena ada deliya hihobu, tu keke gidahalamaneni ka'i velemo'ena tovenuwa'ata giluvaguna be gihobuyen o ka'i gi'avayauna. ¹⁰Au tolugaviya adi yo'o sa'eyana hihegedi kadu anavelu hihegedi, hinauna tu melala ana eda'awana againe hiyemu, eda'awanai-nadi againe wanafali

^q 11:29 Lo 15:26 ^r 12:2 Md 4:21 ^s 12:3 Yem 23:15 ^t 12:5 Ef 6:18

^u 12:7 Af 5:19, 16:26

kainumula gidauda. Au wanafali tauna gi'ayauna be melala hinagene hinauna. Eda sa'eyana againe hinauna tu hihegena, au tovenuwa'ata gilu'amuvedamana be ginuyabuyabuna.

¹¹ Ginuyabuyabuni tu Fita gavadi bana againe gilakayemu-ma gi'ayaunena gigayo, “Au adamoya ahe gahalamanena, velemo'ena Kaiwabu yana tovenuwa'ata gi'iveninisena be Helodi nimane gilugolegoleku, kadu miYuda agaidiya gilugolegoleku be gavaimi hinuwanuwa iya gananuhagana-ma keke ginalakayemu.”

Fita tovetumagana ve'o'ola fa'ina hivaga'auta-ma agaidiya giyemu.

¹² Hidedemi Fita gi'ayauneni-yo Meli yadi manuwuya gina, badi Yoni Maki hinana. Medede againe kaliva moy'a'idi ahe hivaga'auta be Fita fa'ine hive'ove'o'ola. ¹³ Au Fita giyemu wanafali gava kwaune gikifisifisi'a ada agetoga kwamayoku sa'eyana, ana egana Loda, gi'ela be wana ginayauna. ¹⁴ Fita gikovakova ma agona ana nogala gihalamanena, au nuwana gi'ayauyauna lakahina fa'ina wana keke gidayauni, tu gimaduluku vetawaneya givenuwa'atadi gigayo, “Hei! Fita giyemu.”

¹⁵ Badi higayo, “O kwavakwava.” Tu bana kwamayoku yana gahe giseve'ave'ahina gigayo, “Au velemona.” Yana gahe giseve'ave'ahina fa'ina, badi higayo, “Mema aluwana.”

¹⁶ Badi buye hilukahihi tu Fita aimo gikifisifisi'a, fa'ina hina wana hidayauna ma hi'ita-yo au nuwadi givegafo'uya'uya. ¹⁷^vTu bana nimane giluhawatadi tu gavaia'amine Kaiwabu deliya gisehobuyena ma agaidiya gi'awatalatalainena. Kadu gigahedi gigayo, “Yemesa tobohiyaneyao buye wanavenuwa'atadi.” Gilukahihi gihavaina au gina mali melaleya.

¹⁸ Tu mala gilauna tolugavihi hi'enoviladi againe, Fita fa'ine yaudi gilowona hive'agahegahe higayo, “Ha! Fita hamu gina?” ¹⁹Bana Helodi givehimeya be hinalelena tu hilele-wayoga. Au tolugaviya gitoliluveluve-fa'ilidi, ada au givehimeya be hinaluve'alikadi.

Tu muliya Helodi Yudiya ginuyabuyabuna be gina Sisaliya againe gimiyyami.

Helodi gi'alika.

²⁰ Ada bana Helodi miTaiya miSaidoni givekwavekwageyedi toyogina fa'ina hivaga'auta be hina Helodi hina'itana. Nagona hina kaliva sa'eyana himidivetobohiyanena, ana egana Bilasito, bana kalivai-nadi Helodi yana tofaisewa kikaiwabuna. Hivetobohiyanena be ginana Helodi nuwana ginakiveyamumuna fa'ina. Hivetobohiyaneni-yo au Helodi againe taudiyao hina higayo, “Ime nuwanuwamaveyao.” Badi adiga bana yanafafali againe giyemuyemu fa'ina nuwanuwadi hinaveyao. ²¹Ada Bilasito

^v 12:17 Af 12:7-8

Helodi againe gigahe-yo au tova gisena, ada kini ana vaigau kikaiwabuna gi'ose-yo yana didiga'u'uya gihiyoto au yo'o agaidiya gilumamala.

²² Gilumamala gihavaina badi hikovakova higayo, "Wama keke kaliva agona, au Yaubada ago-mo'ena kanogalina." ²³ Badi yo'o hikovakova tu bana keke Yaubada ana egana gidakilakahini fa'ina, auhe'ama Kaiwabu yana tovenuwa'ata aulolo givelena. Au oloto kamona hi'au'ana be gi'alika.

²⁴ ^wAda aufafali tulina tulina agaidiya kaliva moy'aidi Yaubada bonana hinogalina be hivetumaganena.

²⁵ Tu Banabasi ada Saulo tovetumagana adi tonagona agaidiya mani hinauwena-ma faisewai-nadi hiluyabuna, au Yelusalema hitauya Anidiyoka againe hiywadi, ada kaliva sa'eyana ana egana Yoni-Maki hivega'aulena be buye hina.

**Alu'aluwa Mahalina Banabasi ada Saulo higa Folo
givegidedi be Yesu bonana hinawahidadanena.**

13 ¹Tu Anidiyoka againe tovetumagana adi yo'o agaidiya Yaubada bonana ana tolaumamala kadu ana tovehawala himiyami, adi egana Banabasi, Simiyoni kadu ana egana velugana Kwaukwauha, Lusiyi kwanaSailini, Maneyeni bana Helodi Galili ana tovehimeya buye hive'alakalakata, kadu Saulo. ²^xTova sa'eyana Kaiwabu hihawahadavadavana kadu hilabelabewaviyo tu Alu'aluwa Mahalina gigahedi gigayo, "Faisewa sa'eyana fa'ina Banabasi ada Saulo gavegidedi. Au Iya agaikuya adi'iselu wanasevehailedi." ³^yAda au hilabewaviyo hive'o'ola gihavaina, nimadi badi agaidiya hisena be hi'atuhegedi.

Banabasi ada Saulo Saifilasi againe hilumamala.

⁴Tu Alu'aluwa Mahalina Banabasi ada Saulo gi'iveninisedi be hilowoga, taliya ana melala againe hihobu ana egana Selusiya, ada wakeya hiyage hina himula sa'eyana ana egana Saifilasi againe. ⁵^zAda melala sa'eyana againe hiyemu, ana egana Salamisi. Mededei miYuda yadi manuwa-abavehawala sinagogi agaidiya Yaubada bonana hilumamalena. Yoni-Maki bana buye hi'ela adi toveluga fa'ina.

⁶Au himula inubane hilowoga hina tabone hiluyabuni-yo Fafosi melala againe hiyemu. Medede againe tokwelikweli sa'eyana hinuhagana, ana egana Ba-Yesu kwanaYuda, ada bana gigahe vaita tauna Yaubada bonana ana to'awatalatalaina tu give'alololo. ⁷Bana himula ana kabermani buye himiyami, tovehimeyai-nadi ana egana Sediyo-Folo, bana kaliva halamanina. Ada tovehimeya Banabasi be Saulo giyowanidi be bana againe hina'ela, fa'ina nuwanuwana Yaubada bonana ginanogalina.

⁸Tu tokwelikweli, ana egana velugana bona Gilika againe ma Elimasi,

^w 12:24 Ais 55:11; Af 19:20 ^x 13:2 Af 9:15 ^y 13:3 Af 6:6 ^z 13:5 Af 12:12

badi Banabasi be Saulo bonadi gihawatagona, fa'ina keke nuwanuwana tovehimeya Yesu ginavetumaganeni. ⁹⁻¹⁰^aHidedemi gihuluva fa'ina Saulo, kadu ana egana velugana Folo, Alu'aluwa Mahalina bana giluvaiyeni-yo tokwelikweli againe gi'itadonadona gigayo, “O'eni ma Setani natuna. Gaitoma moy'a'ina haghagina udibutoyoge-'owona. O tove'lololo kadu kaliva koyo, koyo-mo'e. Tova moy'a'ina Kaiwabu yana eda tunutunugina ukikivebavebalana. ¹¹Au unogali! Adamoya Kaiwabu nimane ginamunu, ada mata ginakoyo be kauwana yana mahalina keke una'itani, unanunauwena ana tova Yaubada ginavehimeya.” Gigahe be awana gi'agolohina, auhe'ama Elimasi matana giluhowahowa be gi'uyuyuna, ada au gikifihafihaga be tamo hakwadi nimane gina'abina be ginanunudadana. ¹²Ada tovehimeya gavadi gilakayemu-ma gi'ita-yo givetumagana, yadi vehawala Kaiwabu fa'ina ginogalini-yo nuwana givegafo'uya'uya.

Banabasi ada Folo Anidiyokafafali ana egana Fisidiya againe hilumamala. Nagona miIsileli kahihidi hiyakahina.

¹³Tu Folo tobohiyaneyao buye wakeya hiyage, Fafosi hinuyabuyabuni tu lehageya hinauna hinauna ma'l lauva tunugina-yofafali ana egana Famifiliya againe hidamana'ela, au hilaka melala ana egana Fega againe. Hiyemu tu Yoni-Maki ginuyabuyabudi be giyewana Yelusalema againe. ¹⁴Au Fega hihege tu Anidiyoka againe hiyemu, melalai-nadi Fisidiya againe. Ada au sabati againe manuwa-abavehawala sinagogi againe hiluku hihiyoto. ¹⁵Ada tamo hakwadi Yaubada bonana gihawa, Moses yana buki-vehimeya againe kadu Yaubada bonana ana to'awatalatalaina yadi etoladi againe. Gihawa gihavaina sinagogi ana tonagona venuwa'ata hi'iveninisena higayo, “Tobohiyameyao, ka'i nuwanuwa sa'eyana ase'asemiyagidadauda-ma yo'o wanalu'ageyedi, au wanalamamala.”

¹⁶Au Folo gitowamidi nimane giluhawatadi digo givebutu gilumamala gigayo, “Tobohiyakweyao, ide omi miIsileli kadu omi kaliva tulimiyo tu Yaubada wahawadavadavana amanadi, yaku hifufu wananogalina. ¹⁷^bIme miIsileli yama Yaubada bwanenemeyao giluwafadi. Boi tuwaimo'ena aimo Idifita againe hawahawala amine himiyami ana toveya, Yaubada gifaiwalaveledi be adi yo'o himoya'ai. Muliya Yaubada yana faiwala lakahina gi'iveyemaunina be givega'aledi ada Idifita hinuyabuyabuna. ¹⁸^cAda au babigaga againe himiyami ana toveya, yadi ga'ilila'ila'a malamala foti (40) agaidiya tu au Yaubada gi'atuvefa'iledi. ¹⁹^dAda Kenani againe hilakayemu tu Yaubada gifaiwalaveledi be yo'o lakahidi seveni medede againe hiluyaweyawelidi, tu yadi babi ma yana yo'o giveledi be taudiyao yadi babi fa'ina. ²⁰Ada hida gaitoma

^a 13:9-10 Af 4:8; Yo 8:44 ^b 13:17 Yem 6:6, 12:51 ^c 13:18 Yem 16:35 ^d 13:19 Ail 7:1

galukahihiyena-ma ime miIsileli bwanenemeyao hinunauwena malamala fowa hanaledi fifiti (450) agaidiya. Muliya Yaubada yadi tonagona gisedi be hinunauwena Samuwela yana toveya, bana Yaubada bonana ana to'awatalatalaina. ^{21^e}Au medema tovai-nadi kini fa'ina Samuwela againe hive'o'ola, ada Yaubada Saulo gisena yadi kini fa'ina. Bana Saulo Kisi natuna, Beniyamina yana yo'o kalivana. Ada au malamala foti agaidiya bana givehivehimeyed. ^{22^f}Malamala foti gihavaina, Yaubada Saulo yana abavehimeya gidabana, ada Devida gisena yadi kini fa'ina. Ada bana fa'ine tuwai-mo'ena Yaubada Veyao Tuwaina ana bukiya gigahe gigayo, Devida Yese natuna yana huluva yaku nuwanuwa amine fa'ina au nuwaku gi'abina. Gavadi Iya nuwanuwaku ginafaisewa, au ginafaisewa.

Au hidede amine Yaubada gigahe.

^{23^g}Ada tuwai-mo'ena Yaubada giwonadabadaba miIsileli bwanenemeyao agaidiya amine, au gihuluva. Devida bwanenena sa'eyana, bana Yesu, ime miIsileli givelema ama Tokibababala fa'ina. ^{24^h}Ada Yesu aimo yana faisewa keke gidavebutu againe, Yoni miIsileli moy'a'adi agaidiya gimidilumamala, higa vaita yadi dewa koyona againe hidavenikohi be hidabafitaiso. ^{25ⁱ}Ada Yoni yana faisewa gidaluyabuna ma kaliva gigahedi gigayo, Omi wanuwanuwa iya vaita hakwa'adi. Iya keke Bana'e wabodabodana amanadi, tu wanogali! Iya wai ganagona tu Bana mulikuya gina'ela-ma keke akufaiweya ana ageyafayafa ganayauni, fa'ina Bana kikaiwabu-mo'ena tu iya kwamana kabisoku.

MiYelusalema Yesu hifaniyena be alikeya hihegenauwena.

²⁶Tobohiyakweyao, omi Abelahamo bwanenemeyao kadu kaliva tulimiya tu Yaubada wahawadavadava amanadi, au ide agaideya hida venuwa'ata Yaubada yana kibababala fa'ina gi'iveninisena. ^{27^j}Tu miYelusalema adi tonagona buye Yesu hifaniyena, keke hidahalamaneni Bana'e adi Tokibababala, kadu Yaubada bonana ana to'awatalatalaina yadi gahe hifaniyena, gahe-nadi sabati moy'a'ina agaidiya kaliva hihawahawana. Tu Yesu alikeya hihegenauwena fa'ina, to'awatalatalaina tuwai-mo'ena yadi gahe badi yadi huluva fa'ina velemo'ena gilakayemu. ^{28^k}Ada keke tamo gavadi koyona Bana againe hidanuhagani-yo alika againe hidahegenauweni, tu au ai'adi Failato againe hive'o'ola higa ginavehimeya be hinaluve'alikana. ^{29^l}Ada Yaubada bonana tuwai-mo'ena Bana fa'ine Veyao Tuwaina ana bukiya hi'etoladina amine, badi miYelusalema hifaisewa-'owoni yo au ana tomuliya wowona kelose againe hikakina be tomohuyehuyeya hihuyana. ^{30-31^m}Tu Yaubada alikeya gisivemididina, ada badi hibwa'ulina Galili againe

^e 13:21 1Sam 8:5,19 ^f 13:22 1Sam 13:14, 16:13 ^g 13:23 Ais 11:1 ^h 13:24 Md 3:1-2

ⁱ 13:25 Yo 1:20,27 ^j 13:27 Yo 16:3 ^k 13:28 Md 27:22-23 ^l 13:29 Md 27:59-60

^m 13:30-31 Af 2:24, 1:3,8

hitauya be hinauna Yelusalema yo'oi-dina agaidiya Tauna gi'l'ivemogatalina
aiyeta moya'aina, ada au adamoya miIsileli agaimeya Bana fa'ine
hi'awa'awatalatalaina.

**Yesu yana mididi-havagi againe Yaubada
yana wonadabadaba a gilakayemu.**

³²⁻³³ⁿTu ime hidedei a'ela be omi agaimiya Venuwa'ata Yamumuna
anahawavemogatalena. Boi tuwai-mo'ena Yaubada gavaimi ime miIsileli
bwanenemeyao agaidiya giwonadabadaba amine, au adamoya velemo'ena
gilakayemu be ide ka'ita-mo'ena. E, ime badi miIsileli bwanenediyao
fa'imeya kadu omi kaliva tulimiyao moya'aimi fa'imiya, ide moya'aida
fa'ideya Yaubada Yesu alikeya gisivemididina ada hidede amine yana
wonadabadaba velemo'ena a gilakayemu. Kadu anafaiweya Yaubada
bonana Same 2 againe tamo hakwadi gi'etoladina gigayo,

O'eni Natuku, adamoya gahawavenatune.

³⁴^oYaubada bonana kadu buki sa'eyana againe gigahe gigayo,
Iya Devida againe gawonadabadaba be higa gananuwakabubuyena
amine, au gananuwakabubuye-mo'emi,
mahalina ana gaitoma ganavelemi.

Au hida hifufu againe Yaubada givenuwa'atada Yesu alikeya
gisasivemididina be keke gina'alika-havagi yo wowona gina'alilini.

³⁵^pE, kadu'e Devida Same velugana againe gilukahihi vaita Yaubada
againe gidagahe gidagayo,

Iya gahalamanena keke ya kaliva alikeya unahawahegeku be
wowoku gina'alilini,
iya'eku ya kaliva mahamahaliku.

³⁶^qAu Devida babiya gimiymi ana toveya, gavaimi Yaubada
givehimeya amine, au gifaisewana ada muliya gi'alika, au tamaneyao
liliidiya hitauna be wowona gi'alilina. ³⁷^rTu Bana kaliva Yaubada alikeya
gisivemididina amanadi keke gida'alika-havagi yo wowona gida'alilini.

Yesu ana vetumagana againe koyona ana aiyawela kananuhagana.

³⁸^sTobohiyakweyao, nuwanuwaku wanahalamane-hagihagiyena
Bana Yesu yana alika fa'ina yami koyona ana aiyawela amifaiweya
wanavaina. Au hidedemi avenuwa'atami. ³⁹^tKadu wanahalamanena
ka'i Moseseyana vehimeya wanavetumaganena o, keke amifaiweya
yami yegayega Yaubada matane wanavaini, tu ka'i gaveyao moya'aimi
Yesu wanavetumaganena, au Yaubada yami koyona matatabuna
ginavenuauluyena be yami yegayegana wanavaina. ⁴⁰^uAu

ⁿ 13:32-33 Sam 2:7 ^o 13:34 Ais 55:3 ^p 13:35 Sam 16:10 ^q 13:36 Af 2:29

^r 13:38 Af 10:43 ^s 13:39 Lo 10:4

wana'itave'avimi be gava vita Yaubada bonana ana to'awatalatalaina tuwai-mo'ena higaheyena-ma keke omi agaimiya ginalakayemu. ⁴¹ ^tBadi higayo,

Omi to'ihawadamana wanogali! Wanaya ulowoga be wanakwaha, fa'ina babiya wamimiyami ana toveya gugai sa'eyana ganafaisewana. Ka'i tamo hakwadi gugai-nadi omi agaimiya gina'awatalatalainena, au keke-mo'a wanavetumaganeni."

Au hidedemi Yaubada Veyao Tuwaina ana bukiya tuwai-mo'ena gigahe ada Folo yana laumamala againe gahe-nadi giyakahina.

**Kaliva tufoidi Folo yana laumamala hidibumu higena
tu tufoidi hidibuto yogenia.**

⁴² Tu Folo gilumamala gihavaina, sinagogi againe Banabasi buye hidahobu ma kaliva hive'o'oledi be yuwa ana sabati againe kadu hinayewadi, nuwanuwa hilukahihiyena-ma kadu hinalumamalena.

⁴³ Ada moya'aidi sinagogi againe hihobu-'owoga yo, au miYuda tufoidi moya'aidi Folo Banabasi agaidiya hivaga'auta. Kadu yo'o tulidiyao kalivai-dina miYuda yadi yo'o agaidiya hiluku be hivemiYuda-ma badi buye hivaga'auta. Au Folo Banabasi buye hilukahih ada badi afositoldina higaheya'aya'alidi be Yaubada againe hinamiyamiyave'avina yana nuwadoga hinavetuvetumaganena.

⁴⁴ Wiki sa'eyana hihege tu sabati againe kaliva medema melala againe himiyami-ma moya'ai-mo'edi hivaga'auta be Kaiwabu bonana hinanogalina. ⁴⁵ ^uTu miYuda yo'o lakahina hi'ita-yo higa'uma'uma-mo'a, au Folo hi'ihawadamana kadu yana gahe himadubodana.

⁴⁶ ^vBadi hi'ihawadamana tu Folo Banabasi ase'asedi bouna higahedi higayo, "Yaubada givehimeyema fa'ina, gilubodama be Bana bonana omi miYuda agaimiya adamidilumamalena, tu omi bonai-nadi wakilowena kadu omi wahuluva vaita keke nuwanuwami yawai-vagahimi wanavaini fa'ina, ananuyabuyabumi be anana yo'o tulidiyao agaidiya analumamala. ⁴⁷ ^wAu Kaiwabu hida vehimeya givelema, gahe-nadi Veyao Tuwaina ana bukiya gidadauda gigayo,

O'eni gavegide be yo'o tulidiyao agaidiya mahalina unanauwena, kadu tomiyababifafali tulina tulina agaidiya yaku kibababala fa'ina unakivetuvetunudi.

Au hidede amine Kaiwabu givehimeyema."

⁴⁸ Tu yo'o tulidiyao kalivai-dina yadi gahe hinogalini-yo hivemwamwala higayo, "Kaiwabu bonana au yamumuna, yamumu-mo'ena." Ada gaveyao Yaubada givegidedi be yawai-vagahidi hinavaina, medemahivebutu hivetuvetumagan. ⁴⁹ Ada au medemafafali againe

^t 13:41 Hab 1:5 ^u 13:45 Af 17:5 ^v 13:46 Af 18:6 ^w 13:47 Ais 49:6

kaliva moy'a'aidi Kaiwabu bonana hinogalina, valeyana give'aliyahega. ⁵⁰Tu miYuda badi Anidiyoka melala ana kaliva lakahidiyao kadu vevine tohawadavadava wakwamayokudiyao nuwadi hisigadagalina be Folo Banabasi hivekwageyedyi, ada yadifafali againe hiwavidi. ⁵¹Au hilowoga fwayafwaya agediya hivagahegehegena higa Yaubada yana matahiwadi ana iya'iyaya fa'ina, ada hina Aikoniumi againe. ⁵²Tu tovetumagana Anidiyoka againe ma hivemwamwala-mo'a ada Alu'aluwa Mahalina givemagadi.

Folo Banabasi Aikoniumi againe hilumamala.

14 ¹Tu Folo Banabasi Aikoniumi melala againe hiyemu tu yadi huluvali-nadi meda au sa'eyana. MiYuda yadi manuwa-abavehawala sinagogi againe hiluku ada hilumamala, yadi laumamala kaliva ase'asedi gi'onana be miYuda kadu yo'o tulidiyao kalivai-dina tufoidi moy'a'aidi Yesu againe hivebutu hivetumagana. ²*Tu miYuda tufoidi yadi laumamala hidibutoyogena, ada yo'o tulidiyao kalivai-dina nuwadi hisigadagalina be tolaumamala adi'iselu agaidiya hinuwakoyo. ³*Tu au ai'adi medede againe adi'iselu himiyami ma'ita lauva tunugina. Kaiwabu fa'ine ase'asedi bouna hilumamala, ada Bana gifaiwalaveledi be aituha fifiwalana kadu abaveyaulowoga hifaisewadi. Hidede amine gifaiwalaveledi be kaliva hinahalamanena yadi laumamala yana nuwadoga fa'ina au velemona. ⁴Tu melala kalivana yadi nuwanuwa luhei. Tufoidi miYuda himuliyedi, tufoidi afositolo adi'iselu himuliyedi. ⁵*Au yo'o tulidiyao kalivadi kadu miYuda hivelvai adi tonagona buye'i vaita hinamunudi ada hinatutuve'alikadi. ⁶⁻⁷Ada au yadi nuwanuwa afositolo hinogalini-yo aufafali ana egana Likoniya againe hi'otabayabudi, melala luhei Lisidila kadu Debi agaidiya hiluku ada medemafafali-dina agaidiya hinudadana Venuwa'ata Yamumuna hilumamalena.

Folo Banabasi Lisidila be Debi agaidiya hilumamala.

⁸*Tu kaliva sa'eyana Lisidila againe gimiyami, ada bana tovefela. Yana tubuga againe givefela, ada naudadana gifaniyen. ⁹Ada Fologilulumamala tu bana tovefela givetoga-yo givanevanenega. Au Folo bana againe gi'itadona, yana vetumagana gi'ayaunena higa vaita Yaubada anafaiweya ginakiveyamumuna. ¹⁰Hidedemi gi'ayauneni-yo gikova'awafatafata gigayo "Umidi, umididi-mo'a." Auhe'ama kaliva gimadutowamidi givetubu ginunudadana.

¹¹Tu yo'o kaliva againe Folo gavadi gigana-ma hi'ita-yo, hivebutu taudiyao meyadiya bona Likoniya againe hikovakova higayo, "Viviluwa hivelivakaliva be ide agaideya hihobu'ela." ¹²Au Banabasi hivewagana Seusi,

^x 14:2 Af 13:45 ^y 14:3 Mk 16:20 ^z 14:5 Af 14:19 ^a 14:8 Af 3:2

bana yadi viviliwa adi tonagona, ada Folo hivewagana Hemesa, bana yadi viviliwa yadi tovenuwa'ata. Bana Folo gilumamala fa'ina hivaita gidaveHemesa, higa vaita tovenuwa'ata amine gihuluva fa'ina.¹³ Ada yadi melala tufone manuwa-tafalolo gimidimidi, mededei Seusi againe hitafatalafalolo. Ada abaveyao ana tofaisewa Seusi yana kaliva, bulumakau hala adi wa'odo'odo falafalawasi gi'aliyedi melala ana abaluku againe. Bana'e kadu yo'o buye'i nuwanuwadi yomuyomu hinamunudi be higa vaita afositolo hinahawadavadavadi.

¹⁴⁻¹⁵^bTu Folo Banabasi yadi nuwanuwa hinogalini-yo hinuwakoyo ada adi aikeva hikaninina be yo'o hinafadiya himadu digo hikovakova higayo, "Kaliva, mema gavaimi wagagauga? Ime kadu tomiyababi, wowoda au sa'eyana. Ime a'ela be Venuwa'ata Yamumuna omi agaimiya ana'awatalatalainena, ase'asemi anakiviviyena be yami hawadavadava-kawowo hida viviliwa agaidiya wanahegeni tu Yaubada velemo'ena wanahalamanena, Bana anakaibe yawayawana. E, Bana'e lobama babi lehaga gibubudi, kadu gavadi gavadi medede againe hidadaudama, au Bana gibubudi.¹⁶ Boi yo'o tulina tulina gavaimi taudiyao hinuwanuwa amine, au hihuluvina ada Yaubada keke gidahawatadi.¹⁷^cTu yana iya'iyyaya we'a gidadauda. Yana nuwakabubu tova moya'aina givetavetala fa'ina wahalamanena we'a Yaubada gimimiyami. Bana wehi givehimeyena be lobameya gihobuhobu, kadu a'a givehimeyena be gitubutubuga. Adaga giveleveleda ada nuwada gikiveyamumuna be kavemwamwala-mo'a."¹⁸ Hidedemi afositolo adi'iselu hilukahihi nonogana keke ihayadi yo'o hidahawatadi be yomuyomu hinamununi-yo hinahawadavadavadi.

¹⁹^dTu miYuda tufoidi Anidiyoka Fisidiya againe kadu Aikoniumi againe hitauya ada hiyemu againe, yo'o hinuwa'abiyedi be afositolo agaidiya hinuwakoyo, au Folo kabala againe hifihafihana, ada hivaitana hidatutuve'alikani fa'ina hiholina be melala kabu'avane hisena.²⁰Tu muliya tovetumagana hi'ela himidififina againe, au gimidi melaleya giywana. Bogi sa'eyana hida mala gilauna bana'e Banabasi buye hilowoga hina Debi melala againe.

Folo Banabasi Anidiyoka melala Siliya againe hiywadi.

²¹^eTu Folo Banabasi Venuwa'ata Yamumuna Debi againe hilumamalena ada yadi laumamala moya'aidi ase'asedi gi'onana be hivebutu Yesu himuliyena. Himiyami tu afositolo Lisidila Aikoniumi Anidiyoka melalai-dina agaidiya kadu hiyewa be hinumiyamiyanana.²²^fAu hida melalai-dina agaidiya tovetumagana hihawadonedi be yadi vetumagana

^b 14:14-15 Af 17:24 ^c 14:17 Lo 1:19-20 ^d 14:19 Af 17:13 ^e 14:21 Md 28:19

^f 14:22 Af 18:23; 2Ti 3:12

againe hina'atuvefa'ila, ada hilu'ageyedi be tova moya'aina Yesu hinavetuvetumaganena kadu hivenuwa'atadi higayo, "Ka'i nuwanuwada tova mulina Yaubada yana abavehimyea againe kanaluku au vita moya'aina adafaiweya kadanuhagana." Au hidedemi hivenuwa'atadi. ²³ Ada badi tovetumaganana adi yo'o sa'eyana sa'eyana agaidiya adi tonagona hisedi, ada hilabewaviyo tovetumaganana fa'idiya hive'ove'o'ola higayo, "Kaiwabu, hida kaliva vevine O againiya ahe hivetumaganana. Au O nimaniya anasedi be una'ita'itave'avid." ²⁴Hidedemi Folo Banabasi hive'o'ola tu hilowoga, Fisidiya anafafali againe hinauna tu Familiyi anafafalihihi yiyemu. ²⁵Au miFega agaidiya Yaubada bonana hilumamalen tu Ataliya againe hihobu, medema taliyeya. ²⁶^gMededei wakeya hiyage be Anidiyoka hiywadi, melalai-nadi againe yadi lowoga hive'inubena. Boi tuwaina hilowoga ana toveya, tovetumaganana Yaubada nimane hisedi be yadi faisewa againe ginanuwadogedi. Ada au Folo Banabasi hida faisewa ahe hiluyabuna.

²⁷^hTu Anidiyoka againe ahe hiyemu-yo tovetumaganana hikovavaga'auhidi be yadi laumamala fa'ina badi agaidiya hi'awatalatalaina. Gaitoma moya'aina badi Yaubada buye hifaisewana-ma hilukahihiyena, kadu vetumaganana Yesu againe ana eda yo'o tulidiyao fa'idiya Yaubada giyau-ma hi'awatalatalainena. ²⁸Ada au Anidiyoka againe tovetumaganana agaidiya himiyami lauva tunugina.

Anidiyoka melala againe vekwageya gilakayemu.

15 ¹'Himi yami tu tova sa'eyana kaliva tufoidi Yudiya hitauya be Anidiyoka againe hiyemu, ada hivebutu tovetumaganana adi yo'o hivewaledi higayo, "Ka'i keke Yaubada yana iya'iyaya wowomiya wanatomogolohini Mosese tuwaina givehimyea amine, kadu keke amifaiweya kibababala wanuhagani." ²Au yadi vehawala fa'ina Folo Banabasi hidakeyedi, ada yadi wanuwakoyo buye hivewavekwageya. Yadi vekwageya hinunauwena fa'ina, vehimeya hisena vaita Folo Banabasi kadu Anidiyoka tovetumaganana tufoidi Yelusalema againe hinana, be afositolo kadu tovetumaganana adi tonagona buye hinalukahihi ka'i yo'o tulidiyao tovetumaganana iya'iyaya wowodiya hinatomogolohina o ka'i keke. ³Ada au tovetumaganana adi yo'o hivagahegedi, ada fafali adi egana Finisiya kadu Sameliya adihinafeya hinauna tu tovetumaganana medede againe hivenuwa'atadi yo'o tulidiyao kalivai-dina Kaiwabu againe ahe hihagaviladi be hivetumaganana. Ada miFinisiya miSameliya tovetumaganana hida valeyadi hinogalina againe, hivemwamwala lakahina. ⁴^jAda Yelusalema hiyemu againe, tovetumaganana adi yo'o hilusiuleyedi, badi afositolo kadu tovetumaganana adi tonagona buye'i, ada gavadi

^g 14:26 Af 13:1-2 ^h 14:27 Af 15:4,12 ⁱ 15:1 Ga 5:2 ^j 15:4 Af 15:12

Yaubada yadi faisewa againe gigugaiyena-ma badi agaidiya matatabuna hi'awatalatalainena.

Fita yana gahe yo'o tulidiyao tovetumagana fa'idiya.

⁵Tu tovetumagana tufoidi ma, badi Falisi adi yo'o kalivai-dina, hitowamidi higayo, “Badi yo'o tulidiyao kalivai-dina wanagahedi be iya'iyaya wowodiya hinatomogolohina, kadu wanavehimeyedi be Mosese yana vehimeya matatabuna hina'itave'avina.” ⁶Au afositolo kadu tovetumagana adi tonagona buye hivaga'auta be hida gaitoma hinanuwenuwena fa'ina. ⁷^kAda buye hive'agahegahe lauva tunugina-yo Fita gitowamidi gigahedi gigayo, “Tobohiyakweyao, omi wahalamanena boi nagona Yaubada ide agaideya iya givegideku be Venuwa'ata Yamumuna yo'o tulidiyao agaidiya ganalumamalena, ada badi adifaiweya hinanogalina be Kaiwabu againe hinavetumagana fa'ina. ⁸Ada Yaubada, Bana'e kaliva ase'aseda gihalamanena amanadi, Alu'aluwa Mahalina ide agaideya gihawahegena amine, meda badi agaidiya gihawahegena, ada hida yana hawahega againe Bana yana nuwanuwa yamumuna badi yo'o tulidiyao agaidiya gikiveyemaunina. ⁹Au ide keke miYuda gagana gida'ita'itada, au badi yo'o tulidiyao kadu gi'ita'itadi. Ada au badi Yesu hivetumaganena fa'ina, ase'asedi gikiveyeveyegana. ¹⁰Hidema fa'ina gavadi-yo wahuluva vaita Yaubada wada'ive'ago'ugani? Nuwanuwami yo'o tulidiyao tovetumagana Mosese yana vehimeya matatabuna hina'itave'avina tu ide bwanenedeyao buye keke adafaiweya vehimeyai-nadi kada'itave'avini. Ka'i omi wanavehimeyedi be Mosese yana vehimeya matatabuna hina'itave'avina, au vita lakahina wanaveledi be Yaubada wana'ive'ago'ugana. ¹¹^lKeke-mo'a hidedemi wanahuluvini. Keke Mosese yana vehimeya fa'ina kibababala kadanuhagani, au Kaiwabu Yesu yana nuwadoga fa'ina kibababala kanuhagana. Yada vetumagana againe kibababala kanuhagana, kadu badi anafaiweya yadi vetumagana againe kibababala hinuhagana.”

Yemesa yana gahe yo'o tulidiyao adi vehimeya fa'ina.

¹²Tu yo'o matatabudi Fita yana gahe hinogalini-yo hive'amata, ada Banabasi Folo hilukahihi-ma badi hivanenegedi. Higahedi vaita Yaubada gidafaiwalaveledi be aituha fifiwalana kadu abaveyauelowoga yo'o tulidiyao hinafadiya hidafaisewadi. ¹³Badi hilukahihi gihavaina, bana Yemesa gitowamidi gigayo, “Tobohiyakweyao, yaku gahe wanano galina. ¹⁴Bana Saimoni ahe gikivetuvetunuda be higa gavaiya'amine boi nagona Yaubada yo'o tulidiyao gi'itanuwakabubuyedi be Alu'aluwa Mahalina kadu badi agaidiya gihawahegena. Kadu gaveyao nuwanuwana yana

^k 15:7 Af 11:4-17 ^l 15:11 Ga 2:16; Ef 2:8

kaliva fa'ina badi agaidiya, medema Tauna fa'ine gisevehailedi. ¹⁵ Ada iya gagahe amine meda anafaiweya tuwai-mo'ena Yaubada bonana ana to'awatalatalaina higahe. Au Yaubada Veyao Tuwaina ana bukiya tuwai-mo'ena gigahe gigayo,

¹⁶ ^mAimo tova mulina Iya Yaubada Kaiwabu
Devida bwaneneneyao kadu gana'itanuwakabubuyedi.
Bana melalina hikoyo higa yadi abavehimeya
gihavaina tu Iya ganave'etolakahidi.
Boi bana melalina hivetovehimeya amine,
meda adamoya bwanenena sa'eyana ginavetovehimeya.

¹⁷ ^mGinavetovehimeya be yo'o tulidiyao agaidiya
gaveyao galuwafadi medema hinamuliyeku.
E, medema moya'aidi Iya Kaiwabu hinaleleku.

¹⁸ Au hidedemi Iya Yaubada Kaiwabu gagahe,
tuwai-mo'ena gaitomai-nadi gagaheye-vagahina.”

Au hidedemi Yemesa Yaubada yana gahe giyakahina.

¹⁹ Kadu gigayo, “Yaku nuwanuwa hidede amine. Yo'o tulidiyao kalivai-dina Yaubada againe hihagaviladi-ma keke vehimeya moya'aina vitana kanaveledi. ²⁰ ⁿAu yadi leta kana'etoladina be kanagahedi higa kevakeva kilumina agaidiya mali kaliva hihawadavadavayed-ma keke hina'u'ani, mema kevakeva koyona. Kadu kaliva keke mali vevine buye hinadauda, meda anafaiweya vevine keke mali kaliva buye hinadauda. Kadu kevakeva kikibahidiyo dayagidi keke gidamadu-ma keke hina'u'ani. Kadu keke kevakeva dayagidi hinayuni. Au kanagahedi be hida Mosese yana vehimeya ana hawatai-dina hina'itave'avid. ²¹ Mosese yana vehimeya kaliva moya'aidiyo hihalamanena, fa'ina tuwai-mo'ena be hinunauwena adamoya melala moya'aina agaidiya kaliva Mosese yana gahe fa'ina hilulumamala, kadu sabati sa'eyana sa'eyana yana buki-vehimeya sinagogi agaidiya hihawahawana.” Au hidedemi Yemesa yana gahe.

Afositolo yo'o tulidiyao tovetumagana yadi leta hi'etoladina.

²² Tu afositolo ada tovetumagana adi tonagona, kadu tovetumagana adi yo'o matatabudi yadi lukahihi hiluyabuna, au hivehimeya be kaliva tufoidi yadi yo'o agaidiya hinavenuwadadanedi, ada hina'iveninisedi be Folo Banabasi Anidiyoka againe buye hinana. Au kaliva adi'iselu hivenuwadadanedi, adi egana Yudasi kadu hivewagana Basabasa, ada Sailosi. Au badi kaliva yamumudiyao tovetumagana matadiya. ²³ Ada leta hiveledi be hinanauwena. Leta againe hidede amine hi'etoladi higayo,

“Yo siule tobohiyameyao, omi yo'o tulimiyao tovetumagana Anidiyoka, Siliya kadu Silisiya agaidiya wamimiyami amanadi. Ime

^m 15:16 Emo 9:11-12 ⁿ 15:20 1Veh 17:10-16

tobohiyamiyao afositolo ada tovetumagana adi tonagona yami leta a'etoladina be wana'itana.

²⁴º Kaliva tufoidi yama yo'o agaimeya valeyadi anogalina, higa badi omi agaimiya hi'ela be yadi gahe againe ase'asemi hi'ive'akolukoluna, ada vaita yami vetumagana hidakwe'uni. Wowomi ana tomogolota kadu Moses yana vehimeya moy'a'ina ana itave'avina fa'ina higahemi. Tu keke yama vehimeya againe hida'ela, au taudiyao yadi nuwenuweya hi'ela hilukahihi. ²⁵Hidema fa'ina moy'a'aima nuwama sa'eyana avehimaya be yama kaliva tufoidi avenuwadadanedi ada omi agaimiya ana'iveninisedi. Au tobohiya'ase'asemeyao Banabasi Folo badi yama kaliva buye hina'ela. ²⁶Banabasi Folo ma yawaidi hihawahegena be Keliso yana faiseweya kabisona hina'alika. ²⁷Tu au yama kaliva adi'iselu a'iveninisedi, adi egana Yudasi kadu Sailosi. Ime hida leta againe avenuwa'atami amine, meda badi awadiya hina'alakakila. ²⁸Au Alu'aluwa Mahalina matane kadu ime matameya gilubodana be keke vehimeya moy'a'ina omi agaimiya anaseni, au hida vehimeya lakahinaga anasena.

²⁹º Higa keke kevakeva kilumina agaidiya mali kaliva hinauwedi be hihawadavadavayed-ma wana'u'ani. Kadu keke kevakeva dayagidi wanayuni, kadu kevakeva kikibahidiyo dayagidi keke gidamaduma keke wana'u'ani. Kadu kaliva keke mali vevine buye hinadauda, meda anafaiweya vevine keke mali kaliva buye hinadauda. Ka'i hida hawata wana'itave'avidi amine, wanamiyami hagihagina. Kafoi."

³⁰Tu leta hi'etoladina gihavaina, yadi kaliva hi'atuhegedi be hina Anidiyoka. Medede againe tovetumagana moy'a'idi hikovavaga'auhi-'owodi be leta hiveledi. ³¹Au leta ana hawa hinogalina againe, hivemwamwala fa'ina yadi venuwa'ata yamumuna againe nuwadi hikivetoyogina. ³²Ada badi Yudasi Sailosi Yaubada bonana ana to'awatalatalaina, ada hilumamala lauva tunugina be tovetumagana hilu'ageyedi nuwadi hikivetoyogina. ³³Au medede againe himiyami lauva tunugina yo hikidewadewa be hinayewadi. Badi tovetumagana hi'atuhegedi higayo, "Yaubada buye wanana." Ada au badi hi'iveninisedi-ma agaidiya hiywadi. [³⁴Tu bana Sailosi ma nuwanuwana ginamiya fa'ina keke gidana.] ³⁵Tu Folo Banabasi Anidiyoka againe himiyami ma'l lauva tunugina, ada badi'iyyao kadu kaliva velugadiyao buye hivemwahala, Kaiwabu bonana hilulumamalena.

Folo Banabasi buye hivewageya fa'ina hinuvehaila.

³⁶Himiymami tu Folo Banabasi gigahena gigayo, "Kanana tovetumagana melala moy'a'ina agaidiya boi kana Kaiwabu bonana kalumamalena-

º 15:24 Af 15:1 ¶ 15:29 Af 15:20

ma kana'itadi, be kanahalamanena ka'i yadi vetumagana gitubuga o ka'i keke." ³⁷⁻³⁸ ^qBana Banabasi ma nuwanuwana Yoni-Maki buye hinanauwena tu Banabasi yana nuwanuwa Folo matane keke haghagina, fa'ina boi yadi naudadana Famifiliya againe ginuyabuyabudi be giyewana, au keke yadi faisewa ana lauyabu againe buye hidamiyami. ³⁹Hidema fa'ina yadi wanuwakoyo tu buye hivekwageya ada hinuvehaila. Banabasi Maki ginauwenra ada wakeya hiyage be himula ana egana Saifilasi againe hina. ⁴⁰Tu bana Folo ma Sailosi givenuwadadanena be buye ginanauwena. Ada tovetumagana badi Kaiwabu nimane gisedi be yadi faisewa againe ginanuwadogedi, ada au hilowoga. ⁴¹Adafafali adi egana Siliya kadu Silisiya agaidiya hinumiyamianana, tovetumagana adi yo'o tulina tulina hilulu'ageyedi be yadi vetumagana ginatubuga fa'ina.

Timoti badi Folo Sailosi gibwa'ulidi.

16 ¹Folo ginumiyamianana tu melala adi egana Debi Lisidila agaidiya giyemu. Ada medede againe tovetumagana sa'eyana gimiayami, ana egana Timoti. Hinana ma kadu tovetumagana ada badi vineYuda tu tamana ma kwanaGiliika. ²^sAda tovetumagana moy'aidi Lisidila againe kadu Aikonumi againe Timoti hihawaveyamumuyena. ³Au Folo nuwanuwana Timoti bana ginabwa'ulina, ada melala tulina tulina hinanudadanidi-ma agaidiya miYuda himiyami be moy'aidi hihalamanena Timoti tamana kwanaGiliika, fa'ina Folo Timoti wowone Yaubada yana iya'iyaya gitomogolohina be miYuda keke hinakiloweni. ⁴^tAda melala tulina tulina agaidiya hinunumiyamianana tu afositolo kadu tovetumagana adi tonagona Yelusalema againe gavaimi hihawameya-ma badi tovetumagana hivenua'atadi be higa vehimeyai-dina hina'itave'avidi. ⁵Ada au tovetumagana adi yo'o tulina tulina yadi vetumagana gitubutubuga kadu aiyeta sa'eyana sa'eyana himoyamoya'ai.

KwanaMasedoniya giyowanina ma Folo gi'avayaunena.

⁶["]Tu Folo ana bwa'uli buye hinunudadanima Alu'aluwa Mahalina gihawatadi be kekefafali ana egana Esiya againe Kaiwabu bonana hinalumamalen. Gihawatadi fa'ina, fafali adi egana Filidiya Galesiya adihinafe ya hinauna. ⁷Ada fafali ana egana Maisiya tufone hiyemu againe, hinuwanuwa vaita fafali ana egana Bidiniya againe hidana, tu Yesu Alu'aluwana kadu gihawatadi. ⁸Hidema fa'ina Maisiya hinafane hinauna hinauna tu melala sa'eyana ana egana Talowasi againe hihobu. ⁹Ada bogi againe Folo gi'eno'ita ada yana ita againe kwanaMasedoniya gititana, gimidimidi tu give'ove'o'olena toyogina gigayo, "Masedoniya

^q 15:37-38 Af 12:12,25, 13:13; Kl 4:10 ^r 16:1 2Ti 1:5 ^s 16:2 Fl 2:19-22

^t 16:4 Af 15:23-29 ^u 16:6 Af 18:23

agaimeya uda'ela udavelugama.”¹⁰ Ada Folo hidede amine gi'en'ita fa'ina, (iya Luke badi buye) akidewadewa be Masedoniya againe anamaduna. Au anuwanuwa higa vaita Yaubada givehimeyema be Venuwa'ata Yamumuna miMasedoniya agaidiya analumamalena.

Lidiya Yesu againe hivetumagana.

¹¹ Akidewadewa ada wakeya ayage digo Talowasi ahege tu himula ana egana Samodelesi againe adamana. Bogi ada mala gilauna kadu adamana, melala ana egana Niyafolisi againe ayemu. ¹² Ada medede againe ahobu, au ana melala ana egana Filifai againe. Filifai Masedoniya anafafaliya gidauda ada medemafafali-nadi againe Filifai melala lakahina. Ada melala-mo'ena miLoma hive'alahina. Ada au medede againe aiyeta tufona amiyami. ¹³ Ada sabati againe melala tufone ana gufeya ahobu. Avaita gufa afa'aine miYuda ve'ove'o'ola fa'ina tova moy'a'ina hidavagavaga'auta. Au ayemu ada ahiyoto be vevine ahe hivaga'auta-ma agaidiya avebutu alumamala. ¹⁴ Ada tovanenega agaidiya kwamayoku sa'eyadi himiyami, adi egana Lidiya badi vineTaiyatala. Yadi faisewa ma kaleko likelikena fatana lakahina ana kimonevedamana. Ada badi Yaubada hihawadavadavana. Au Folo gilumamala againe, Kaiwabu nuwadi gikiyauna be yana laumamala hivenogalena. ¹⁵ ^vHivetumaganeniyohibafitaiso, badi'le kadu yadi manuwa hinagena ana yo'o buye'i. Hibafitaiso gihavaina, hive'o'olema toyogina higayo, “Ka'i omi wanuwanuwa vaita ima Kaiwabu adavetumagane-mo'eni, au wa'ela be yama manuwuya wanamiyami.” Ada au hisive'ayuyma.

Folo Sailosi Filifai againe deliya hisedi.

¹⁶ Tova sa'eyana ve'ove'o'ola ana abavaga'auta againe anauna tu agetoga kwamayoku edeya amaduhagana, kwamayoku-nadi balauma giluvaiyena. Bana balauma halamana givelevelena be gavadi gavadi aimo ginalakayemu-ma, bana kwamayoku gihawahawemogatalena. Ada kaliva vevine moy'a'idi agetoga ana tovehimeya mani hivaleveledi be aimo gavadi badi agaidiya ginalakayemu-ma kwamayoku ginahawemogatalena fa'ina. Ada au bana yana hawavemogatala againe ana tovehimeya yadi mani lakahina hivaivaina. ¹⁷ ^wAu kwamayoku Folo kadu ime buye gimulimuliyema, gikovakovadona gigayo, “Hida kalividina Yaubada Getane-mo'an yana tofaisewa. Kibababala ana eda fa'ina omi agaimiya hilulumamalena.” ¹⁸ ^xAu hidede amine ginunauwena aiyeta a gavaiyehi tu Folo dibuna gitoyoga, fa'ina gihagavilana yafune againe gigahe gigayo, “Yesu ana eganeya gavehimeye be kwamayoku unanuyabuyabuna.” Ada auhe'ama yafune gimadunuyabuyabuna.

^v 16:15 Af 16:33, 18:8 ^w 16:17 Mk 1:24 ^x 16:18 Mk 16:17

¹⁹Tu agetoga ana tovehimeya yadi mani inubana kwamayoku yana hawavemogatala againe a gihavaina-ma hi'ayaunena. Hidedemi hi'ayaunena fa'ina, Folo Sailosi himadukive'avidig abavedewayauga melala hinafane hitaidi be melala ana tonagona matadiya hisedi. ²⁰Au tonagona, badi miLoma, matadiya hisedi tu higahe higayo, "Hida hima kalivai-dina miYuda, ada badi fa'idiya vekwageya lakahina yada melaleya gilakayemu. ²¹Dewa tulina hivelavehawalayena ada dewai-nadi againe ide Loma kaliva yada vehimeya hihawatana. Au ide Loma kaliva fa'ina keke adafaiweya yadi vehawala kana'abini o ka'i kanadibumuhigeni." ²²Badi agetoga ana tovehimeya hidedemi higahe tu kadu yo'o hivelbutu Folo Sailosi himunumunudi. Au melala ana tonagona hivelhimeya be tolugaviya adi kaleko hinavehalilini-yo hinalaulaudi. ²³Ada ahe himunukoyokoyodi-yo deliya hihegenauwedi, ada deli ana to'itave'avina hivelhimeyena be gina'itave'avi-hagihagiyedi. ²⁴Au to'itave'avina hida vehimeya ginogalini-yo abamiyami hinagene-mo'ane gisedi, ada agedi yowana foleflegina againe hihuya-yo hilokana.

Yaubada li'uli'u gi'iveninisena be Folo Sailosi deliya gisehobuyedi.

²⁵Tu bogi nafone Folo Sailosi hivelove'ola kadu Yaubada againe hikwelikweli tu filisina velugadiyao hivanevanenega. ²⁶Hikwelikweli tu auhe'ama li'uli'u lakahina gilakayemu ada deli ana manuwa gili'uli'u. Kadu auhe'ama wanafali moyaina gi'ayauyau-'owona, ada filisina moyaidi adi bulava kainumula gi'agologolohina. ²⁷Au deli ana to'itave'avina gi'enohabalutuga, ada deli ana wanafali gi'ayauna-ma gi'itana againe, ginuwanuwa vaita filisina moyaidi ahe hida'ota fa'ina yana ilama gisiwakana be tauna ginaluve'alikana. ²⁸Tauna gidaluve'alikana ma Folo gikovadona gigayo, "Umiya, keke tauni unaluve'alika! Au we'a moyaima amimiyami."

²⁹Au to'itave'avina mahala fa'ina gikova. Givaini-yo gimaduluku ada Folo Sailosi agediya gi'ibo'ula-mo'a tu yana wamatauta givetavetatava. ³⁰Ada au deliya gisehobuyedi digo gitoliluvelovedi gigayo, "Kaliva, gavadi ganagani-yo Yaubada yana kibababala gananuhagani?"

³¹Badi higayo, "Kaiwabu Yesu againe unavetumagana be kibababala unanuhagana, o'eni kadu ya manuwa hinagena yo'oi-dina buye'i." ³²Kadu Kaiwabu bonana bana againe kadu yana manuwa hinagena moyaidi agaidiya hilumamalena. ³³^aAda bogi nafona nonogana to'itave'avina ginauwedi be adi koliya gikolana. Ada keke gidaboda, auhe'ama bana'e kadu yana manuwa hinagena moyaidi hibafitaiso. ³⁴Hibafitaiso gihavaina, to'itave'avina Folo Sailosi yana manuweya givega'auledi be adiga gikidewedewena. Ada au bana'e yana manuwa hinagena buye hivemwamwala-mo'a, Yaubada againe hivetuvetumagana fa'ina.

MiLoma tonagona hikoyo fa'ina Folo gidakeyedi.

³⁵ Tu mala gilauna miLoma tonagona yadi filisimani hi'liveninisedi, vehimeya hiveledi be deli ana to'itave'avina hinagahena hinagayo, "Wadema kaliva adi'iselu unayaudi be hinana." ³⁶ Au yadi vehimeya to'itave'avina ginogalini-yo Folo givenuwa'tana gigayo, "Tonagona yadi vehimeya hisena be o'eni Sailosi buye ganayaumi be wanana. Au wanana tu yami lowoga keke kaliva moy'aidi matadiya."

^{37^b}Tu Folo filisimani agaidiya gigahe gigayo, "Badi Loma tonagona nonogana miLoma yada vehimeya gigahe amine keke hidahuluva. Vaita nagona kaliva hidamidivedewayaugidi-yo muliya fanisi ana vehimeya hidaseni. Tu ime Loma kaliva nonogana keke hidavedewayaugima, au himaduvehimeya be tolugaviya kaliva moy'aidi matadiya hilaulaumayo deliya hihegenauwema. Ada tova adamoya nuwanuwadi hinawavima be ananaukau. Keke-mo'a! Au Loma tonagona taudiyao hidedei hida'ela hidayauma."

³⁸ Au filisimani Loma tonagona agaidiya hida gahe hi'awatalatalainena, ada Folo Sailosi higayo, Ime Loma kaliva, ma badi hinogalini-yo au himatautave'ine. ³⁹ Au hina badi agaidiya higahe higayo, "Ime akoyo fa'ina keke adavedewayaugimi miLoma yada vehimeya gigahe amine. Au nuwanuwama wanahobu be yama melala wananyabuyabuna." ⁴⁰ Ada au Folo Sailosi deliya hihobu be Lidiya yadi manuweya hina. Ada medede againe tovetumagana buye hivaga'auta be hilu'ageyedi. Hilukahihi gihavaina, au hilowoga.

MiTesalonaika Folo hivekwageyena.

17 ^{1^c}Folo Sailosi hinauna tu melala adi egana Amififolisi Afoloniya hinumiyamiyanana, kadu hinauna tu melala ana egana Tesalonaika againe hiyemu, ada medede againe miYuda yadi manuwa-abavehwala sinagogi gidauda. ^{2^d}Ada Folo yana dewa tova moy'aina amine sinagogi againe ginauna, ada sabati tohiye Yaubada bonana tuwai-mo'ena Veyao Tuwaina ana bukiya hi'etoladina-ma againe gilumamaledi. ³Au bonai-nadi giyauyauna, Yaubada yana Tovegida Keliso fa'ine gikivetuvetunudi. Gigahedi gigayo, "Yaubada bonana eto'etoladina gigahe vaita Keliso aulolo kaliva nimadiya anafaiweya gidavaina, kadu gida'alika be gidamididi-havagi. Ada Yaubada yana gahe keke ginabe'u fa'ina, au hida gaitoma yana Tovegida Keliso againe ahe gilakayemu. Ada Bana hida kalivai-nadi ana egana Yesu tova adamoya omi agaimiya galulukahiihyena, medema Yaubada yana Tovegidai-nadi." ⁴Ada miYuda tufoidi Folo yana gahe hivetumaganena, ada Folo Sailosi

^b 16:37 Af 22:25 ^c 17:1 1Te 2:1-2 ^d 17:2 Lu 24:26-27; Af 9:22

hivetobohiyanedi. Meda anafaiweya yo'o tulidiyao kavewagadi miGilika tufoidi moy'a'idi Yaubada tova moy'a'ina hihawadavadavana-ma hivebutu Yesu againe hivetumagana. Kadu wakwamayokudiyao moy'a'idi hivetumagana.

⁵ Tu miYuda ma higa'uma'uma, fa'ina melala ana kaliva koyodiyao hinunu-kawowo ma hivaga'auhidi be hisiveyo'odi-yo hivebutu hi'ago'agodadaga, ada au kaliva moy'a'idi hive'atalalakalaka. Ada bana kaliva ana egana Yesoni yana wamanuweya amine himaduna, yana wanafali hidobona, higa vaita Folo Sailosi hidanuhagadi be yo'o agaidiya hidasehobuyedi. ⁶ ^eTu hilele-wayogedi fa'ina, bana Yesoni kadu tovetumagana velugadiyao buye hikive'avid be melala ana tonagona agaidiya hitaidi. Hiyemuyemu tu hikovakova higayo, "Hida hima kalivai-dinafafali tulina tulina agaidiya vekwageya hiseyemayemaunena, ada adamoya yada melala againe kadu hivebutu. ⁷^fAda bana Yesoni yana manuweya giselukuwed. Au badi moy'a'idi yada Tokaiwabu lakahina Sisa yana vehimeya hiyawelina, fa'ina higahe vaita yadi tokaiwabu kaliva tulina, ana egana Yesu." ⁸ Ada yadi gahe yo'o kadu melala ana tonagona hinogalini-yo au hive'atalalakalaka. ⁹ Au tonagona hivehimeya be Yesoni tobohiyaneyao tovetumagana buye mani againe hinalaufata be higa keke kadu vekwageya hinaseyemauneni. Ada hilaufata-yo au hiyaudi be hina yadi manuweya.

Beliya melala againe Folo vekwageya kadu ginuhagana.

¹⁰ Tu mala ahe gibogi Tesalonaika tovetumagana Folo Sailosi hil'atuhegedi be melala ana egana Beliya againe hinana. Ada ahe hiyemu au miYuda yadi sinagogi againe hina. ¹¹^gAda badi miYuda Beliya againe keke miTesalonaika nuwadi abodana amine, au miBeliya nuwadi yauyaugina. Nuwanuwadi lakahina Folo yana laumamala hinanogalina, ada aiyeta sa'eyana sa'eyana Yaubada bonana tuwai-mo'ena hi'etoladina-ma hi'ita'itanuwenuwena be hinahalamanena ka'i Folo yana laumamala velemo'ena o ka'i fwaya. ¹²^hAda au miYuda tufoidi moy'a'idi hivetumagana, kadu Gilika vevine wakwamayokudiyao moy'a'idi ada Gilika kaliva moy'a'idi hivetumagana.

¹³ ⁱTu badi miYuda Tesalonaika againe Folo valeyana hinogalina, higa Yaubada bonana Beliya againe kadu gilulumamalena. Hinogalini-yo Beliya againe hiyemu, hivebutu kaliva hivesilakahidi ada hisiveyo'odi be hinuwanuwakoyo. ¹⁴ Yo'o hinuwanuwakoyo fa'ina, tovetumagana auhe'ama bana Folo melala taliya againe hivagahegena be ginayage, tu badi Sailosi Timoti Beliya againe himiya. ¹⁵ Ada badi kaliva Folo hivebwa'uliyena-ma melala ana egana Adenisi againe hivegaloveni tu

^e 17:6 Af 16:20 ^f 17:7 Lu 23:2 ^g 17:11 Yo 5:39 ^h 17:12 Af 17:4 ⁱ 17:13 Af 14:19

Beliya againe hiywadi. Nagona Folo venuwa'ata Sailosi Timoti fa'idiya giveledi gigayo, "Wanagahedi be iya agaikuya hinamadu'ela." Gigahediyo badi hilowoga.

Folo miAdenisi agaidiya gilumamala.

¹⁶ Tu Folo Adenisi againe Sailosi Timoti fa'idiya gibodaboda tu ase'asena gi'u'aulolo, fa'ina kilumina keke sa'eyadi melalai-nadi againe hidauda-ma gi'itadi. ¹⁷ Kilumina moya'aidi gi'itadi fa'ina, aiyeta sa'eyana sa'eyana Yaubada bonana gilulumamalena. Badi miYuda kadu yo'o tulidiyao kalivai-dina Yaubada hihawadavavana-ma sinagogi againe bana buye hive'agahegahe, kadu gaveyao melala hinafane hinunudadana-ma badi agaidiya gilulumamala. ¹⁸ Kadu tonuwahuya tufoidi bana Folo buye hive'agahegahe adi yo'o luhei, sa'eyana adi egana Efikuliyani, kadu sa'eyana adi egana Sitoika. Tufoidi higayo, "Hida hima togakahikahi kwavakwavana vaita gavaimi gidalukahiiyeni?" Kadu tufoidi higayo, "Ka'i viviliwa tulidi fa'idiya gilulumamala." Hidedemi higahe higa Folo Yesu Tauna kadu yana mididi-havagi gilumamalena fa'ina. ¹⁹ Tova moya'aina gilulumamala fa'ina, hiyowanina be Koniselo yadi vaga'auta againe hivega'aulema, abavaga'auta ana egana Aliyofago. Ada ahe hivaga'auta-yo higahe higayo, "Nuwanuwama hida eda ivaguna o ululukahiiyena-ma anahalamanena. Gavaimi uvehawala? ²⁰ Nuwanuwa tufona ulumamalena-ma boi keke tamo hidede amine adanogalini, ada nuwanuwama ana kaivila anahalamanena."

²¹ Tu miAdenisi kadu hawahawala melalai-nadi againe himiyami-ma, higa keke tamo gavadi hidagani tu tova moya'aina nuwanuwa ivaguna tulina tulina hilulukahiiyena o ka'i hivanevanenegena. ²² Badi higahe tu bana Folo gitowamidi Koniselo yadi vaga'auta Aliyofago againe givebutu gilukahiihi, gigayo, "MiAdenisi-yo! Omi'iyao viviliwa tulina tulina wahawadavavadi ma a galitana. ²³ Yami melala hinafane ahe ganudadana yami abahawadavava ga'ita'itana tu atudidiga sa'eyana ganuhagana-ma againe etoladi gidadauda gigayo,

Viviliwa sa'eyana ana egana
keke kadalafilameni-ma ana abahawadavavada.

Bana keke wadalafilameni tu au ai'adi wahawadavavana-ma, adamoya iya ga'ela be Bana fa'ine ganahawavemogatala. ²⁴ Bana ana egana Yaubada, babi gibubuna kadu gaitoma moya'aina babiya himimiyami-ma gibubudi, ada Bana Yaubadai-nadi lobama kadu babi ana Kaiwabu, tu keke manuwa-tafalolo tomiyababi hikivemididina-ma agaidiya gidamiyami. ²⁵ Kadu keke tomiyababi nimada gidavetumaganeni vaita Bana fa'ine tamo gavadi kadafaisewani, keke. Au Bana Tauna

tomiyababi moy'a'ida yawaida inubana, kadu gaitoma moy'a'ina giveleda.²⁶^k Ada nagona kaliva sa'eyana gibubuna ada bana kalivainadi againe yo'o tulidi tulidi hitubuyemu, ada givehimeyed be hinave'aliyahega babi matatabuna hinavemagana. Ada Bana anakaibe yo'o tulidi tulidi yadi tova gisena, yadi tubuyemu kadu yadi lauyabu givehimeyena, ada gavafafali gavafafali agaidiya hinamiyami-ma kadu givehimeyena.²⁷^l Ada Yaubada hidedemi gibubudi be kaliva Bana'e hinalelena fa'ina. Nuwadi uyu'uyuyuna fa'ina hinalelena ada ka'i hinakidadanina be hinanuhagana. Tu Bana Yaubada keke lauveya gidamiyami, au moy'a'ida llideya gimimiyami.²⁸ E, tamo hakwadi gigahe gigayo, Bana'e yawaida inubana, kadu yada naudadana inubana, kadu yada miyami inubana. Kadu anafaiweya yami tonuwahuya tufoidi ahe higahe higayo, Kadu ide moy'a'ida Bana natuneyao.

Folo yana laumamala giluyabuna.

²⁹^m Ada Yaubada gibubuda fa'ina, keke kananuwanuwa vaita Bana anununa kilumina amine, higa gola o siliva o ka'i kuga againe kaliva yadi nuwenuweya yadi ikilukiluma yamumuna amanadi.³⁰ Au kaliva kilumina hibubudi aimo fanifanidiyo ana toveya, ada medema tovainadi Yaubada keke gidanuwenuwedvi vaita matahiwadi gidaveledi, tu tova adamoya kaliva moy'a'idi fafali tulina tulina agaidiya givehimeyed be yadi dewa koyona hinavenikohiyena.³¹ⁿ Hidedemi hinahagaviladi fa'ina vedewayauga ana tova ahe gisena be tomiyababi moy'a'ida ginavedewayaugida. Yada dewa kabi'ona be lakahina gihalamane-'owona fa'ina, yana vedewayauga au tunutunugina. Ada Kaliva sa'eyana givegidena be Bana ginavedewayaugida. Ada Bana Kalivainadi alikeya gisivemididina fa'ina, ide kahalamanena Bana velemona ginavedewayaugida." Au hidedemi Folo yana laumamala.

³² Tu badi Folo yana gahe kaliva yana mididi-havagi fa'ina hinogalina againe, tufoidi hihawavelaigena tu tufoidi ma higahena higayo, "Nuwanuwama hidevama fa'ina unalukahihi-havagi be ananogalina."

³³ Ada au Folo Koniselo yadi vaga'auta againe gihobu.³⁴ Tu kaliva tufoidi Folo hivetobohiyanena, hivebutu hivetumagana. Ada badi agaidiya kaliva sa'eyana gimiyami, ana egana Daiyonisiyo, bana Aliyofago koniselo sa'eyana, kadu kwamayoku adi egana Damalisi, kadu kaliva velugadiyao.

Folo Kolinita melala againe gilumamala.

18 ¹Tu Folo ahe Aliyofago Koniselo agaidiya gilukahihi gihavaina, gikidewadewa be Adenisi ginuyabuyabuni tu gina melala ana

^k 17:26 Aba 10:32, 11:9 ^l 17:27 Ais 55:6 ^m 17:29 Aba 1:27; Af 19:26 ⁿ 17:31 Yo 5:22; Af 10:42

egana Kolinita againe. ² Medede againe Yuda kaliva sa'eyana ginuhagana, ana egana Akwila. Banafafali ana egana Fonito againe gitubuga, ada vavinena adi egana Filisila. Au fafali ana egana Itali againe vavinena buye hitauya be Kolinita againe hiyemuna-mo'a. Itali hinuyabuyabuna fa'ina Loma Tokaiwabu lakahina, ana egana Sisa-Kelodiyo, givehimeya be miYuda moy'aidi Itali melalina lakahina Loma hinanuyabuyabu'-owona. ³ ^oAu Folo gina gi'itadi, ada badi yadi faisewa bana yana faisewa amine higa falai ana i'ona'onaga, fa'ina badi agaidiya gina gimiyami buye hififaisewa. ⁴ Ada sabati sa'eyana sa'eyana agaidiya manuwa-abavehawala ana egana sinagogi againe ginauna, miYuda kadu yo'o tulidiyao kavewagadi miGilika gigahegahe-ya'aya'alidi be yana laumamala hinavetumaganena.

⁵ ^pTu badi Sailosi Timoti Masedoniya againe hitauya ma ahe hiyemu againe, Folo faisewa sa'eyanaga givebutu gi'abi'abina higa tova moy'a'aina gilulumamala, Yesu au Yaubada yana Tovegida Keliso ma miYuda agaidiya gihawahawemogatalena. ⁶ ^qTu badi higawoluwluyena ada hihawave'iyo hoyohoyena againe, ana aikeva ana fwayafwaya badi matadiya gisibutuna be higa ana vehimeya badi agaidiya gihavaina-ma ana aituha. Au gigahedi gigayo, “Ka'i keke yawai-vagahimi wananuhagani, au taumiyo. Keke aku vita. Au ganahawa'atuhenehenemi be yo'o tulidiyao kalivai-dina agaidiya ganana ganalumamala.”

⁷ Ada au ginuyabuyabudi tu gina yo'o tulidiyao kalivana sa'eyana yana manuweya giluku gimiyami, ana egana Titiyo-Yasito. Bana Yaubada gihawadavadavana ada yana manuwa sinagogi lilin. ⁸ Ada kaliva sa'eyana ana egana Kelisifo, bana sinagogi ana tovehimeya, Kaiwabu againe givetumagana, bana'e kadu yana manuwa hinagena buye hivetumagana. Kadu miKolinita tufoidi moy'aidi Folo yana laumamala hinogalini-yo hivetumagana ada hibafitaiso.

⁹ ^rTu bogi sa'eyana Folo gi'eno'ita ada yana ita againe Kaiwabu gigahena gigayo, “Keke unamatatauta, au una'atuvefa'ilota tova moy'a'aina unalulumamala, keke una'ilova. ¹⁰ Iya o'eni buye kamimiyami fa'ina keke tamo hakwadi anafaiweya ginamunu, au hida melala againe yaku kaliva be yaku vevine moy'aidi himimiyami.” Au hidedemi Kaiwabu gigahe. ¹¹ Ada au Folo Kolinita againe malamala sa'eyana kadu hafuna gimiyami, Yaubada bonana gilumamalena.

MiYuda Folo hivekotuna.

¹² Tu bana Galiyo, kwanaLoma, fafali ana egana Akaiya againe gikabemani ana toveya, miYuda hivevai be Folo hikive'avina ada kotu

^o 18:3 1Ko 4:12 ^p 18:5 Af 17:14-15 ^q 18:6 Af 13:46 ^r 18:9 1Ko 2:3

againe hinawena. ¹³Higahe higayo, “Hida hima kaliva tova moya'aina kaliva gisisive'auyedi be eda tulina amine Yaubada hinahawadavadavana, ada edai-nadi yama vehimeya gihawatana.”

¹⁴^sAda bana Folo gidagahe ma bana Galiyo miYuda gigahedi gigayo, “Omi miYuda wanogali! Ka'i hida kaliva tamo hakwadi againe gidakai'afu o ka'i gidaluve'alika ada yana koyona lakahina amine digo, au gadahawahegeku be yami gahe gadanogalina. ¹⁵Tu omi yana hifufugaga fa'ina wavekwageyena, kadu egana tulina tulina kadu taumiyo yami vehimeya fa'ina wavekwageyena. Au taumiyo wanakivetuvetununa. Hida omi yami gaitoma fa'ina iya keke ganavedewayauga.” ¹⁶Ada au giwavidu be vedewayauga ana manuwa againe hihobu. ¹⁷Hihobu tu kaliva ana egana Sosidenisi hikive'avina, bana sinagogi ana tovehimeya. Hikive'avina digo abavedewayauga ana eda'awaneya himununa, tu bana Galiyo keke gidahawatadi.

Folo Anidiyoka againe giywana.

¹⁸Tu Folo tovetumagana Kolinita againe buye himiyami ma'i lauva tunugina yo gihegedi, ada gilowoga be ginanafafali ana egana Siliya againe. Ada badi Filisila Akwila hibwa'ulina. Taliya ana melala ana egana Senikeliya againe hiyemu tu bana Folo boi Yaubada againe giwonadabadaba fa'ina, u'una gitotona, higa yana wonadabadaba ana aituha giluyabuna. Au wakeya adi'litoto hidododi be hinawedi. ¹⁹'Ada melala ana egana Efeso againe hiyemu ada medede againe badi Filisila Akwila himiya tu bana Folo ginuyabuyabudi be ginunudadana. Au sinagogi againe gina miYuda buye hive'agahegahe. ²⁰Ada badi hive'o'olena be agaidiya ginamiya lauva tunugina tu givekekeyedi. ²¹^uAda au gilowoga againe gigahedi gigayo, “Ka'i Yaubada ginahawahegeku amine, omi agaimiya ganayewaku.” Ada au gina wakeya giyage be Efeso ginuyabuyabuna. ²²Hinauna tu melala ana egana Sisaliya againe hiyemu au Folo gihobu be gina Yelusalema againe tovetumagana gilusiuleyediyu au Anidiyoka againe gihobu. ²³Ada Anidiyoka againe gimiyami ma'i lauva tunugina tu kadu givebutu ginunudadana, Galesiya ana fafali kadu Filidiya ana fafali agaidiya ginumiyamianana. Ada melala moya'aina agaidiya tovetumagana gilu'ageyedi be tova moya'aina Yesu hinavetuvetumaganena.

Tolaumamala ana egana Afolosi kahihina.

²⁴^vTu Yuda kaliva sa'eyana, ana egana Afolosi, Efeso againe gi'ela. Bana melala lakahina ana egana Alekisanidiya againe gitubuga, ada bana tolaumamala haghagina, kadu Veyao Tuwaina ana buki

^s 18:14 Af 25:18-19 ^t 18:19 Af 17:17 ^u 18:21 Af 19:1; Ye 4:15 ^v 18:24 1Ko 3:5

gihalamane-hagihagiyena. ²⁵“Ada Kaiwabu yana Eda againe gisikulu ada yana wadibumuhiga gilulumamala, Yesu kahihina gilulukahihiyena tunutunugina. Tu bafitaiso Yesu ana eganeya ma keke gidahalamenanen, au Yoni yana bafitaisogaga gihalamenanen. ²⁶Au givebutu sinagogi againe ase'asena bouna gilumamala. Tu badi Filisila Akwila hinogalina againe, yadi manuwuya hivtega'aulena be Yaubada yana Eda fa'ina hikivetuvetununa. Gavadi aimo keke gidahalamane-hagihagiyeni, medema fa'ina hikivetuvetununa.

²⁷Himiyami tu tova sa'eyana Afolosi gigahe gigayo, “Fafali ana egana Akaiya againe iya ganana.” Au tovetumagana yana nuwanuwa hinogalini-yo hivelugana, leta Akaiya tovetumagana agaidiya hi'etoladina be higa Afolosi hinavetobohiyanena. Ada au gina giyemu tu tovetumagana medede againe givelugadi lakahina, badi Yaubada yana nuwadoga fa'ina Yesu Keliso againe ahe hivetumagana-ma kalivai-dina. ²⁸^xGivelugadi fa'ina yana laumamala againe miYuda gifaiwalahegedi, ada Veyao Tuwaina ana buki giyakayakahina be higa givehawaledi Bana Yesu velemo'ena Yaubada yana Tovegida Keliso.

Folo Efeso againe gilumamala.

19 ¹⁻²^yTu Afolosi Kolinita againe aimo gimihami tu bana Folo eda guwameya gina-ma amine ginauna, ada gina gihobu melala ana egana Efeso againe. Au medede againe tovetumagana tufoidi ginuhagadi, ada gitoliluvelovedi gigayo, “Boi omi wamidivetumagana ana toveya, ka'i Alu'aluwa Mahalina giluvaiyemi o ka'i keke?”

Badi higayo, “Keke. Alu'aluwa Mahalina ana egana boi keke tamo hakwadi gidayakahini-yo adanogalini.”

³Bana Folo gigayo, “Taumadi! Gavaiya'amine wabafitaiso?”

Badi higayo, “Yoni yana gahe amine abafitaiso.”

⁴^zAu bana Folo gigayo, “Yoni ma kaliva yadi dewa koyona hivenikohiyena-ma gikivebafitaisoyedi, ada gigahedi gigayo, Bana mulikuya gina'ela-ma wanavetumaganena, higa Yesu fa'ine gigahe.” ⁵Ada badi hidedemi hinogalini-yo au Kaiwabu Yesu ana eganeya hibafitaiso. ⁶Ada Folo nimana badi agaidiya giseni tu Alu'aluwa Mahalina giluvaiyedi-yo mali meya agaidiya hilukahihhi kadu Yaubada yana venuwa'ata gitunevehabalutugidi-yo hi'awatalatalainena. ⁷Ada adi yo'o ma kaliva tuwelo amine.

⁸Tu Folo givebutu manuwa-abavehawala ana egana sinagogi againe ginauna ada vaikohi tohiye agaidiya ase'asena bouna kaliva agaidiya gilulumamala, buye hive'agahegahe tu Folo Yaubada yana yo'ogaga ana luku fa'ina gilulukahihhi toyogina, higa gidasive'ayedi. ⁹^aTu badi tufoidi

^w 18:25 Af 19:3 ^x 18:28 Af 9:22 ^y 19:1-2 1Ko 3:6; Af 2:38, 8:15-16 ^z 19:4 Md 3:11

^a 19:9 Af 19:23

tagadi kuluna, keke nuwanuwadi hinavetumagana, ada kaliva moy'a'idi matadiya Kaiwabu yana Eda hihawavekoyoyena. Au Folo ginuyabuyabudi, ada tovetumagana gigahedi be buye hinuvehaila. Au aiyeta sa'eyana sa'eyana kaliva sa'eyana, ana egana Tilano, yana manuwa-abalaumamala againe kaliva buye hiveve'agahegahe. ¹⁰ Ada au hidedemi ginunauwena malamala luhei, fa'ina miYuda kadu yo'o tulidiyao kavewagadi miGilika moy'a'idi fafali ana egana Esiya againe himiyami-ma Kaiwabu bonana hinogalina.

Siva natuneyao higaluvaluva be yafune hinawavidi.

¹¹ ^bTu Yaubada Folo gifaiwalavelena be aituga fifiwala-mo'ena gififaisewana. ¹² ^cAda Folo kaliva gihawahegedi be bana u'una ana kaleko hitana fa'ina kadu kaleko faisewa fa'ina goline gihipohifoma hivaivaina be hinunauwena, to'aulolo agaidiya hisesen'i-yo hiyamuyamumu, kadu yafune badi to'aulolo agaidiya hiyemuyemu.

¹³ Tu Yuda tokwelikweli tufoidi hinunumiyamiyanana be yafune hiwaviwavidi. Ada au hinuwanuwa vaita ka'i Yesu ana egana hinayakahina, au yadi kwelikweli ginafaiwala, fa'ina hivebutu Kaiwabu Yesu ana egana hiyakayakahina be yafune hinawavidi fa'ina. Au yafune agaidiya higahe higayo, "Yesu Folo gilulumamalena amanadi, Bana ana eganeya avehimeyemi be wanayemu." Hidedemi higahegahe. ¹⁴ Ada kwanaYuda sa'eyana, ana egana Siva, natuneyao kaliva seveni hidede amine hihuluhuluva. Bana Siva higa abaveyao ana tofaisewa adi tonagona sa'eyana. ¹⁵ ^dBadi kaliva adiveseveni hidedemi Yesu ana eganeya hihuluva tu tova sa'eyana yafune gigahedi gigayo, "Bana Yesu gahalamanena kadu bana Folo gahalamanena, tu om'i'yao ma kaliva gaveyao?" ¹⁶ Kaliva wayafunena hidemi gigahe-yo kaliva tabodiya gihegelakahina, yana wafaiwala gimunukoyokoyodi, au konekonediyo kadu wadayadayagidiyao yana manuwa himadu'otayabuyabuna.

MiEfeso yadi kwelikweli ana buki hikabuna.

¹⁷ Ada miYuda kadu yo'o tulidiyao kavewagadi miGilika moy'a'idi Efeso againe himiyami-ma hida kaliva valeyana hinogalini-yo himatautave'ine, tu kadu Kaiwabu Yesu ana egana hikilakahi-mo'ena. ¹⁸ Ada au tovetumagana moy'a'idi hi'ela adi yo'o matadiya yadi dewa uyu'uyuyuna higa yadi kwelikweli tulina tulina hiyakayakahina-ma hiyauna. ¹⁹ ^eAda tufoidi moy'a'idi tokwelikweli yadi faisewa hi'abi'abina. Au yadi kwelikweli buki againe hi'etoladina-ma se'eyaine hi'aliyena be kaliva matadiya hikabuna. Au buki fatana hikilagalagana ada ana ve'atutamo'aina mani lakahi-mo'ena, kaliva fifti tausani (50,000) yadi faisewa aiyeta sa'eyana fatana amine. ²⁰ Ada au hida gaitoma

^b 19:11 Af 14:3 ^c 19:12 Af 5:15 ^d 19:15 Mk 1:24 ^e 19:19 2Veh 18:10-12

lakahina gilakayemu fa'ina, Kaiwabu bonana au toyogina ma moya'aidi hi'itana, ada valeyana give'aliyahega be kaliva moya'aidi hivebutu hivetuvetumagana, kadu yadi vetumagana gitubutubuga.

Folo yana naudadana fa'ina givevai.

²¹^fTu hida gaitoma ahe gilakayemu-yo au Alu'aluwa Mahalina Folo givehimeyena be higa Yelusalema againe ginayewana, ada fafali adi egana Masedoniya Akaiya amidiya ginana. Au tobohiyaneyao givenuwa'atadi kadu gigayo, "Hida fafali agaidiya ganana-yo gilubodaku be Loma againe gadana gadawakawaka." ²²Au ana toveluga adi'iselu Timoti Elasito gi'iveninisedi be Masedoniya againe hina tu bana tauna aimo fafali ana egana Esiya againe gimiyami.

Vekwageya lakahina Efeso againe gilakayemu.

²³Ada medema tovai-nadi vekwageya keke kabi'ona Efeso againe gilakayemu, au Kaiwabu yana Eda fa'ina kaliva hivekwageya. ²⁴Kaliva sa'eyana gimiyami, ana egana Demitiliyo, bana yana faisewa ma lokoloko siliva babiya hiyalayalanana-ma againe gibububuna. Badi miEfeso ma yadi viviliwa kwamayoku, adi egana Atemisa hihawadavadavadi, ada bana Demitiliyo yana tofaisewa buye Atemisa yadi manuwa-tafalolo anununa kabikabi'ona siliva againe hibububuna higa kaliva yadi abahawadavadava fa'ina. Ada anununa moya'aina hififaisewadi be kaliva hikimokimonedi fa'ina, tofaisewai-dina yadi mani keke kabi'ona hivaivaina. ²⁵Au Demitiliyo yana tofaisewa kadu mali kaliva yadi faisewa bana amine ma buye gikovavaga'auhidi gigahedi gigayo, "Kaliva wanogali! Hida yada faisewa againe mani lakahina kavaivaina ma wahalamanena. ²⁶^gAu taumiyo Folo yana huluva wa'itana o ka'i valeyana wanogalina. Bana gigahe vaita kilumina kaliva nimadiya hibubudi-ma keke velemo'ena viviliwa, ada kaliva moya'aidi ginuwa'abiyedi. Hidedei yada melala Efeso againe kadu fafali ana egana Esiya matatabuna againe ginuwa'abiyedi be bonana hivenogalena. ²⁷Medema keke gidalubodani, fa'ina ka'i kaliva hinavebutu yada faisewa hinahawavekoyoyena, au yada mani inubana ginahavahavaina. Kadu'e ka'i yada viviliwa kwamayoku Atemisa yadi manuwa-tafalolo hinakilowena, ada badi taudi yadi kikaiwabu ginahavaina, badi yada viviliwa kwamayoku Esiya kaliva moya'aidi kadu fafali tulina tulina kalivadi hihawadavadavadi amanadi."

²⁸Tu yo'o Demitiliyo yana gahe hinogalini-yo hi'il'a', hivebutu hikovakova higayo, "Badi Atemisa adi egana lakahina, ide miEfeso yada viviliwa badi'e." ²⁹^hHidedei hikovakova tu melala kalivai-dina moya'aidi hive'atalalakalaka. Au yo'o miMasedoniya adi'iselu hikive'avidi, badi Folo

^f 19:21 Lo 1:13 ^g 19:26 Af 17:29 ^h 19:29 Af 27:2

ana bwa'uli adi egana Gaiyasi Alisitako. Hikive'avidi-yo abavaga'auta lakahina againe se'eyaine himadunauwedi. ³⁰Tu bana Folo nuwanuwana tauna ginana, yo'o matadiya ginamidi ginalukahihi tu tovetumagana hihawatana. ³¹Kadu Esiyafafali ana tonagona tufoidi, badi Folo ahe hivetobohiyanena-ma kalivai-dina, venuwa'ata bana againe hi'iveninisena higayo, "Keke-mo'a abavaga'auta againe unaluku. Au siule, yama gahe udavenogalena."

³²Tu abavaga'auta againe kaliva tufoidi hidede amine hikovakova kadu tufoidi medede amine hikovakova, yadi kova tulina tulina fa'ina tufoidi moya'aidi gavadi-yo hivaga'auta-ma keke hidahalamenanen, au hiyo'o-kawowo. ³³Kaliva sa'eyana gimiymi, ana egana Alekisanida, ada bana'e miYuda hituwamadumadugena be yo'o matadiya ginamidi, fa'ina yo'o hivaita bana'e vekwageya inubana gidahalamenanen. Au nimane giluhawatadi be yo'o ginakivetuvetunudi ada hinahalamenanen vekwageya inubana keke bana againe. ³⁴Tu bana kwanaYuda ma hihalamenanen againe, moya'aidi hivebutu seyaseya'aine hikovakova higayo, "Badi Atemisa adi egana lakahina, ide miEfeso yada viviliwa badi'e." Ada yadi kovakova hinunauwena bai luhei.

Melala ana kalaka vekwageya gikwe'una.

³⁵Hidedemi hinunauwena tu kaliva sa'eyana, melala ana kalaka, gifaiwala be gigaheve'ilovedi. Hi'ilova-yo gigahedi gigayo, "Omi miEfeso wanogali! Kaliva moya'aidi hihalamenanen ide miEfeso Atemisa yadi manuwa-tafalolo ka'ita'itave'avina, badi'e yada viviliwa kwamayoku lakahidi. Kadu'e ide yadi kabala tabutabuna lobameya gihobu be ka'ita'itave'avina ma moya'aidi hihalamenanen. ³⁶Ada keke tamо hаkwadi hida gaitoma anafaiweya ginahawavefwayayeni, fa'ina yami ago'uga auwe wa'iloveni. Keke kaliva kwavakwavadiyo amine wanahuluva. ³⁷Hida kalivai-dina keke manuwa-tafalolo ana lokoloko tabutabuna hidaki'afuni, kadu yada viviliwa kwamayoku agaidiya keke hida'ihawadamana. Keke hidenedemi hidahuluva nonogana wakive'avidi be hidei abavaga'auta lakahina againe wa'aliyedi. ³⁸Ka'i bana Demitiliyo yana tofaisewa buye nuwanuwadi tamо hаkwadi hinavekotuna digo, kotu ana aiyeta fa'ina vehimeya gidadauda, kadu tovedewayauga himimiyami. Au adifaiweya hinana hinavekotudi. ³⁹Tu ka'i tamо gavadi fa'ina kadu nuwanuwami wanalukahihiyena, au koniselo wadavenuwa'atadi ada yadi vaga'auta againe hidanuwenuwena be vehimeya hidasesa. ⁴⁰Ka'i yada tovehimeya lakahidiyo Loma againe yada vekwageya valeyana hinanogalina, au vita kananuhagana. Ide kavekwageya-kawowo ada ka'i hinatoliluvaluva hinagayo, Gavadi-yo wavekwageya? Au keke-mo'a adafaiweya gavaimi kanagahedi, fa'ina keke kotu ana vehimeya amine kadahuluva." ⁴¹Ada au hidenedemi gilukahihi gihavaina, yo'o gigahedi gigayo, "Auwe, wanana yami manuweya."

Folo Masedoniya be Gilika adifafaliya ginu-havagi.

20 ¹Tu miEfeso yadi vekwageya ahe hiluyabuni-yo, au Folo tovetumagana gikovavaga'auhidi be ginalu'ageyedi. Ada gilumamaledi gihavaina, gilukafoiyedi be gilowoga Masedoniya againe gina. ²Ada medema ana fafali againe ginunumiyanana, ada yana laumamala moy'a'ina againe badi tovetumagana gilulu'ageyedi. Ada ginauna tu Gilika againe giyemu. ^{3ⁱ}Au medede againe vaikohi tohiye gimiyyami. Ada au givebutu gikidewadewa be wakeya ginayage be Siliya againe ginana tu miYuda yadi nuwanuwa sa'eyana ginogalina, higa nuwanuwadi hinaluve'alikana. Hidema fa'ina ginuwanuwa vaita Masedoniya ana fafali againe agene ginayewani-yo au ginana Siliya wa'amine. ^{4^j}Ada kaliva sa'eyana ana egana Sofata, Filasa natuna kwanaBeliya, bana buye hina. Kadu ana bwa'uli velugadiyao ma Alisitako Sekanido, adi'iselu miTesalonaika. Kadu Gaiyasi kwanaDebi, bana Timoti kadu kaliva adi'iselu Esiya ana fafali kalivai-dina adi egana Tikiko Talafimo. ⁵Au badi kalivai-dina wai hinagona be melala ana egana Talowasi againe hibodema. (⁶Iya Luke Filifai againe gamiyami ma Folo ginuhagaku.) Tu ime'eyao ma tafalolo lakahina fa'ina Filifai againe amiyami, tafalolo ana egana Beledi keke Wa'isina. Ada tafalolo gihavaina, ime ayage ada aiyeta faifi ahegedi tu yama kaliva Talowasi againe hibodebodema amanadi agaidiya ayemu, ada medede againe amiyami tafalolo sa'eyana.

Folo kaliva alikeya gisivemididina Talowasi againe.

⁷Tu Satadei bogi againe ime tovetumagana avaga'auta be buye ana'a sakalameni anavaina. Ada Folo gilumamala be mala ginalauna ginanuyabuyabudi fa'ina yana laumamala ginunauwena bogi nafone. ⁸Ada yama abavaga'auta manuwa getane gidauda, ada lamufa moy'a'ina vetawaneya hikabuna. ⁹Tu bana kwanatubulakahina sa'eyana, ana egana Yutiko, manuwa ana yogowahi againe gihiyoto. Ada bana Folo gilulumamala gilulumamala tu bana Yutiko gidunedune. Gidunedune tu gi'enomataiga ada gi'avelowoni tu gibe'u. Manuwa getana ana tutulagolota anaveto againe gimiyyami tu gibe'u be gihobu babiya. Au himaduhobu digo hifewana tu ali'alikana. ¹⁰Tu bana Folo gihobu kwamana gi'enotagona be gi'atulauhina. Au tovetumagana gigahedi gigayo, "Ase'asemi gina'ilova, au bana giyawa-havagi." ¹¹Gigaheyo abavaga'auta manuwa getane gilaka-havagi a'a gikihinenet be tovetumagana buye hi'a. Ada badi buye hilulukahihi-malalau tu Folo gilowoga. ¹²Tu badi tovetumagana ma kwanatubulakahina yawayawana hinauwena yana manuweya, ada au ase'asedi giyamumu.

ⁱ 20:3 Af 20:19 ^j 20:4 Af 19:29, 21:29; Ef 6:21

Folo Talowasi gihege tu Mailito againe ginanauna.

¹³Tu ime Folo ana bwa'uli wai anagona, wakeya ayage Asosa againe ana. Melalai-nadi againe Folo ginayage. Hidedemi bana givehimeyema be higa bana tauna agene ginana fa'ina. ¹⁴Au Asosa againe ayemu tu bana ginuhagama ada adodona, kadu alowoga anauna tu Midilini againe ayemu. ¹⁵Bogi ada mala gilauna kadu alowoga anauna tu Kaiyosi avaina. Kadu anauna aiyeta sa'eyana ahege tu Semosi againe adamana'ela. Kadu anauna aiyeta anavelu againe Mailito avaina. ¹⁶Tu Folo keke nuwanuwana Esiya anafafali againe ginamiya lauva tunugina fa'ina, tauna givehimeyena be Efeso amaduve'ewaiyena. Nuwanuwana Yelusalema againe ginamaduyemu. Ginuwanuwa ka'i ginamaduna, au anafaiweya tafalolo ana egana Fenidikosi ana tova ginayemu.

Folo Efeso tovetumagana adi tonagona gilumamalevekafoiyedi.

¹⁷Au Folo Mailito againe giyemu-yo venuwa'ata Efeso againe gi'iveninisena be tovetumagana adi tonagona bana againe hina'ela. ¹⁸Ada ahe hiyemu-yo givebutu gilumamaledi gigayo, “Tobohiyakweyao, yaku dewa wahalamanena. Yaku dewa Esiya anafafali againe gamidi'ela ana tova be yaku miya omi hinafamiya ana lauyabu againe ganauwena-ma wahalamanena. ¹⁹Iya Kaiwabu yana tofaisewa, yaku wanuwahobu kadu yaku watagiya yana faisewa ga'abina. Kadu tova moyaina miYuda nuwanuwadi hinaluve'alikaku fa'ina tova vitana ganuhagana. ²⁰Kadu omi wahalamanena tova moyaina nuwanuwa yamumuna matatabuna omi ami veluga fa'ina galukahihiyena, keke gada'ilova. Au vaga'auta lakahina againe kadu yami manuwa sa'eyana sa'eyana agaidiya galumamalemi ada gavehawalemi. ²¹MiYuda kadu yo'o tulidiyao kalivai-dina gagaheya'aya'alidi be higa yadi dewa koyona hidahegena, ada Yaubada againe hidahagaviladi kadu yada Kaiwabu Yesu againe hidavetumagana.

²²^kTu adamoya Alu'aluwa Mahalina givehimeyeku fa'ina Yelusalema againe gananauna. Gananauna tu yuwadedei gavadi iya agaikuya ginalakayemu ma keke gadahalamaneni. ²³^lGaitoma sa'eyanaga gahalamanena higa deliya hinaseku ada vita kaliva nimadiya gananuhagana. Melala moyaina agaidiya galuku-ma hidede amine Alu'aluwa Mahalina givenuwa'ataku. ²⁴^mTu iya'eku ma keke yawaiku fa'ina gananuwanuwa vaita keke ganabwavi. Medema gaitoma kabi'ona. Au yaku nuwanuwa sa'eyanaga. Nuwanuwaku aku vehimeya kadu yaku faisewa Kaiwabu Yesu giveleku-ma ganaluyabuna. Gavadi yaku faisewa? Yaku faisewa ma Venuwa'ata Yamumuna higa Yaubada yana nuwadoga ide kaliva agaideya gana'awatalatalainena.

^k 20:22 Af 19:21 ^l 20:23 Af 21:11 ^m 20:24 2Ti 4:7

²⁵Tu omi moya'ami hinafamiya ahe ganudadana Kaiwabu yana yo'ogaga ana luku fa'ina galumamala. Ada adamoya gahalamanena keke tamo hakwadi agaimiya magigiku aimo una'ita-havagileni. ²⁶Hidema fa'ina tova adamoya Yaubada matane gavenuwa'atami ka'i keke yawai-vagahimi wanunuhanagi digo, keke aku vita, au taumiyo amo vita. ²⁷Hidedemi gagahe fa'ina Yaubada yana nuwanuwa matatabuna omi agaimiya ga'awatalatalainena, keke tamo gadasevauyen. ²⁸"Taumiyo wana'itave'avimi, kadu Yaubada yana sifi moya'aidi wana'itave'avid, fa'ina Alu'aluwa Mahalina hida ami vehimeya givelemi. E, Yaubada yana kaliva wanave'adi, badi Yesu dayagine gitutuvehobudi amanadi. ²⁹"Ahe gahalamanena iya ganalowoga be ganana-yo kaliva tufoidi omi hinafamiya hinaluku, ada galu'eta manimaninidiyo adi egana wolivi sifi hinavemaduyauyauledi amine, badi Yaubada yana sifi hinakivekoyodi. ³⁰E, kadu kaliva tufoidi taumiyo yami yo'o agaidiya hinamidi, fwaya amine hinalumamalemi be tovetumagana tufoidi hinavesihawadadamamanidi be hinamulyedi. ³¹Badi yadi ve'alololo fa'ina au wana'itave'avimi, kadu yaku kivetuvetunu againe nuwami ginanunauyena, higa malamala tohiye agaidiya tova moya'aina gakivetuvetunumi. E, uyadayada bogi yaku watagiya gakivetuvetunumi.

Folo yana huluva miEfeso hinafadiya.

³²^pTu au Yaubada nimane gasemi be gina'itave'avimi, e yana nuwadoga valeyana ginavelugami. Valeyai-nadi againe Bana anafaiweya ginakivetoyogimi be yami vetumagana ginatubuga-mo'a, ada au yana du'u badi yana kalivamomo moya'aidi fa'idiya gi'etowavana-ma kadu omi wanavaina, omi Bana againe wahawahegembe ase'asemi gikiveyeyegana amanadi. ³³Tu iya'eku ma keke tamo hakwadi yana mani o yana lokoloko o ka'i ana vaigau gada'italuvadigeni. ³⁴^qAu omi taumiyo wahalamanena iya tauku nimakuya gafaisewa be akuga kadu aku toveluga adiga o ka'i ama vaigau, gavadi gavadi nuwanuwama anavaina, au yaku mani againe akimonena. ³⁵Hida yaku dewa againe tova moya'aina gavehawalemi be vehimeya wanahalamanena, higa gilubododa be yada faisewa toyogina againe kowakowadiyo kadavelugadi. Hidede amine kadafifaisewa tu Kaiwabu Yesu bonana againe nuwada gidanunauyena gigayo, Ka'i kaliva omi hinanuwakabubuyemi au ami ayauna yamumuna, tu ka'i omi kaliva wanunuwakabubuyedi au ami ayauna yamumu-mo'ena." Au hidedemi Folo miEfeso tovetumagana adi tonagona agaidiya gilumamala.

³⁶Tu Folo gilumamala gihavaina, kaliva moya'aidi bana buye tugadi hive'etodonena be Folo give'o'oledi. ³⁷Ada moya'aidi hitagitagi tu

ⁿ 20:28 1Fi 5:2 ^o 20:29 Md 7:15 ^p 20:32 Kl 1:12, 2:7 ^q 20:34 Af 18:3

hilauhina ada navanavane hiveyaugina be hilukafoiyena.³⁸^rBana yana gahe sa'eyana fa'ina nuwadi givita-mo'a, higa vaita magigina keke kadu hina'ita-havagileni. Ada au edeya hivebwa'uliyena be hina taliyeya au wakeya hiveyagena.

Folo Yelusalema againe gina.

21 ¹Tu ime alukafoiyedi-yo wakeya ayage be alowoga. Au ni'uya atalalaka anauna tu Kosi againe adamana'ela. Bogi ada mala gilauna kadu anauna tu Lodesi avaina. Lodesi ahege tu anauna Fatala avaina. ²Ada medede againe waka sa'eyana anuhagana, ginanafafali ana egana Finisiya againe. Au wakai-nadi againe ayage be alowoga. ³Anauna tu himula ana egana Saifulasi yuwa lobama be lehaga gitubutamo'aina againe a'ita-yo i'imawameya ahege tu Siliya ana fafali againe anauna. Kadu anauna tu melala sa'eyana ana egana Tailo Siliya ana fafali againe ayemu be ahobu, fa'ina nuwanuwadi Tailo againe waka ana lokoloko hinasehobuyedi. ⁴Au ime ana tovetumagana anuhagadi ada badi agaidiya amiyami tafalolo sa'eyana. Ada Alu'aluwa Mahalina gavadi Folo againe ginalakayemu-ma badi agaidiya gihawavemogatalena fa'ina Folo againe higaheya'aya'ala higayo, "Keke Yelusalema againe unana."⁵Hidedemi higahe tu yama tova badi agaidiya aluyabuni-yo au alowoga be yamana kadu anavebutu. Badi tovetumagana moy'aidi vavinediyao natudiyao buye hivebwa'uliyema, melaleya ahegena ma taliyeya. Au moy'aima makameya tugama ave'etodonena be ave'o'ola. ⁶Ave'o'ola gihavaina ave'alukafoiyema, ada ime wakeya ayage tu badi hiywadi yadi manuweya.

⁷Tu ime yamana wakeya anauwena, Taiya againe alowoga anauna tu melala ana egana Tolemaisi againe ayemu be ahobu. Ada tovetumagana agaidiya ana be anal'tadi, ada badi agaidiya bogi sa'eyana ada. ⁸^sAiyeta anavelu againe kadu alowoga be ana Sisaliya. Ayemu tu Venuwa'ata Yamumuna ana tolaumamala sa'eyana ana egana Filifi againe ana awakawaka. Bana higa yo'o adiveseveni kalivadi boi Yelusalema againe a'a ana folaka fa'ina hivegidedi. ⁹^tAda bana Filifi natuneyao vevine fowa tamadi againe himiyami, keke hidanagi ada Alu'aluwa Mahalina yana tunevehabalutuga againe Yaubada yana venuwa'ata hi'awa'awatalatalainena.

¹⁰^uMedede againe amiyami aiyeta gavaiyehi tu Yaubada bonana ana to'awatalatalaina sa'eyana gilakayemu, ana egana Agabasi. Bana Yudiya ana fafaliya gitauya be gi'ela. ¹¹^vAu ime agaimeya gi'ela, Folo ana gaiyona givaina digo tauna agena nimana guyogona gigayo, "Alu'aluwa Mahalina gigahe gigayo, Hai kaliva hida ana gaiyona, medema miYuda

^r 20:38 Af 20:25 ^s 21:8 Af 8:5,40 ^t 21:9 Af 2:17 ^u 21:10 Af 11:28 ^v 21:11 Af 21:33

Yelusalema againe hidede amine hinayogona ada yo'o tulidiyao kalivai-dina agaidiya hinahegenauwena." Hidede amine Agabasi Alu'aluwa Mahalina yana venuwa'ata gi'awatalatalainena.

¹² Tu ime yana gahe anogalini-yo Folo againe agahe toyogina, ime kadu tovetumagana moy'a'idi medede againe himiyami-ma buye'i agayo, "Keke-mo'a Yelusalema againe unana." ¹³ ^wTu Folo gigahema gigayo, "Gavadi-yo watatagitagiya ase'aseku wa'i'ive'akolukoluni? Iya gahawahegeku be ka'i Yelusalema againe hinayogoku amine o hinayogoku, tu kadu gahawahegeku be ka'i Kaiwabu Yesu fa'ine medede againe gana'alika amine o gana'alika." Hidedemi gigahe. ¹⁴ Au agahe-wayogena fa'ina a'ilova tu agayo, "Kaiwabu givehimeya amine, au ginalakayemu."

¹⁵ Amiyami tu akidewadewa ada alowoga be Yelusalema againe anana. ¹⁶ Kadu Sisaliya tovetumagana tufoidi ime buye ana, ada kaliva yana manuweya anamiya-ma againe hinauwema. Bana ana egana Nesoni, kwanaSaifilasi, ada boi tuwaina Yesu againe givetumagana.

**Folo gina Yelusalema againe Yemesa kadu
tovetumagana adi tonagona buye gi'itadi.**

¹⁷ Tu Yelusalema ayemu againe, tovetumagana yadi wavemwamwala hilusiuleyema. ¹⁸ Bogi ada mala gilauna Folo ime buye ana be Yemesa buye analukahihi. Ada ide to'eklesiya ada tonagona moy'a'idi bana buye hivaga'auta. ¹⁹ ^xBana Folo gilusiuleyedi tu Yaubada yana gugai yo'o tulidiyao hinafadiya gi'awatalatalainena. Gavadi gavadi moy'a'ina Yaubada yana veluga againe bana tauna gilumamalena gifaisewana, medema gi'awatalatalainena.

²⁰ Ada badi tonagona hinogalini-yo au moy'a'idi Yaubada hihawadavadavani tu yadi togahe gimidi Folo gigahena gigayo, "Tobohiyama, unogali! Au uhalamanena miYuda moy'a'ai-mo'edi tausani gavaiyehi Yesu againe ahe hivetumagana, ada moy'a'idi yada vehimeya Mosese tuwai-mo'ena givelema-ma tova moy'a'aina hidibudibumuhibena. ²¹ Ada o fa'iniya kaliva higahe-kawowo badi agaidiya higa vaita miYuda moy'a'idi yo'o tulidiyao adifafali tulina tulina agaidiya himimiyami-ma udavehawaledi be higa Mosese yana vehimeya hidakilowena. Higahe vaita udagahedi udagayo, Keke natumiya kaliva wowodiya iya'iyaya wanatomogolohini, ada ide miYuda yada dewa tuwaina au wanahegena.

Tovetumagana adi tonagona Folo ana vehimeya gisena.

²² Tu o hidedei ulakayemu ma valeya makewa hinanogalina, fa'ina gavadi kanagani? ²³ Au gavaimi anavehimeya o unahuluvina. Kaliva fowa

^w 21:13 Af 20:24 ^x 21:19 Af 15:12

agaimaya himimiyami ada Yaubada againe yadi wonadabadaba sa'eyana hisena. Bana Mosese yana vehimeya amine yadi wonadabadaba hisena. ²⁴Au hida kalivai-dina manuwa-tafalolo lakahina againe buye wanana, ada gavaimi yadi yegayega Yaubada matane fa'ina hinahuluva, meda o buye unahuluva, ada kevakeva higa yadi abaveyao yadi yegayega fa'ina fatadi unasena. Fatadi unaseni-yo au yadi wonadabadaba hinaluyabuna ada adifaiweya u'udi hinatotona. Hida ya huluvali-nadi againe moy'aidi hinahalamana o tauni Mosese yana vehimeya u'abi'abina. Kadu gavaimi o fa'iniya hinogalina vaita udavehawala be miYuda tovetumagana Mosese yana vehimeya hidahegeni, au hinahalamana mema fwaya. ²⁵^yTu yo'o tulidiyao tovetumagana ma yadi leta ahe a'etoladina be yama vehimeya fa'ina avenuwa'atadi. Agahedi higa vaita keke kevakeva kilumina agaidiya mali kaliva hihawadavadavayedima hina'u'adi, kadu keke kevakeva dayagidi hinayuni, kadu kevakeva kikibahidiyao be dayagidi keke gidamadu-ma keke hina'u'ani. Kadu kaliva keke mali vevine buye hinadauda, ada meda anafaiweya vevine keke mali kaliva buye hinadauda. Au hidede amine agahedi."

²⁶^zAda au tovetumagana adi tonagona hidedemi higahe fa'ina, tova anavelu Folo kaliva adivefowa ginauwedi ada Mosese givehimeya amine bana badi buye yadi yegayega hivaina. Hiyegayega gihavaina Folo manuwa-tafalolo lakahina againe giluku be abaveyao ana tofaisewa yadi yegayega ana aituga fa'ina ginavenuwa'atadi, higa aiyeta seveni ginahavaini-yo kevakeva yadi abaveyao fa'ina hina'aliyedi.

Folo manuwa-tafalolo lakahina againe hikive'avina.

²⁷Yadi aiyeta seveni himiyami tu kabisona hinalauyabu, au miYuda tufoidi Esiya anafafali kalivai-dina Folo manuwa-tafalolo againe hi'itana. Hi'ita-yo kaliva moy'aidi hisiveyo'odi ada Folo hikive'avina. ²⁸Hikive'avina digo hikovakova higayo, "MiIsileli ama veluga! Hida hima kalivafafali moy'aina agaidiya ginauna, kaliva moy'aidi givehavehawaledi be yada yo'o gi'l'i'hawadamanedi, kadu Mosese yana vehimeya ada hida yada manuwa-tafalolo lakahina tova moy'aina gihawahawatagona. Hidede amine gihuluva tu adamoya koyona kadu sa'eyana give'atutamo'aina, fa'ina ada hawata giyawelina be yo'o tulidiyao kalivai-dina manuwa-tafalolo againe gilukuwedi be yada manuwa-tabu gikivebwanenena." ²⁹Hidedemi higahe fa'ina yo'o tulidiyao kalivana sa'eyana kwanaEfeso ana egana Talafimo hi'itana, Folo buye melala hinafane hinauna ada hivaitana manuwa-tafalolo againe gidalukuweni.

³⁰Tu melala kalivai-dina moy'aidi vekwageya fa'ina hiyo'odi, ha'amine ha'amine hi'abiyemuyemu, Folo hikive'avina digo manuwa-tafalolo

againe hitaina be hisehobuyena, ada auhe'ama wana hifalina. ³¹Au yo'o Folo himunumununa higa vaita hidalue'alikana, tu badi miYelusalema moy'aidi hivekwavekwageya-ma valeyadi Loma tolugaviya adi togiyomatana lakahina ginogalina. ³²Ginogali-*yo* auhe'ama tolugaviya kadu adi tonagona tufoidi buye givaidi be yo'o agaidiya himaduna. Ada tovekwageya togiyomatana yana tolugaviya buye hi'itadi againe, Folo ana munuga hi'ilovena.

³³*a*Au bana togiyomatana Folo gikive'avini tu yana tolugaviya givehimeyedi be bulava kainumula luhei againefafalinefafaline hinayogona. Hiyogona gihavaina yo'o gitoliluvvelovedi gigayo, "Hida kaliva hakwa'adi? Gavadi gigani?" ³⁴Ada yo'o gitoliluvvelovedi-*yo* kaliva tufoidi hidede amine hikovakova kadu tufoidi medede amine hikovakova, yadi kova tulina tulina. Ada vekwageya butudi lakahi-mo'ena fa'ina togiyomatana vekwageya inubana velemo'ena keke anafaiweya gidanuhagani. Hidema fa'ina yana kalivamomo givehimeyedi be Folo tolugaviya yadi manuwa toyogina againe hinanauwena. ³⁵Au hivelbutu hinauwena abavaga againe hiyemu tu tovekwageya hinuwakoyo-mo'be hifaiwala fa'ina badi tolugaviya Folo hifewana be manuweya hinaselakahina. ³⁶*b*Ada yo'oy'o himulimuliyedi tu hikovakova agodi lakahina higayo, "Wa'ela be kana kaluve'alikani."

Folo nuwanuwana yo'o agaidiya tauna ginalugolegolena.

³⁷Tu tolugaviya Folo manuweya hidaluwuwenma togiyomatana againe gigahe gigayo, "Nuwanuwaku ganagahe."

Bana togiyomatana gigayo, "Ha! Bona Gilika uhalamanena. ³⁸Iya gavaita o'eni hima kwanaIdifita, bana boi vekwageya givebutuna be kabemani hivekwageyedi, ada yana yo'o fowa tausani (4,000) higa tolue'alika ginagoyedi be babigaga againe ginauwedi. Ka'i o keke bana kalivai-nadi?" Hidedemi togiyomatana gigahe.

³⁹Bana Folo gigayo, "Iya kwanaYuda, melala ana egana Tasasi againe gatubuga, medema Silisiya anafafali againe, ada melalai-nadi ana egana keke kabi'ona kaliva matadiya, ada iya wada melala kalivana. Iya gave'o'ole udahawahegeku be yo'o agaidiya gadagahe." ⁴⁰Au togiyomatana gihawahegena fa'ina Folo abavaga againe gimidi yo'o nimane giluhawatadi. Hi'ilova againe givebutu bona Hibeliu againe gilukahihi, higa badi miYuda taudiyao bonadi.

Folo givebutu tovekwageya agaidiya gilukahihi.

22 ¹Folo yo'o agaidiya gilukahihi gigayo, "Tobohiyakweyao kamakweyao, iya ganalukahihi be wanagalina. Keke gavana fa'ina tu ganakivetuvetunumi be wanahalamanena aku vita keke."

^a 21:33 Af 21:11 ^b 21:36 Af 22:22; Lu 23:18

²Hidedemi givebutu tu badi yo'o agona bona Hibeliu taudiyo bonadiya gilukahihi ma hinogalina againe hive'awa'ibode-mo'ena.

³^cAda au Folo yana lukahihi kadu ginunauwena gigayo, "Iya'eku kwanamiYuda, melala ana egana Tasasi againe gatubuga, medema Silisiya anafafali againe, tu hidedei Yelusalema againe galakata. Bana Gameliyela againe gasikulu ada givehawale-hagihagiyeku be bwanenedeyao yadi vehimeya ganadibumuhibena fa'ina. Kadu omi tova adamoya Yaubada againe wahawahegemi amine, meda iya boi kadu gahawahege-mo'eku. ⁴^dAda badi kaliva Yesu yana Eda himulimuliyma gakivekoyodi. Kaliva vevine gakive'avidi be yaku kalivamomo yaku vehimeya againe tufoidi deliya hihegenauwedi, kadu tufoidi hiluve'alikadi. ⁵Iya gagahe velemo'ena ma abaveyao ana tofaisewa adi tokaiwabu kadu koniselo moy'a'aldi adifaiweya hina'alakakila, fa'ina badi tobohiyaneyao tonagona Damasiko againe yadi leta hi'etoladina be iya gananauwena. Au galowoga be gana vaita Yesu yana Eda kalivai-dina ganakive'avidi ada yogoyogonidiyo Yelusalema againe gana'aliyedi be matahiwadi hinanuhaganafalina." Hidedemi Folo gigahe.

Folo yana nuwavilana Yesu againe gilukahihiyena.

Afositolo 9:1-19, 26:12-18

⁶Kadu gigayo, "Au edeya ganauna tu kauwana getadeya Damasiko liline gadayemu ma auhe'ama mahalina lakahina lobameya give'akinamanamalena, iya ganauna againe gituvemahali-'owona. ⁷Au babiya gabe'u tu tamo hakwadi agona ganogalina gigaheku gigayo, Saulo, Saulo! Gavana falina ukikivekoyoku?

⁸Ada iya gagayo, Kaiwabu, O hakwa'adi? Bana gigayo, Iya'eku Yesu kwana Nasaledi ada Iya ukikivekoyoku. Hidemi gigahe. ⁹Tu badi kaliva hivebwa'uliyeku-ma mahalina hil'itana tu kaliva iya agaikuya gilukahihi-ma agona keke hidanogali-hagihagiyeni.

¹⁰Ada au iya gatoliluvaluva gagayo, Kaiwabu, gavadi ganagani? Ada Bana Kaiwabu gigaheku gigayo, Umidi, Damasiko againe unaluku ada medede againe kaliva sa'eyana gavaimi Yaubada o fa'iniya boi givehimeya ma ginavenuwa'ata. Hidedemi Kaiwabu gigahe. ¹¹Au mahalina ve'akinamanamalina fa'ina iya gavematakoyo, fa'ina aku bwa'uli nimakuya hi'abiku be Damasiko againe hinauweku.

¹²Ayemu tu kaliva sa'eyana gimiyami, ana egana Ananaiyasi, ada bana Yaubada gimamatatausena kadu yada vehimeya lakahina gidibudibumuhibena. Ada tobohiyadeyao miYuda moy'a'aldi Damasiko againe himiyami-ma hive'amohimohinena lakahina. ¹³E, bana kalivainadi iya gamiyami againe gi'ela, lilikuya gimidi gigaheku gigayo,

^c 22:3 Af 5:34 ^d 22:4 Af 8:3, 22:19

Tobohiyaku Saulo, mata gina'italele. Gigahe-yo auhe'ama matakau kadu gi'italele, ada bana ga'itana.

¹⁴Kadu bana gigayo, Yaubada bwanenedeyao hidavadavana amanadi o givegide be yana nuwanuwa unahalamanena, kadu yana Kaliva Mahamahalina edeya ahe u'itana be Tauna agona unogalina. ¹⁵Ada gavaimi ahe u'itana be unogalina-ma kaliva moy'aidi agaidiya una'awatalatalainena, au o'eni aimo yana to'awatalatalaina. ¹⁶Ada auwe, kadu keke tamo gavadi fa'ina unabodaboda. Umidi be unabafitaiso, Kaiwabu ana egana unahawadavavani-yo ya koyona fa'ina ase'ase ginakolana. Hidedemi Ananaiyasi gigaheku.

Kaiwabu Folo givehimeyena be yo'o tulidiyao agaidiya ginalumamala.

¹⁷Tu iya Yelusalema againe gayewaku, ada tova sa'eyana manuwa-tafalolo lakahina againe galuku gave'ove'o'ola tu ga'eno'ita. ¹⁸Ada yaku ita againe Kaiwabu ga'itana gigaheku gigayo, Umadumidi, Yelusalema unamadunuyabuyabuna, fa'ina miYelusalema ya awatalatalaina Iya fa'ikuya keke hinavetumaganeni.

¹⁹^eTu iya gagayo, Kaiwabu, badi yaku huluva hihalamane-hagihagiyena, higa sinagogi moy'aina agaidiya galuku badi O hivetumagane-ma gakive'avid be gamunudi. ²⁰^fKadu'e boi ya to'awatalatalaina ana egana Sitiveni hiluve'alikana ana toveya, iya gamidive'eda'ufona, kaliva hitutuve'alikana-ma gahawaveyamumuyedi ada adi aikeva ga'itave'avina. Boi hidede amine ya kalivamomo gakivekoyodi tu adamoya ganuwavilana fa'ina au yaku awatalatalaina O fa'iniya hinavetumaganena. Hidedemi Kaiwabu againe gagahe.

²¹^gTu Bana Kaiwabu gigaheku gigayo, Una! Yo'o tulidiyao lauveya himimiyami-ma agaidiya gana'iveninise be unana. Hidedemi Kaiwabu gigaheku."

Togiyomatana bana Folo Loma kaliva ma valeyana ginogalina.

²²^hBana Folo gilulukahihi tu miYuda hivanevanenega tu gigahe vaita yo'o tulidiyao Yaubada yana yo'o agaidiya hinaluku againe, au hivebutu hikova'awafatafata higayo, "Au gida'alika! Mema kaliva koyona, keke wayawaina ginamiyami." ²³Au higagakwelukwelulu, adi aikeveya hiluluwahiwahi, fwayafwaya hihegehegelakahina. ²⁴Hidedemi hihuluva fa'ina, togiyomatana yana kaliva givehimeyedi be Folo tolugaviya yadi manuwa toyogina againe hinalukuwena. Kadu gigahedi gigayo, "Bulava againe wanalauna be gavadi yana koyona ginayakahina fa'ina. Ka'i gavadi-yo yo'o agodi lakahina hihawavekoyoyena ma au kanahalamanena." ²⁵ⁱAu hinauwena ada hiyogona be hinalauna ma Folo

^e 22:19 Af 8:3 ^f 22:20 Af 7:58 ^g 22:21 Af 9:15 ^h 22:22 Af 21:36 ⁱ 22:25 Af 16:38

tolugaviya adi tonagona bana liline gimidimidi-ma gigahena gigayo, “Ka'i omi wanalauku? Iya Loma kaliva nonogana keke wadavedewayaugiku. Keke amifaiweya hidede amine wanalauku, fa'ina ime Loma kaliva yama vehimeya gihawatami.”

²⁶ Tu bana tonagona yana gahe ginogalini-yo togiyomatana againe gina givenuwa'atana gigayo, “Mema gavadi unagani? Fa'ina bana wadevama Loma kaliva.”

²⁷ Au togiyomatana Folo againe gina gitoliluveluvena gigayo, “Ka'i velemo'ena o Loma kaliva?” Bana Folo gigayo, “Ika, iya Loma kaliva.”

²⁸ Togiyomatana gigayo, “Iya mani lakahina gaseni-yo gavekwanamiLoma.”

Bana Folo gigayo, “Tu iya'eku ma Loma kaliva, fa'ina bana kamaku boi givekwanamiLoma.”

²⁹ Ada tolugaviya himidimidi vaita Folo hinalauna-ma auhe'ama hivagayewayewa, kadu togiyomatana bana Folo Loma kaliva ma ahe gihalamanena againe tauna gimatauta, fa'ina Loma kaliva nonogana giyogona.

³⁰ Bogi sa'eyana hida mala gilauna togiyomatana nuwanuwana ginahalamane-hagihagiyena ka'i gavana fa'ina miYuda Folo hihawavekoyoyeni. Nuwanuwana ginahalamanena fa'ina yana kaliva givehimeyedi be Folo deliya hisehobuyen, kadu abaveyao ana tofaisewa kikaiwabudiyao ada miYuda yadi Koniselo moy'aidi gikovavaga'auhidi. Ahe hivaga'auta againe, gina Folo givega'aulena be badi Koniselo moy'aidi matadiya gisena.

Folo miYuda yadi Koniselo agaidiya gikotu.

23 ¹Tu Folo Koniselo gi'itakwanekwanedi be gigahedi gigayo, “Tobohiyakweyao, tova moy'aina nuwfouku yegayegana Yaubada matane. E, boi kabi'okuya gahuluva yamumuna be ganunauwena tova adamoya, ada keke tamo gavadi koyona fa'ina Yaubada gadamatauseni-yo gadavenuwanauna.” ²Folo hidedemi gigahe tu abaveyao ana tofaisewa adi tokaiwabu, ana egana Ananaiyasi, badi kaliva Folo liline himidimidi-ma givehimeyedi be bana awane hinamununa. ³Au Folo gigahena gigayo, “Yaubada makewa o ginamunu, o ya huluva vaita tuhi kwauna hikilumina ana ita yamumuna tu hinagena ma bwanebwananena. O mene uvetoga be ide miYuda yada vehimeya amine unavedewayaugiku. O tovedewayauga nonogana vehimeyai-nadi keke uda'abini, fa'ina kaliva ugahedi be hinamunu-kawowoku.”

⁴Gigahe-yo kaliva bana liline himidimidi-ma higahena higayo, “O hakwa'adi? Bana wadevama Yaubada yana abaveyao ana tofaisewa kikaiwabuna tu o u'ihawadamanena.”

^{5j}Au Folo gigayo, “Tobohiyakweyao, me bana abaveyao ana tofaisewa adi tokaiwabu ma keke gadahalamaneni. Ka'i gadahalamanena digo, keke hidede amine gadagahe, fa'ina Veyao Tuwaina ana buki gigahe gigayo, Yami yo'o adi tovehimeya keke wanahawavekoyoyeni.”

^{6k}Himiyami tu Folo a gihalamanena koniselo yadi yo'o luhei. Tufoidi adi egana Sadusi kadu tufoidi adi egana Falisi. Yadi yo'o luhei fa'ina nuwana gi'afolena, au samuba hinagene gikova gigayo, “Tobohiyakweyao, iya Falisi, higa iya yo'o tafatafalolodiyao adi egana Falisi kalivana.

Yaku nuwanuwa sa'eyana fa'ina adamoya wanavedewayaugiku, higa iya ganuwave'avina vaita badi to'alika aimo tova mulina hinamididi-havagi.”

⁷Ada hidedemi gigahe-yo badi Falisi kadu Sadusi hivebutu hivekwageya, ada au hinuwanuwaluga. ^{8l}Hinuwanuwaluga higa badi Sadusi ma higahe vaita kaliva keke alikeya hinamididi-havagi, kadu vaita lobama ana tovenuwa'ata keke, kadu balauma keke. Tu badi Falisi ma hinuwanuwa vaita hida gaitomai-dina tohiye au velemo'ena, mididi-havagi, lobama ana tovenuwa'ata, balauma.

⁹Au buye hive'akovakova agodi gilakata, ada Moses yana vehimeya ana tovehawala tufoidi, badi Falisi kalivai-dina, hitowamidi higahe toyogina higayo, “Keke tamо gavadi koyona bana againe adanuhagani. Ka'i velemo'ena balauma o ka'i lobama ana tovenuwa'ata edeya bana againe gilukahihi.” ¹⁰Ada au yadi vekwageya againe hifaiwala-mo'a fa'ina, togiyomatana gimatauta vaita Folo hidave'asitaineni. Au yana tolugaviya givehimeyedi be yo'o hinafadiya hinahobu, Folo hinalemadi be yadi manuwa toyogina againe hinanauwena.

^{11m}Hinauwena tu bogi againe Kaiwabu gi'ela Folo liline gimidi gigahena gigayo, “Una'asevatu. Hidedei Yelusalema againe Iya fa'ikuya ahe u'awatalatalaina, kadu aimo Loma againe meda anafaiweya afaiweya uda'awatalatalaina.”

MiYuda hivevai be Folo hinaluve'alikana.

¹²Mala gilauna tu miYuda tufoidi buye hivaga'auta be hivevai. Yaubada matane hiwonadabadaba higayo, “Keke tamо gavadi ana'ani o ka'i anayuni tu nagona Folo analuve'alikana. Yaubada, au uhalamanema.” ¹³Ada tovevai adi yo'o foti (40) kadu gavaiyehi amine. ¹⁴Hiwonadabadaba gihavaina, hina abaveyao ana tofaisewa kikaiwabudiyao kadu kaliva lakahidiyo hivenuwa'atadi higayo, “Ime Yaubada matane awonadabadaba higa vaita keke tamо gavadi ana'ani tu nagona Folo analuve'alikana. ¹⁵ⁿAu omi'iyao kadu Koniselo moya'aidi togiyomatana againe wanave'o'ola be yana kaliva Folo omi agaimiya

^j 23:5 Yem 22:28 ^k 23:6 Af 24:15,21 ^l 23:8 Md 22:23 ^m 23:11 Af 28:16,23

ⁿ 23:15 Af 25:3

hinasehobuyena. Omi wanagahe vaita nuwanuwami wadatoliluveluveniyo yana dewa wadahalamane-hagihagiyo. Tu Folo keke omi agaimiya ginayemu, fa'ina ime akidewadewa be edeya analuve'alikana."

¹⁶ Hidedemi hivevai tu kaliva sa'eyana, Folo nouna natudi, kaliva yadi nuwanuwa higa edeya hinaluve'alikana ma ginogalina, au gina tolugaviya yadi manuwa toyogina againe giluku Folo givenuwa'atana. ¹⁷Bana Folo ginogaliniyo tonagona sa'eyana gikovana be gigahena gigayo, "Hida kwanatubulakahina togiyomatana againe unanauwena. Yana nuwanuwa sa'eyana fa'ina ginavenuwa'atana."

¹⁸ Au tonagona kwamana ginauwena be togiyomatana gigahena gigayo, "Bana filisina ana egana Folo gikovaku, ada give'l'o'oleku be hida kwanatubulakahina o againiya ga'aliyena, yana nuwanuwa sa'eyana ginalukahiihiyena fa'ina." ¹⁹Ada togiyomatana nimane gi'abina be gisi'aliyeni tu gigahena gigayo, "Yavanuwanuwa unagaheyena."

²⁰ Bana gigayo, "MiYuda yama tonagona buye hivevai, ada bogiyadi hinave'l'o'ole be ya kaliva Folo Koniselo agaidiya hinasehobuyena. Hinagahe vaita hidatoliluveluveniyo yana dewa hidahalamane-hagihagiyo. ²¹Tu keke unavenogaledi fa'ina yadi kaliva adi yo'o foti (40) kadu gavaiyehi amine edeya hinaveu be hinabodana. Badi hida kalivai-dina Yaubada matane hiwonadabadaba higa vaita keke tamo gavadi hina'ani tu nagona Folo hinaluve'alikana. Ada ahe hikidewadewa tu ya vehimeya higa Folo Koniselo agaidiya unahawahegena fa'ina hibodaboda."

²² Au hidedemi kwamana givenuwa'ata ada togiyomatana gigahena gigayo, "Hida ya venuwa'ata iya agaikuya keke tamo hakwadi againe unalukahiihiyeni. Au unana."

Folo Loma kabemani ana egana Filikesi againe hinauwena.

²³ Kwamana gina tu togiyomatana yana tolugaviya adi tonagona luhei gikovadi be gigahedi gigayo, "Wanakidewadewa. Adamoya uyuyuya kauwana ana bai naeni amine wanallowoga be Sisaliya againe wanana. Ami tolugaviya hanaledi luhei (200) agediya hinana, kadu kaliva seveniti (70) hosi agaidiya hinayage be hinana, kadu to'ai'onaga hanaledi luhei (200) yadi wagiyo hinana. ²⁴Kadu'e, hosi tufoidi Folo fa'ina wanakidewedewedi, ada kabemani lakahina ana egana Filikesi againe wananauwena. Au wana'itave'avi-hagihagiyo be keke tamo vita eda againe ginanuhagani."

²⁵ Togiyomatana yana kaliva adi'iselu givehimeyedi gihavaina, Filikesi yana leta gi'etoladina ada leta hidedemi gigahe.

²⁶ Yo siule kabemani Filikesi, o kaliva lakahi. Adamoya iya Kelodiyo-Laisiyasa nimaku una'itana.

²⁷ºMiYuda hida kaliva o againiya ga'iveninisena-ma hikive'avina higa hidaluve'alikana fa'ina, tu bana valeyana ganogalina higa bana Loma kaliva, fa'ina yaku tolugaviya buye ahobu ana alugolegolena. ²⁸ºIya nuwanuwaku ganahalamanena ka'i gavadiyo hihawavekoyoyeni, fa'ina gasehobuyena be yadi Koniselo matadiya galukuwena. ²⁹Ada inubana ahe ganuhagana, higa keke tamo gavadi koyona gidafaisewani tu kadamiyaluve'alikana o ka'i deliya kadasena, au miYuda yadi vehimeya gaitomana fa'ina hihawavekoyoyena. ³⁰ºTu muliya miYuda tufoidi hivevai be hinaluve'alikana, ada kaliva sa'eyana yadi nuwanuwa fa'ina givenuwa'ataku. Ganogalini-yo auhe'ama yaku kaliva gavehimeyedi be o againiya hina'aliyena. Kadu badi kaliva hihawavekoyoyena-ma gavehimeyedi be o againiya hinavekotuna. Au hidedemi togiyomatana Filikesi yana leta gi'etoladina.

³¹Tu tolugaviya yadi togiyomatana yana vehimeya hidibumuhiGENA. Folo hivega'aulenA be hinauwenA, ada medema bogi-nadi againe hina melala ana egana Adifadalisi againe hiyemu. ³²Mala gilauna tolugaviya agediya hinana-ma hilowoga, yadi manuwa toyogina againe hiywadi tu badi hosi kwaudiya hinana-ma Folo hivebwa'uliyena be Sisaliya againe hinauwenA. ³³Hiyemu tu kabemani lakahina yana leta hivelena, ada Folo bana nimane hisena. ³⁴Bana kabemani lakahina yana leta gihawana gihavaina, Folo gitoliluveluvena gigayo, "O gavafafali kalivana?" Ada Folo gigayo, "Iya Silisiya kaliva." ³⁵Bana kabemani ginogalini-yo gigahena gigayo, "Badi nuwanuwadi hinavekotu-ma hina'ela-yo o kahihi gananogalina." Au yana kaliva givehimeyedi be Folo Helodi yana manuwa lakahina againe hinalukuwena, ada medede againe tolugaviya hina'itave'avina.

MiYuda Folo hihawavekoyoyena.

24 ¹Aiyeta faifi himiyami tu abaveyao ana tofaisewa adi tokaiwabu ana egana Ananaiyasi, kadu miYuda kaliva lakahidiyao tufoidi buye Sisaliya againe hiyemu. Badi higa Folo ana tohawavekoyo ada yadi hifufu ana tokivetuvetunu badi buye hi'ela, kaliva ana egana Tetelo. Au kotu againe hiluku ada kabemani Filikesi matane Folo hihawavekoyoyena. ²Ada Folo hiyowanina be ahe gilakayemu againe, bana Tetelo givebutu Folo yana dewa fa'inegilukahihigigayo, "Kauveya lakahi, ime ya abavehimeya againe amimiyami ada o kaliva halamani fa'ina niwalova againe amiyami lauva tunugina. Kadu'e, ya vehimeya ivaguna moyaa'ina agaidiya ime yamumu anuhagana, ada au yamafafali u'ita'itave'avina yamumuna. ³Hidema fa'ina o againiya avesiule

º 23:27 Af 21:30-33, 22:25-27 º 23:28 Af 22:30 º 23:30 Af 23:12-13

lakahina. E, tova moya'aina melala moya'aina agaidiya ya leme fa'ina avesivesiule. ⁴Tu keke vaita nuwanuwaku gana'ivewowologilogi fa'ina hida ganalukahihi keke lauva tunugina. Au udanuwakabubuyema be yama hifufu kali'uhona udanogalina. ⁵'Bana hidevama kaliva a'itana, vekwageya moya'aina inubana bana againe. E, bana yana laumamala fa'ina miYudafafali moya'aina agaidiya gi'l'ive'ago'ugadi be hivelwavekhwageya. Bana yo'o adi egana Yesu kwanaNasaledi kalivadi ginagoyedi.

⁶Kadu'e, gigaluvaluva be yama manuwa-tafalolo lakahina ginakivebwanenena fa'ina akive'avina. [Nuwanuwama yama vehimeya amine anavedewayaugina. ⁷Atu togiyomatana ana egana Laisiyo gihobu'ela ada yana tolugaviya hifaiwala lakahina be nimameya hilemama. ⁸Hilemama-yo bana Laisiyo badi kaliva hihawavekoyoyena-ma givehimeyed be o againiya hinakotu.] Ka'i hida kalivai-nadi unatoliluveluvena amine, yana koyona ime ayakahina-ma o tauni unahalamanena, au agahe velemo'ena ma unahalamanena.” ⁹Au hidedemi Tetelo gigahe kadu miYuda bana buye hi'ela-ma higahe'alakakila higayo, “Folo yana huluva meda a gigaheyena amine.”

Folo Filikesi matane tauna gilugolegolena.

¹⁰Tu kabemani lakahina Folo giveguwautulena be ginalukahihi fa'ina. Au bana gigahe gigayo, “Kauveya, malamala a gavaiyehi o'eni hida yama yo'o uvevedewayaugima ma iya gahalamanena. Hidema fa'ina o mataniya ganakotu ada tauku ganalugolegoleku fa'ina nuwaku giyamumu. ¹¹Badi unatoliluveluvedi be afaiweya tauni unahalamanena, aiyeta tuwelogaga kahege tu Yelusalema againe galaka be ganatafalolo Yaubada ganahawadavadavana. ¹²Badi meneva'ama manuwa-tafalolo lakahine hi'itaku againe, keke tamo hakwadi buye adavekhwageya, keke. Kadu keke manuwa-abavehawala sinagogi agaidiya o ka'i melaleya hida'itaku be vaita kaliva vekwageya fa'ina gadasiveyo'odi, keke. ¹³Kadu dewai-nadi fa'ina hivelotuku-ma inubana keke afaiweya unanuhagani, fa'ina yadi gahe keke velemo'ena. ¹⁴^rTu yaku dewa sa'eyana fa'ina ganahawavemogatala. Yama Kaiwabu yana Eda iya gamulimuliyyena tu Edai-nadi badi hihawavefwayayena. E, bwanenemeyao yadi Yaubada gahawadavadavana fa'ina Edai-nadi gamulimuliyyena. Au kadu Moses yana vehimeya moya'aina gavetumaganena, kadu Yaubada bonana ana to'awatalatalaina yadi buki ana nuwanuwa moya'aina gavetumaganena. ¹⁵^sAda badi hinuwanuwa amine meda iya kadu ganuwanuwa, higa Yaubada kaliva moya'aida alikeya ginasivemididida, kaliva yamumudiyao kadu koyodiyao ginasivemidididi. ¹⁶Hidedemi iya ganuwanuwa fa'ina tova

^r 24:5 Af 17:6 ^s 24:6 Af 21:28-30 ^t 24:14 Af 26:22 ^u 24:15 Yo 5:28-29

moya'aina gadibudibumuhiga be Yaubada matane kadu kaliva matadiya ganahuluva haghagina, ada keke vita nuwafoukuya gana'ayauneni fa'ina.

¹⁷ Tu malamala moya'aina malifafali agaidiya gamiyami tu Yelusalema againe gayewaku be mani koyokoyo yaku yo'o agaidiya gana'aliyena, kadu kevakeva abaveyao fa'ina manuwa-tafalolo lakahina againe ganasena. ¹⁸ ^w Ada ahe gayegayega yama vehimeya amine yo abaveyao gaseuseni tu manuwa-tafalolo againe hinuhagaku. Keke yo'o buye adamiyami, kadu keke tamo hakwadi againe gadavekwageya.

¹⁹ Tu miYuda tufoidi manuwa tafalolo againe himiyami, Esiya ana fafali kalivai-dina, ada ka'i badi tamo gavadi fa'ina hidahawavekoyoyeku digo, badi adifaiweya o againiya hida'ela hidavekotuku. ²⁰ O ka'i hida kaliva badi boi samuba hinagene himiyami be Koniselo agaidiya hivelotuku amanadi, adamoya o mataniya himidimidi, au ka'i tamo gavadi yaku koyona hinuhagana o hidayakahina. ²¹ ^x Tu yaku dewa sa'eyanaga fa'ina ka'i hinahawavekoyoyeku, higa kotu againe badi matadiya gamidimidi tu gakova gagayo, Iya ganuwanuwa vaita kaliva alikeya hinamididi-havagi fa'ina adamoya wahawavekoyoyeku. Hidedemi gagahe."

²² Hidede amine Folo gigahe tu bana Filikesi Kaiwabu yana Eda gihalamane-haghagiyena fa'ina gahe velugana gihawatana gigayo, "Bana togiyomatana Laisiyo gina'ela-yo kotuya wanaluksu-havagi be yami vekwageya ganayau-'owona." ²³ ^y Ada tolugaviya adi tonagona Folo gimiyatagona-ma givehimeyena be manuwa toyogina againe gina'itave'avina. Gina'ita'itave'avina tu naudadana o ka'i gavadi yana nuwanuwa ma keke ginahawatani. Kadu givehimeya be tobohiyaneyao anaga o yana gavadi hina'aliyena, keke ginahawatadi.

Folo Filikesi be vavinena adi egana Delusila agaidiya gilukahihi.

²⁴ Aiyeta tufona himiyami tu Filikesi gi'ela. Wavavinena hi'ela, adi egana Delusila vineYuda. Au Folo giyowanina be ginalukahihi. Ada Folo vetumagana Yesu Keliso againe gilukahihiyena tu badi hivanevanenega. ²⁵ Ada au Folo yana lukahihi ginunauwena ada dewa tunutunugina fa'ina gilukahihi, kadu kaliva taudiya hinavehimeyedi be keke yadi nuwanuwa koyona amine hinahuluva ma gigaheyena. Kadu tova mulina vedewayauga be kaliva adi laufata ana tova ma gilukahihiyena. Hidedemi gilukahihi fa'ina, Filikesi gimatauta tauna yana dewa ginuwenuwena ada gigahena gigayo, "Auwe. Au unana be gava tova akufaiweya ya laumamala gananogalina, au ganayowani." ²⁶ Hidedemi gigahe tu kadu ginuwanuwa vaita ka'i Folo tamo mani gidaveleni-yo nuwana gida'iveyamumuna be deliya gidayaua fa'ina. Hidema fa'ina tova moya'aina hiyowayowanina be buye hilulukahihi.

^v 24:17 Lo 15:25-26 ^w 24:18 Af 21:26-27 ^x 24:21 Af 23:6 ^y 24:23 Af 27:3

²⁷Ada au malamala luhei hihegedi tu Filikesi gina ada ana hilafa higa kabemani velugana gilakayemu, ana egana Fosiyo-Fesito. Ada Filikesi nuwanuwana miYuda bana againe hinanuwa'abiyena fa'ina Folo deliya keke gidayauni.

Folo give'o'ola be Loma Tokaiwabu lakahina againe ginakotu.

25 ¹Tu bana Fesito Sisaliya melala againe gilakayemu be yana abavehimeya givebutuna. Aiyeta tohiye gihegedi tu gina Yelusalema againe. ²Ada medede againe abaveyao ana tofaisewa kikaiwabudiyao kadu miYuda yadi tonagona buye Fesito againe hi'ela be Folo yana dewa koyona fa'ina hi'awatalatalainena. ³^aAda Fesito againe hive'o'ola be yadi nuwanuwa amine ginahuluva higa yana tolugaviya ginavehimeyedi be Folo Yelusalema againe hina'aliyena. Au badi ahe hivevai be edeya hinaluve'alikana fa'ina hidedemi hive'o'ola. ⁴Tu bana Fesito gigahedi gigayo, “Folo Sisaliya deli againe gimimiyami, ada tova kabisona iya tauku medede againe ganayewaku. ⁵Au yami tonagona tufoidi Sisaliya againe hidana. E, badi iya buye anana ada bana kalivainadi ka'i tamo gavadi koyona gidafaisewana digo, au medede againe wanakotu be yana dewa wana'awatalatalainena.” Hidedemi Fesito gigahedi.

⁶Au aiyeta eita o ka'i teni Fesito Yelusalema againe gimiyami tu Sisaliya againe gihobu. Bogi sa'eyana gida mala gilauna vedewayauga ana manuweya giluku givetoga, ada givehimeya be Folo hina'aliyena. ⁷^aAda au Folo guyemu againe, miYuda yadi tonagona Yelusalema againe hitauya-ma himidififina, ada hivebutu hihawavekoyoyena vaita koyona lakahi-mo'ena moy'a'ina gidafaisewadi tu keke adifaiweya yadi gahe velemo'ena ma hidaseyemauneni.

⁸Tu Folo tauna gilugolegolena gigayo, “Keke tamo gavadi koyona gadafaisewani, keke. Keke miYuda yama vehimeya gadakivekoyoni, keke manuwa-tafalolo lakahina gadakivebwaneneni, kadu keke Loma Tokaiwabu Sisa againe gadakoyo.”

⁹^bTu bana Fesito nuwanuwana miYuda bana againe ginanuwa'abiyedi fa'ina Folo againe gitoliluvaluva gigayo, “Ka'i nuwanuwa Yelusalema againe unana, ada hida dewa koyona badi hi'awatalatalainena-ma fa'ina iya tauku agaikuya unakotu?”

¹⁰Bana Folo gigahe gigayo, “Adamoya Sisa yana abavedewayauga againe gakotu. Gilubodana be o'eni yana kaliva udavedewayaugiku. Ada o tauni uhalamane-hagihagiyena keke tamo gavadi koyona miYuda agaidiya gadafaisewani. ¹¹Ka'i iya gadakoyo ada yaku koyona ana laufata alika amine digo, keke gadave'o'ola be unanuwakabubuyeku vaita keke

^z 25:3 Af 23:15 ^a 25:7 Af 24:5-6,13 ^b 25:9 Af 24:27

unaluve'alikaku. Tu ka'i yaku koyona miYuda hi'awatalatalainema keke velemo'ena digo, keke tamo hakwadi againe abavehimoya gidadauda-yo badi nimadiya ginahegenauweku. Au iya gave'o'ola be Loma Tokaiwabu higa Sisa tauna ginavedewayaugiku."

¹² Hidede amine Folo gigahe-yo Fesito yana tokivetuvetunu buye hilukahihhi, ada au gigahena gigayo, "O uve'o'ola be Sisa againe unakotu. Au Sisa againe unana."

Fesito Kini Agelifa againe Folo fa'ina gilukahihhi.

¹³ Himiyami tu Kini Agelifa wanouna, adi egana Benisi, buye hi'ela Sisaliya againe be Fesito hinalusiusileyena, ada bana againe hiwakawaka.

¹⁴ Ada aiyeta gavaiyehi himiyami tu Fesito Folo yana huluva fa'ina kini gikivetuvetununa be buye hilukahihiyena. Au gigahena gigayo, "Kaliva sa'eyana gimiyami, bana Filikesi deliya gise-vagahina amanadi.

¹⁵ Ada boi Yelusalema againe gana ana toveya, miYuda yadi abaveyao ana tofaisewa kikaiwabudiyao kadu yadi kaliva lakahidiyao bana yana koyona fa'ina hi'awatalatalaineku, ada hive'o'oleku be alikeya ganahegena.

¹⁶ Tu iya gagahedi gagayo, Ime miLoma yama dewa keke hidede amine. Keke kaliva alikeya anamaduhegeni. Nagona badi hihawavekoyoyena-ma bana buye hinavemagigi'ita'ita ada yana dewa hi'awatalatalainema fa'ina tauna anafaiweya ginalugolegolena. Muliya anavedewayaugina. Hidede amine gavenuwa'atadi. ¹⁷ Ada badi buye a'ela tu keke gada'i'abo'abobowa, au aiyeta anavelu abavedewayauga againe galuku, ada gavehimeya be kalivai-nadi hina'aliyena. ¹⁸ ^cHi'aliyeniyo nibaineyao hitowamidi, ada iya gavaita dewa koyo-mo'ena fa'ina hidahawavekoyoyeni tu yadi hawavekoyo keke hidede amine. ¹⁹ Au taudiyo yadi tafalolo ana nuwanuwagaga fa'ina hivekwageyena, kadu kaliva sa'eyana ana egana Yesu fa'ine hivekwageyena, Bana'e amanadi boi gi'alika tu Folo gigahegahe vaita wayawaina gidamiyami. ²⁰ Ada au nuwaku gifani gavaiy'amine halamana yadi tafalolo ana nuwanuwa fa'ina ganavaini-yo akufaiweya ganavedewayaugini ma keke gadahalamaneni. Hidema fa'ina Folo gatoliluveluvena be higa ka'i nuwanuwana Yelusalema againe ginana, ada medede againe hida awatalatalaina fa'ina ginakotu. ²¹ ^dTu bana Folo give'o'ola be deliya ginamiyami ada aimo Loma Tokaiwabu Sisa againe ginakotu. Give'o'ola-yo au iya gavehimeya be deliya hina'ita'itave'avina tu aimo gavatova-yo Sisa againe gana'iveninisena." Au hidedemi Fesito Agelifa againe gigahe.

²² Au bana Agelifa gigahe gigayo, "Iya nuwanuwaku kaliva-mo'ena yana gahe tauku gananogalina."

^c 25:18 Af 23:29 ^d 25:21 Af 25:11-12

Fesito gigayo, “Bogiyadi unanogalina.”

Folo Agelifa matane gimidimidi.

²³^eBogi hida mala gilauna Agelifa Benisi adi vaigau yamumu-mo'ena tulina tulina hi'osena be yadi wakikaiwabu hi'ela, ada manuwa abavaga'auta lakahina againe hiluku, kadu togiyomatana lakahidiyao ada badi melala ana tonagona buye hiluku. Moya'aidi hiluku tu Fesito givehimeya be Folo hi'aliyena. ²⁴^fAu Fesito givebutu gilukahihi gigayo, “Kini Agelifa kadu moya'aimiyao ime buye kavaga'auta amanadi. Keke gavana fa'ina tu hida kaliva wa'itana. MiYuda moya'aidi Yelusalema againe kadu hidedei Sisaliya againe bana fa'ine hive'o'ole-fa'iliku, hikova'awafatafata be higa keke aimo wayawaina ginamiyami. ²⁵Tu iya gavedewayaugina be keke tamo gavadi yana koyona gadanuhagani-yo alikeya ganahegeni. Ada bana tauna give'o'ola be Loma Tokaiwabu Sisa againe ginakotu fa'ina, iya gavehimeya be Loma againe gana'iveninisena. ²⁶Au yada Tokaiwabu Loma againe yana leta gana'etoladina tu gavaimi ganagahe? Kaliva gavadi yana koyona ganayakahini ma nuwaku giluhifufu. Hidema fa'ina gavehimeya be moya'aimi matamiya gimidimidi, ada kadu Kini Agelifa o mataniya gimidimidi be ya toliluvaluva againe unavedewayaugina. Unavedewayaugina be ka'i gavadi yana koyona unanuhagani-yo akufaiweya leta againe ganayakahina. ²⁷Au ka'i filisina Loma againe kotu fa'ina gana'iveninisena be keke tamo yana koyona ganayakahini, medema keke gidalubodani.” Au hidedemi Fesito gigahe.

Folo Kini Agelifa matane tauna gilugolegolena.

26 ¹Tu Agelifa Folo againe gigahe gigayo, “Au gahawahege be tauni fa'iniya unalukahihi.” Ada Folo nimana gikilakahina givebutu tauna gilugolegolena. ²Gigayo, “Kini Agelifa, nuwaku giyamumu fa'ina adamoya o mataniya gamidimidi be gaitoma moya'aina fa'ina miYuda hihawavekoyoyeku-ma iya tauku ganalugolegoleku. ³Wona velemona nuwaku giyamumu fa'ina o'eni miYuda yada dewa moya'aina kadu gaitoma moya'aina kavekwavekwageyena-ma uhalamanehagihagiyyena. Hidema fa'ina gave'o'ole be ya wa'atuvefa'ila yaku kahihi unavanenegena.

⁴^gAu miYuda moya'aidi yaku dewa boi kabi'okuya be tova adamoya ganunauwena-ma ahe hihalamanena. Tauku yaku melala againe kadu Yelusalema againe gavaiya'amine iya gahuluva ma au hihalamanena.

⁵E, boi tuwaina hihalamaneku ada ka'i badi nuwanuwadi amine, au iya fa'ikuya adifaiweya hina'awatalatalaina higa boi kabi'okuya yada tafalolo

^e 25:23 Md 10:18 ^f 25:24 Af 22:22 ^g 26:4 Af 22:3; Fl 3:5-6

ana yo'o sa'eyana againe galuku, adi egana Falisi. Badi Falisi Moses yana vehimeya ana idibumuhiaga againe miYuda velugadiyao hitubuhegedi, ada iya Falisi fa'ina kadu hidedemi gahuluhuluva. ⁶^hAda tova adamoya yaku nuwanuwa sa'eyana fa'ina hivekotuku. Boi tuwai-mo'ena Yaubada bwanenedeyao agaidiya giwonadabadaba higa yana Tovegida adi kibababala fa'ina gina'iveninisena. Hida Yaubada yana wonadabadaba iya ganuwave'avina fa'ina hivekotuku. ⁷Ada au ide miYuda yada yo'o tuwelo matatabudi uyadayada be bogi Yaubada hihawahawadavavana tu hinuwave'avina higa Yaubada giwonadabadaba amine, au badi agaidiya ginalakayemu. Ho Kauveya, miYuda higahe vaita hida nuwanuwainadi hidanuwave'avini tu iya kadu hidedemi ganuwave'avina nonogana hihawavekoyoyeku. ⁸Ide omi miYuda, gavana fa'ina wagahe vaita Yaubada keke anafaiweya kaliva alikeya ginasivemidididi?

⁹Tu boi iya tauku ganuwanuwa vaita gidalubodaku be gadavedivediwe kaliva Yesu kwanaNasaledi ana egana hivetumaganena-ma gadakivekoyodi. ¹⁰ⁱAda Yelusalema againe hidedemi gahuluva. Abaveyao ana tofaisewa kikaiwabudiyao yadi vehimeya againe Yaubada yana kaliva moya'aidi gakive'avid be deliya gasedi. Muliya hivedewayaugidi againe, ka'i tovedewayauga hivehimeya be vaita alikeya hinahegedi, au iya gave'ehe. ¹¹^jKadu tova keke sa'eyadi manuwa-abavehawala sinagogi tulina tulina agaidiya ganauna be gamunumunudi higa yadi vetumagana hidahegena. Au Yesu yana kaliva agaidiya ga'il'a-mo'a fa'ina gana lauveya malifafal melalai-dina agaidiya galuku be gakivekoyodi.

Folo yana hagavila Yesu againe gilukahihiyena.

Afositolo 9:1-19, 22:6-16

¹²Tu tova sa'eyana gamidi be Damasiko againe ganana. Abaveyao ana tofaisewa kikaiwabudiyao hivegideku, ada aku vehimeya fefe againe hi'etoladina be ganauwena higa tovetumagana ganakivekoyodi fa'ina.

¹³Kauveya unogali! Edeya ganauna tu mahalina lakahimo'ena lobameya ga'itana, mema kauwana yana mahala gitubuhegena. Ada iya'eku kadu kaliva hivewba'uliyeku-ma buye gituvemahalima. ¹⁴Au moyaima babiya abe'u tu ago'ago sa'eyana ganogalina bona Hibeliu againe gigahetu gigayo, Saulo, Saulo! Gavana fa'ina ukikivekoyoku? Ya dewa vaita bulumakau amine. Wagana yana fuluma gi'utu'utu'atugena fa'ina, bulumakau tauna gi'ivekoliyana amine, meda o'eni yaku nuwanuwa udibudibutoyogena fa'ina tauni ase'ase una'ive'aulolona.

¹⁵Ada iya gagayo, Kaiwabu, O hakwa'adi?

Bana Kaiwabu gigayo, Iya'eku Yesu, ada Iya ukikivekoyoku. ¹⁶Au umidi. O againiya ga'ivemogataliku be yaku tofaisewa ganavegide. E,

^h 26:6 Af 28:20 ⁱ 26:10 Af 8:3 ^j 26:11 Af 9:1-2

gavegide be tova adamoya u'itaku ma valeyaku una'awatalatalainena, kadu gavadi aimo tova mulina gana'ivemogatalina-ma una'awatalatalainena. ¹⁷Tauni ya yo'o miIsileli agaidiya ganalugolegole, kadu yo'o tulidiyao agaidiya ganalugolegole be keke hinakivekoyo. Au badi agaidiya gana'iveninise be matadi unakivemahalina.

¹⁸^kUnakivetuvetunudi be keke uyuyuya hinamiyami, au mahalina againe hinahagaviladi be hinamiyami, kadu keke Setani yana abavehimeya againe hinamiyami, au Yaubada yana abavehimeya againe hinahagaviladi be hinamiyami. E, hinahagaviladi be Iya agaikuya hinavetumagana, ada yadi vetumagana fa'ina Yaubada yadi koyona ginaywelina, ada yana yo'o mahamahalidiyao agaidiya ginalukuwedi. Hidemi Kaiwabu gigahe.

Folo yana faisewa Yesu fa'ine gilukahihiyen.

¹⁹Kini Agelifa unogali! Hida vehimeya lobama ana Kaliva giveleku-ma keke gadadibutoyogeni. ²⁰^lAu nagona Damasiko kadu Yelusalema againe galumamala. Muliya miYuda yadi melala moya'aina agaidiya kadu yo'o tulidiyao agaidiya galumamala gagayo, Yami dewa koyona wanahegena be Yaubada againe wanahagavilami, ada yami hagavila velemo'ena ma yami huluva haghagina againe wanaseyemaunena be moya'aidi hina'itana. ²¹^mHida yaku laumamala fa'ina miYuda manuwa-tafalolo lakahina againe hikive'aviku ada higaluvaluva be hidaluve'alikaku. ²²Tu Yaubada yana veluga agaikuya tuwaina be ginunauwena tova adamoya fa'ina, adamoya-mo'a hidedei gamidimidi be moya'aimi agaimiya ga'awa'awatalatalaina, kabi'omiyao kadu lakahimiyao leleleya. Boi tuwai-mo'ena Moses kadu Yaubada bonana ana to'awatalatalaina velugadiyao gavaimi aimo tova mulina ginalakayemu-ma higaheye-vagahina. Ada badi higahe amine, meda iya gagahe. Keke mali venuwa'ata gadalukahihiyeni. ²³ⁿAda badi to'awatalatalaina higahe vaita Yaubada yana Tovegida Keliso aulolo tagiya gidanuhagana, kadu gida'alika be gidamididi-havagi. Au Bana'e gidamiditowamidi fa'ina, miYuda agaideya kadu yo'o tulidiyao agaidiya mahalina fa'ina gidalumamala.”

Fesito be Agelifa Folo yana lugolagola fa'ina buye hive'agahegahe.

²⁴Ada au hidedemi Folo tauna gilugolegoleni tu Fesito bana againe gikova agona lakahina gigayo, “Folo, o kabakabaleya. Tova moya'aina buki uhawahawana fa'ina uvekabakabaleya.”

²⁵Tu bana Folo gigahe gigayo, “Kauveya Fesito, iya keke gadavekabakabaleya, au nuwanuwa velemona kadu tunutunugina

^k 26:18 Kl 1:13; 1Fi 2:9 ^l 26:20 Af 9:22,28, 22:21 ^m 26:21 Af 21:30-31

ⁿ 26:23 Lu 24:46-47

galukahihiyena. ²⁶ °Kini Agelifa, hida gaitoma ahe uhalamanena fa'ina akufaiweya o againiya ganagaheye-mo'ena, keke tamo gavadi ganasevauyeni. Gaitoma ahe gilakayemu-ma keke hukune gidalakayemu, au kabu'avane gilakayemu fa'ina iya gavaita hida gaitoma moy'a'ina uhalamane-'owona. ²⁷ E, Kini Agelifa, gavaiyami? Ka'i Yaubada bonana ana to'awatalatalaina yadi gahe uvetumaganena? Makewa uvetumaganena ma iya gahalamanena!"

²⁸ Au bana Agelifa Folo againe gigahe gigayo, "Ka'i mene ounuwanuwa vaita tova adamoya ya laumamala kali'uhona againe udasive'auyeku-yo Yesu Keliso gadavetumaganeni?"

²⁹ Bana Folo gigayo, "Ka'i laumamala kali'uhona o ka'i tunugina au ai'adi, tu Yaubada againe gave'o'ola be iya ganuhagana amine kadu o'eni unanuhagana, ada moy'a'imiyo adamoya yaku gahe wavanevanenegena-ma kadu wananhagana. Tu keke nuwanuwaku hida bulava kainumula againe omi hinayogomi."

³⁰ Hidedemi gigahe-yo bana kini gitowamidi kadu kabemani ada Benisi, kadu moy'a'idi badi buye hihiyoto-ma himidi. ³¹ ^pAda hihobu be buye hive'agahegahe higayo, "Ayoma! Bana hida kalivai-nadi keke tamo gavadi koyona gidafaisewani tu hima gavana hidamiyalue'alikani o ka'i deliya hidamiyaseni."

³² Ada au Agelifa Fesito againe gigahe gigayo, "Ka'i bana hida kalivai-nadi keke gidave'o'ola be Loma Tokaiwabu againe gidakotu digo, adafaiweya kadayuna be gidana."

**Folo tolugaviya hi'ita'itave'avina-ma buye
hiyage be hinana Loma againe.**

27 ¹ Tu Fesito givehimaya be wakeya anayage anana Loma againefafali ana egana Itali. Givehimaya-yo yana kalivamomo Folo kadu filisina velugadiyao buye hihegenauwedi togiyomatana sa'eyana againe, ana egana Yuliyasi, be bana gina'itave'avidi. Bana Yuliyasi Loma Tokaiwabu yana ame adi togiyomatana sa'eyana. ² Ada Adalamitiumi ana waka sa'eyana againe ayage, wakai-nadi taliya ana melaleya ginanulukuluku Esiya ana fafaliya. Kadu kaliva sa'eyana gimiyami, ana egana Alisitako, kwanaTosalonaika, medema melala fafali ana egana Masedoniya againe. Ada au bana ime buye ayage be alowoga.

³ ^qAnauna tu aiyeta anavelu againe Saidoni avaina. Ada bana Yuliyasi Folo ginuwakabubuyena fa'ina gihawahegena be ginahobu tobohiyaneyao gina'itadi, ada badi anaga kadu yana gava'adi nuwanuwana ma hinavelena. ⁴ Kadu ayage Saidoni ahege tu alaka ma bolimana giluveyeveyewama fa'ina, himula ana egana Saifilasi aiwa'una

° 26:26 Yo 18:20 p 26:31 Af 25:25 q 27:3 Af 24:23

anuve'uyena. ⁵ Anauna befafali ana egana Silisiya ahegena, kadu anauna fafali ana egana Famifiliya ahege tu melala ana egana Maila avaina, medema fafali ana egana Laisiya againe. ⁶ Ada medede againe yama togiyomatana Alekisanidiya ana waka sa'eyana ginuhagana, medema tova kabi'ona ginalowoga fafali ana egana Itali againe ginana. Ada au ime giveyagevedamama be alowoga. ⁷ Ada aiyeta gavaiyehi ma'inuwameyao anauna tu bolimana gilulutunetunema fa'ina, vaita keke amafaiweya Naidasi anavaini. Tu anauna anauna Naidasi lilin ayemu tu meda bolimana giluveyeveyewama fa'ina, keke amafaiweya mala wamatane anana. Hidema fa'ina ma'i anuviviya, himula ana egana Kelita aiwa'una anuve'uyena be kabuna ana egana Salamone amine a'ela anuwaliliuga. ⁸ Au taliya lilin anauna tu bolimana fa'ina keke amafaiweya adamadunauna, au ma'inuwameyao abaluku sa'eyana avaina, ana egana Abahiwaga Yamumuna, medema melala ana egana Lasiya lilin.

⁹⁻¹⁰ Tu medede againe aiyeta a gavaiyehi amiyami tu tova yamumuna ahegena, au ka'i adanu-havagi digo, yamana au vitana. Mala koyona ana aituha giluveda'ufu, fa'ina miYuda yadi tafalolo lakahina ahe gihavaina, tafalolo-nadi againe Koyona ana Aba'aiyawela hinuwa'udu'uduna. Mala koyona ana aituha giyemu fa'ina, bana Folo givenuwa'atadi gigayo, "Kaliva, keke kanana. Yadana vitana ma ga'ayaunena. Ka'i kanana digo, lokoloko kanave'alugena, waka kanakivekoyona kadu ide ka'i tufoida kana'alika." Hidedemi Folo gigahe. ¹¹ Tu togiyomatana Folo yana gahe keke gidavenogaleni, au badi waka ana tovehimeya kadu toniwaka higahe vaita hinana-ma bonadi hi'abina. ¹² Bolimana ana aituheya abahiwaga againe amiyami-ma waka yana miya keke gidalubodani. Hidema fa'ina kaliva tufoidi moy'aidi nuwanuwadi hinatalalaka be hinagalaluvaluva ka'i Finikesi againe hinana. Finikesi, medema abahiwaga himula ana egana Kelita againe, ada ana aba'ita keke wabolimaneya au niwalova wa'amine. Au hidede againe adifaiweya hinamiyami bolimana ana aituheya.

Mala koyona hinuhagana.

¹³ Tu mala dikudikukuna wabolimaneya gitowa fa'ina, kaliva hinuwanuwa vaita Finikesi againe adifaiweya hinana hinayemu. Au lomu hisilakahina digo Kelita taliyea-mo'aya amadubala. ¹⁴ Aimo keke adana lauva tunugina tu mala koyona ana egana lauhanaga himula amine gilaka'ela. ¹⁵ Giyemu waka gi'abina ada ave'etolakalaka-wayoga, keke amafaiweya. Au a'ilova tu bolimana gibibima. ¹⁶ Gibibima digo himula kabi'ona ana egana Koda aiwa'une anuwaliliuga. Himula aiwa'une anauna tu avegavegala, waka kabi'ona ataitaina higa adasilakahina ada keke lefo ginayavalini fa'ina. ¹⁷ Au imolata hivegavegalena tu waka

tabone hisilakahini-yo bulava o'olina againe waka lakahine hi'ubibina be keke lefo ginaluyavalini fa'ina. Kadu himatamatauta ka'i waka aimo lelega againe ginalaka, lelegai-nadi ana egana Saitasi. Hidedemi himatauta fa'ina naya hikakilina be bolimana waka gibibina.¹⁸ Ada mala koyona keke ma'i gida'a'tagoni fa'ina tova anavelu againe hivebutu lokoloko hihebana.¹⁹ Tu tova anaveto againe waka ana lokoloko taudiyao nimadiya hihebana.²⁰ Kadu aiyeta a gavaiyehi anauna tu keke ma'ita kauwana ada'itani, kadu ibadibadi keke ma'ita ada'itani fa'ina ha'amine ha'amine anauna ma keke adahalamaneni. Kadu'e bolimana aimo gimadumadu toyogina tu ime availta ada'alika.

²¹ Tu kaliva lauva tunugina keke ma'i a'a hida'u'ani-yo Folo gitowamidi gigahedi gigayo, "Kaliva, vaita bonaku wada'abini-yo Kelita keke kadahegeni. Ka'i kadamiya digo, hida lokoloko moy'a'ina kadu waka keke kadahegedi.²² Tu omi wanogali! Wana'asevatu fa'ina keke tamo hakwadi agaideya gina'alika, au wakagaga gina'alu'alugena.²³⁻²⁴ Hidema gahalamanena, fa'ina bogi againe yaku Yaubada gahawadavadavana-ma yana tovenuwa'ata iya agaikuya gi'ela gigahe gigayo, Folo, keke unamatauta. Aimo Loma Tokaiwabu Sisa matane unamidi be ginavedewayaugi. Kadu'e Yaubada tonuwakabubu fa'ina, au ginanuwakabubuye be keke tamo hakwadi wakeya buye wananauma-ma gina'alika. Au hidemba yaku Yaubada yana tovenuwa'ata gigaheku.²⁵ Tobohiyakweyao, hidema fa'ina wana'asevatu. Bana Yaubada gavetumaganena be yana tovenuwa'ata gigaheku amine, velemo'ena kananuhagana.²⁶ "Ide keke kana'alika tu aimo hai himula sa'eyana againe bolimana ginalulakahida." Hidedemi Folo gigahe.

Aiyeta fotini hinu-kawowo tu taliya liline bolimana gibibidi.

²⁷ Tu bogi fotini ahegedi tu aimo bolimana ha'amine ha'amine gibibaidadanema, lehaga againe anauna-ma ana egana Ediliya. Ada bogi nafone imolata hi'ayaunena taliya sa'eyana liline ayemuyemu.²⁸ Ada hidema fa'ina hitutuluva be lehaga ana tunuga hiwavana, nimada ana wava foti (40). Himiya kabisona kadu hitutuluva-havagi ada lehaga nimada ana wava teti (30) hinuhagana.²⁹ Au himatauta higayo, "Ka'i yama waka lai againe ginatula." Au lomu fowa waka ulene hisehobuyen, ada yadi viviliwa agaidiya hive'ove'o'ola be higa mala gidamadulauna.³⁰ Ada imolata waka kabi'ona lehageya hisehobuyen higa waka lakahina hida'otayabuyabuna. Hive'alololo higayo, "Lomu waka mudune anasehobuyen."³¹ Tu bana Folo togiyomatana kadu yana tolugaviya agaidiya gigahe gigayo, "Ka'i hida imolata keke wakeya hinamiya digo, aimo keke amifaiweya yawayawamiyao wanamiyami, au lehageya

^r 27:21 Af 27:9-10 ^s 27:23-24 Af 23:11 ^t 27:26 Af 28:1

wana'alika." ³² Hidedemi gigahe fa'ina, tolugaviya bulava againe waka kabi'ona hiluhifona-ma hitalagolohina ada au hive'alugena.

³³ Tu mala kabi'ona ginawedala ma Folo gigaheya'aya'alidi be a'a hina'ana gigayo, "Aiyeta fotini wamiyami yami wamatauta, keke ma'i a'a wada'u'ani, au mafu gilaumi. ³⁴ "Fa'ina gave'o'olemi toyogina ma'i a'a wada'ana. Ka'i keke wana'a yami faiwala keke, au wana'alika. Tu gagahemi keke tamo hakwadi agaimiya u'una sa'eyana gina'agolohini." ³⁵ Ada Folo hidemi gigahe-yo, au tauna a'a givaina digo moy'a'adi matadiya Yaubada againe givesiule, gikihinena be givebutu gi'a. ³⁶ Au moy'a'adi hi'asevatu be kadu ma'i a'a hi'ana. ³⁷ Ada ime kaliva wakeya amiyami-ma ama kilagalaga 276. ³⁸ Ada au moy'a'adi hi'ahiyauwa-yo a'a wakeya hidodona-ma lehageya hi'iyauyaulena be waka ginalu'aihaya fa'ina.

Lelega againe waka gitula.

³⁹ Tu mala gilauna imolata gava himula againe ayemu-ma hifaniyena, tu hukuna sa'eyana hi'itana, ana taliya makamakamina. Ada au hivevai be medede againe waka hinabilakahina. ⁴⁰ Au tufoidi lomu hitalagolohina, kadu tufoidi bulava wayaisi ana sive'avina hiyauna. Hiyauna gihavaina, naya waka mudune hisilakahina be bolimana waka ginalutunetunena fa'ina. Ada taliya amine waka ginauna. ⁴¹ Tu waka lelega againe gitula. Waka muduna gilo'a, keke adifaiweya hinakakinu tu ulena ma lefo lakahina be giluyaweyawelina.

⁴² Tu tolugaviya hivevai higa filisina hinaluve'alikadi be keke tamo hakwadi taliyeya hinakayolaka-yo hina'ota fa'ina. ⁴³ Tu togiyomatana nuwanuwana Folo ginalugolegolena fa'ina gihawatadi. Au givehimeya be gaveyao adifaiweya hinakayo, medema hinamidi'auhifu be taliyeya hinakayolaka. ⁴⁴ ^vVelugadiyao kayo keke hidahalamaneni-ma ai againe o ka'i waka yogona againe hinakive'avina be taliyeya hinalaka. Ada au hidede amine moy'a'ima taliyeya alaka-'owoga, keke tamo hakwadi vita gidanuhagani.

Folo yana miyami Molita againe fa'ina.

28 ¹Tu abavagave'avina againe ahe alaka-yo himula ana egana anogalina higa Molita. ²Ada Molita kaliva veyaveyaodiyo ada hihinekalikaliyema be hilusiuleyema, ada ai hikulina be anavevala fa'ina wehi buye gilugaga againe ime avekwadudu. ³Ada bana Folo gina ai giwahi be yana itava ai gi'ala'alata againe gidahegelakahina ma oloto koyona givala'inena fa'ina giyemu, ada nimane gi'aiyovaga tu gikudave'avina. ⁴Ada badi Molita kaliva oloto Folo nimane

^u 27:34 Af 27:22 ^v 27:44 Af 27:22-25

gikudave'avina-ma hi'itana againe, buye hive'agahegahe higayo, "Ha! hida kaliva makewa tolube'alika, ada keke lehageya gidatowa'alika tu adamoya higa yana dewa ana laufata viviliwa nimane alika ginanuhagana." ⁵ Tu Folo oloto gilukakina be ai againe gibe'u, ada keke tamo vita gidanuhagani. ⁶ *Tu badi kaliva hilulubodena hivaita wowona gidatubuga o ka'i gidamadu'alika. Au hilulauboda hilulauboda tu keke tamo gavadi bana againe gidalakayemu fa'ina nuwanuwa tulina nuwadi gi'afolena, ada higayo, "Bana hidevama kadu viviliwa sa'eyana."

⁷ Tu kaliva sa'eyana gimiyyami, ana egana Fabiliyo, himulai-nadi ana tovehimeya, ada bana yana babi liline taliyeya ime alaka. Ada bana yana manuwefa givega'aulema-yo aiyeta tohiye yana nuwakabubu againe amiyami. ⁸ Ada tamana gl'aulolo ana iviya gidauda, wowona vaita ai kadu kamona gihiwahegenahakahina. Au Folo to'aulolo againe giluku ada give'o'oleni-yo nimana bana againe gisena be gisiveyawana. ⁹ Bana giyamumu-yo kadu to'aulolo moya'aidi medema himulai-nadi againe himiyami-ma hivebutu hi'ela'ela, ada yadi yamumu hinuhagana. ¹⁰ Kadu nuwakabubu moya'aina hivalema, ada muliya akidewadewa be anayage ana toveya, amaga ama gufa yadi nuwakabubu hidodon.

Folo yanana Loma againe fa'ina.

¹¹ Au Molita againe vaikohi tohiye amiyami tu waka sa'eyana againe ayage be alowoga. Wakai-nadi ma melala ana egana Alekisanidiya againe gitauya be himulai-nadi againe gimiyyami bolimana ana aituheya. Ada waka ana egana Viviliwa Natuluga. ¹² Au wakeya anauna tu melala ana egana Sailakusi againe ayemu be ahobu aiyeta tohiye amiyami. ¹³ Kadu ayage-havagi be anauna tu melala ana egana Legiumi againe ayemu. Bogi ada mala gilauna mala dikudikukuna giyemu, ada au aiyeta luhei ahegedi-yo melala ana egana Futiyolai againe ayemu. ¹⁴ Ada medede againe tovetumagana tufoidi anuhagadi be higahe fa'ina badi agaidiya awakawaka tafalolo sa'eyana. Ada ahegedi tu ana Loma tufone alakayemu. ¹⁵ Tu badi tovetumagana Loma againe valeyama hinogalina au hilowoga be hinamaduvega'aulema. Tufoidi abavaga'auta ana egana Afiyo againe ave'anauhaga. Kadu tufoidi melala ana egana Abamiyami Tohiye againe ave'anauhaga. Ada Folo gi'itadi-yo Yaubada againe givesiule ada gl'asevatu.

Folo Loma againe miYuda agaidiya gilumamala.

¹⁶ Tu Loma alakayemu againe, kabemani Folo hihawahegena be manuwa sa'eyana againe anakaibe ginamiyami, tu tolugaviya sa'eyana gi'ita'itave'avina be keke gina'ota fa'ina. ¹⁷ Ada au Folo aiyeta tohiye

w 28:5 Mk 16:18 x 28:6 Af 14:11

gimiyami tu miYuda yadi tonagona Loma againe gikovavaga'auhidi. Ada ahe hivaga'auta againe gigahedi gigayo, "Tobohiyakweyao, iya keke tamo gavadi koyona gadafaisewani, keke. Keke yada yo'o agaidiya gadakoyo, kadu keke yada dewa bwanenedeyao hivelawaleda-ma gadahawavekoyoyeni. Keke gadakoyo nonogana miYuda Yelusalema againe hikive'aviku be miLoma agaidiya hihegenauweku.¹⁸ Au badi hivedewayaugiku tu gavadi koyona gafaisewani-yo alikeya hidahegeku-ma keke tamo hidanuhagani fa'ina nuwanuwadi hinayauku be ganana.¹⁹ Tu badi miYuda higahedi be keke hinayauku, fa'ina eda sa'eyanaga againe akufaiweya ganana, higa gave'o'ola be Loma Tokaiwabu Sisa againe ganakotu. Hidedemi gave'o'ola tu keke vaita tamo gavadi fa'ina tauku yaku yo'o bana matane gadahawavekoyoyedi, keke.²⁰ Ada hida gaitoma iya agaikuya gilakayemu fa'ina omi gakovavaga'auhimi be buye kanalukahihi. Au adamoya yogoyogoniku wa'itaku. Bana'e ide miIsileli kabodabodana be ginakibababaleda amanadi iya gavetumaganena fa'ina, hida bulava kainumula againe yogoyogoniku gamimiyami." Hidedemi Folo miYuda yadi tonagona gigahedi.

²¹ Tu badi higahena higayo, "Keke tamo leta o fa'iniya Yudiya againe hida'etoladini-yo adanuhagani, kadu keke tamo hakwadi tobohiyama sa'eyana medede againe gidatauya be gida'ela-yo o fa'iniya gidavenuwa'atama, o ka'i gidahawavekoyoye.²² Tu ime nuwanuwama ya nuwanuwa ananogalina, fa'ina ahalamanena kalivafafali moya'aina agaidiya hida Yesu kwanaNasaledi yana yo'o badi agaidiya o uluku amanadi hi'awalavedi." Hidedemi higahe.

Folo yana laumala anavelu Loma againe.

²³ Hidemi higahe tu tova hisena be Folo againe hinavaga'autahavagi. Ada tovai-nadi giyemu againe, yo'o keke kabi'ona bana againe hivaga'auta. Yana kivetuvetunu malalauga givebutu be ginunauwena mala gibogi, ada Yaubada yana yo'ogaga ana luku fa'ina gilumamaledi. Gigaluvaluva be yana gahe Yesu fa'ine velemon'ena ma ginaseyemaunena be badi hinavetumaganena fa'ina. Ada Moses yana buki-vehimeya againe kadu Yaubada bonana ana to'awatalatalaina velugadiyo yadi etoladi agaidiya bonai-nadi giyakahina, au badi Yesu fa'ine gavaimi higahegahe-ma giyakahina.²⁴ Ada tovanenega tufoidi higahe higayo, "Au wona velemon'ena," ada hivetumaganena. Tu tufoidi ma keke nuwanuwadi hinavetumaganeni.²⁵ Au buye hivelawaleda-ma hivelawaleda-hilowolowoga tu Folo yana gahe sa'eya-mo'ena badi gilukahihiyedi gigayo,

²⁶ "Unana be hida yo'o miIsileli unagahedi unagayo,

Tova moya'aina Yaubada bonana wanoganogalina

y 28:18 Af 26:32 z 28:20 Af 26:6 a 28:26 Ais 6:9-10

tu keke halamana wanavaini.

Kadu wana'ita'itana tu keke wana'itahalamenaneni.

²⁷ Au hida yo'o taudiyao nuwadi hikivefanina,
tagadi hi'ivekuluna, matadi hikive'uyuyuna.
Keke hidahawahegedi be matadi ganakivemahalini,
o ka'i tagadi ganakifoleni o nuwadi ganakiyauni.
Au keke nuwanuwadi Iya agaikuya hinahagaviladi
be ganakiveyamumudi fa'ina.

Au hidedemi Yaubada bana Aiseya awane gigahe.

²⁸ ^b Ada hidede amine Folo Yaubada bonana giyakahini-yo kadu
gigahedi gigayo, “Au nuwanuwaku wanahalamane-hagihagiya Yaubada
ahe givehimeya be yo'o tulidiyao yana kibababala fa'ina hinanogalina,
ada au badi'iyao amanadi hinavenogalena.” [²⁹ Ada hidede amine
gigahe-yo badi miYuda hivebutu hilowolowoga tu yana gahe fa'ina buye
hivekwavekwageya.]

³⁰ Tu bana Folo medede againe gimiyami malamala luhei. Kadu
manuwa gimiyamianina-ma fatana tauna giseusena, ada gaveyao
moya'aidi hi'ela be hina'itana medema yana wavemwamwala
gilusiuleyedi. ³¹ Yaubada yana yo'ogaga ana luku fa'ina gilumamaledi,
kadu Kaiwabu Yesu Keliso fa'ina givehawaledi, ada au yana wa'asevatu
gilukahihi ada keke tamo hakwadi gidahawatani. Au hidede amine.

^b 28:28 Af 13:46